




Abibulla Seit-Celil, Mayre Mamutova

# Qırımtatar tili 5 ve edebiyatı 2 qısım

sinif



  
НОВА  
УКРАЇНЬСЬКА  
ШКОЛА

**Абібулла Сеїт-Джеліль, Майре Мамутова**

# **КРИМСЬКОТАТАРСЬКА МОВА ТА ЛІТЕРАТУРА**

**підручник інтегрованого курсу для 5 класу  
закладів загальної середньої освіти  
(у 2-х частинах)**

**Частина 2**

*Рекомендовано Міністерством освіти і науки України*

**Abibulla Seit-Celil, Mayre Mamutova**

# **QIRIMTATAR TİLİ VE EDEBİYATİ**

**orta umumtasıl müessiseleriniñ 5-ci sınıf içün  
bütünleştirilgen kursu dersligi (2 qısımda)**

**2-ci qısım**

**Чернівці  
«Букрек»  
2022**

УДК 811.512.19(075.3)  
С 28

*Рекомендовано Міністерством освіти і науки України  
(наказ Міністерства освіти і науки України  
від 08.02.2022 р. № 140)*

Підручник розроблено  
відповідно до модельної навчальної програми  
«Інтегрований курс кримськотатарської мови та літератури.  
5-6 класи»  
для закладів загальної середньої освіти  
(авт. Мамутова М.Р., Сеїт-Джеліль А.Ш.)

**Сеїт-Джеліль А., Мамутова М.**

С 28 Кримськотатарська мова та література: підручник  
інтегрованого курсу для 5 класу закладів загальної  
середньої освіти (у 2-х частинах). Частина 2. Чернівці :  
Букрек, 2022. 132 с. : іл.

ISBN 978-966-997-124-1

**УДК 811.512.19(075.3)**

**Seit-Celil A., Mamutova M.**

С 28 Qırımtatar tili ve edebiyatı: orta umumtasıl mües-  
siseleriniñ 5-ci sınıf içün bütünleştirilgen kursu dersli-  
gi (2 qısımda). 2-ci qısım. Çernivtsi: Bukrek neşriyat evi,  
2022. 132 s. : resimli.

ISBN 978-966-997-124-1

**УДК 811.512.19(075.3)**

ISBN 978-966-997-124-1

© Сеїт-Джеліль А., Мамутова М., 2022  
© Видавничий дім «Букрек», 2022



## 18-Cİ AFTA

### Sarf

#### Söz ve onıñ leksik manası. Birmanalı ve çoqmanalı sözler.

##### Sözniñ asıl ve köçme manası

Tilde türlü şey ve adiselerge, olarnıñ hususiyetlerine adlar berile. Bu adlar sözler vastasinen tanıla. Demek, söz belli bir manalar taşığanına köre tanılr. Yani biz *alma* sözüni oña has sesleri ve oña ait *ne?* sualıne köre mundericesini tayin etemiz. Em mında *alma+lar*, *alma+nı* kibi ve diger şekiller bizge onıñ **grammatik manasına** bilgi qoşa. Aslında ne mana taşığanı (demek, qaysı meyva olğanı) ise, onıñ **leksik manasını** teşkil ete. Şu mananı da bizge **izaat luğatı** bildire bile.

Sözlerniñ nutuqta rastkelgen manaları izaat luğatında pekitilir. Olar tili-mizniñ söz baylığını teşkil ve numayış ete. Bazı sözler bir mana taşıy. Olar **birmanalı** sayılır. Meselâ, *at*, *keñ*, *satmaq* ve il. Digerleri ise bir qaç mana taşıy, demek olar **çoqmanalı** sayılır. Meselâ:

– mavi, kök, elâ, çiy köz – şu, renkni bildirgen sıfatlarnen **köz** sözü *körüv müçesini* bildire;



– köz tiymek, köz boyunca-

ğı – söz *yaramay baqış* manasını taşıy;

– üç közlü ev – söz *oda* manasında qullanıla ve il.



Çoqmanalı sözlerniñ **asıl** ve **köçme** manası ola bilir. Asıl manası sözniñ doğrudan-doğru manasını bildire, köçme mana ise onıñ adden tış hususiyetini bildire. O, alâqa vastasinen peyda olıp, nutuqta qullanılğan



manasını tayin ete. Luğatta o, asıl mana(lar)dan soñ mahsus *köçme* sözü ile belgilene. Misaller:

**añlatmaq** – 1) tarif etmek. *Oca mevsunı yahşı añlata.*

2) *lingv.* bildirmek. *Söz bir qaç mana añlata* (demek, sözniñ bir qaç manası bar)

3) aqıl qoymaq. *Qartbabam maña er şeyni añlattı.*

**kelmek** – 1) bir yerge barmaq, ketmek. *Kim keldi?*

2) *köçme* eşitilmek. *Uzaqтан sesler keke.*

3) *köçme* başla(n)maq. *Baar keldi.*

4) *köçme* irişmek. *On yaşına keldi.*

5) *köçme* yetmek, asıl olmaq. *Aqlına keldi. Meydanğa keldi.*

6) *köçme* qail olmaq, seslenmek, cevaplanmaq. *Bir fikirge kelmek.*

7) *köçme* artından ketmek. *Metinden soñ resimler keke.*


8) *köçme* ait olmaq, kelişmek. *Onıñ eşqına yaşamağa keke. (укр. Западн цю-го варто жуму)*

9) *köçme* olup çıqmaq. *Qarpız qaç kilo keldi? Bu anter maña uzun keldi.*

10) *köçme* bermek. *Riyaziyat oña zor keke.*

11) *köçme* istemek. *Aşaycağım (içegeğim) keke.*

(S. Üseinovniñ luğatlarından)




⇒ **1-iş.** Yuqarıda berilgen misallerde sözler çoqmanalı olğanını tasdiqlaңыз. Bundan ğayrı, *köçme* manalarınıñ belli bir vastası bar olğanını añlatıңыз.

⇒ **2-iş.** Luğat yardımınen *yetmek, yanmaq, tökmek* sözleriniñ manalarını tayin etiңыз. Şuña köre sözler birmanalı yoqsa çoqmanalı olğanını, em doğru ve *köçme* manalarını belli etmege tırışıңыз.

## Kiçkene vahşiyler (qısqartılğan parçalar)

*E. Seton-Tompson*



### I

Yan er şeyden ziyade hindularnıñ ayatına suqlana. Er baar onıñ şuurını dünyalar kezip dolaşmaq arzusu sarıp ala. Şimal betke uçayatqan kiyik qazlarnı körgende qanı oynay: quşlarğa qoşulıp uçmağa istey.

Yannıñ bir talay mektep arqadaşları ‘baarni sevgenlerini’ aytalar, qızlar ise yılınıñ bu devrinde atta ‘yürekleri öskenini’ söyleyler, amma olarnıñ iç biri niayet baar kelgende Yannıñ közleri neden başqaca yanıp başlağanını, ne içün o, sınıfını terk etip uzaqlarğa qaçmağa istegenini añlap olamay.

– Ah, bu yerden qaça bilseydim! – eyecannen öküne o.

Onı hindularğa ya da çingenelerge qoşulıp, evden qaçmaqtan yalınız babasından qorqqanı tutıp tura.

### II

O yılı kiyik qazlar ne de güzel yır yırlar ediler! Olarnıñ sesi Yannıñ qalbine teren siñe, em buña cevaben yüregi sıqça çırpınırdı.

Türkünüñ manasını añlap yetmege niyetlengen oğlan kimsesiz yollarnen yürüp, şimalge, tek şimalge, özenniñ yuqarı qısmına taba adımlar eken, eñ kimsesiz yerlerni seçti. Özen kündoğuş tarafqa buruldı, amma küçük bir irmaçiq bu özenge sırttan kelip qoşulğanı içün Yan şu irmaq boylap yürüp, tar deredeki bir ormandan keçti. Tezden bu yol onı siyrek terekli bir uvağa alıp çıqtı. Qocaman aqqayınlar, çamlar ve qarağaçlar taldasında şeffaf irmaçiq şırılday, terekleriniñ pitaqları arasında qızıl sansarlar tınıştı bir



körünip ala edi. İrmaq kenarında Yan erlen, suvsamır ve daa nasıldır ayvanlarınñ izlerini kördi.

Bu yer o qadar tena edi ki, Yan bu yerlerni birinci olıp keşf etkenine özü de pek tez inandı. Zaten, keşfiyatçı olaraq bu uvağa özünüñ tam adını bermege – uvanı Glenyan dep adlandırmağa aqqı olğanına da pek tez qandı.

İşte, şu anden oğlannıñ bütün oy-fikiri kendi uvasınen bağlı oldı. Yan boş bir daqqa taptımı, aman uvasına yol ala edi. Kimerde ise öz quvançı ile başqalarinen de paylaşmağa istey edi.

Ebet, bu – onıñ öz dünyası edi. Bir zamanlarda çağalalar Kolumbnı Yañı Dünyağa (Amerika qıtası) yeteklep ketirgenleri kibi, bu dünyanı da oña kiyik qazlar köstergen ediler.

Babası özünüñ toprağını satqanda Yan pek efkârlandı. Amma şimdi azamatlı ağaclar ösken ormannıñ bir köşesine saip olğan soñ Yan kene canlanğan kibi oldı. Bütün orman alemi onıñki olğanına dair duyğu Yannı iç terk etmedi.

### III

Yannıñ ne baltası, ne de leskeri bar edi, lâkin episi bir, o özüne bir çadır qurmağa kirişti. Bunıñ içün başta bir er taraftan sıq pıtaqlarnen qapalı tena bir yer taptı.

Kimden ne içün saqlanmaq kerekligini o özü de bilmey, lâkin kitaplarda defalarca oquğan edi ki, aqiqiy izbasarlar öz qulübelerini yabancı közden çetçe bir yerde qura turğanlar.

O, qolaba leskernen irmaq kenarında çuqur qazmağa başladı. Yan eki boş küñü devamında, boyuna yedi, enine dört fut olğan bir çuqur qaza bildi. Çadırını, işte, şu yerde qurmağa istedi. Lâkin eliñde ancaq qolaba balta ola turıp, qararnen otuz dane terek dalından nasıl çadır qurarsıñ? Er alda, Yan başqa bir qural qıdırmaq fikrinde degil edi. Hindularnıñ aletleri Yannıñ aletinden çoq yahşı olmasa kerek, degen fikir oña destek berdi.

Yan qulübe qurmağa yaraycaq material cıymağa başladı. Onıñ yerine başqaları olsa, bese-belli, başta bir eñ zarur şeylerni toplar ediler, amma o, öz çadırını azır alda körmekni pek tileksigeni içün çuqurnı qazıp bitirgeninen birden qulübeniñ divarlarını kötermeye kirişti. Divarlarda biri-birine beñzer eki ağaç bile yoq: olarnıñ birisi pek uzun, digeri – qısqaca, daa birisi egri, qıyış. Daa birleri bös-bütün çürügen: ya olarnı kesmek qolay edi de!

Tezden Yan kene malzeme qıdırmağa mecbur oldı, çünki çevre-çette material artıq qalmağan edi. O, şeerçikten yarım milâ qadar avlaqta bir talay ağaç obası körgenini hatırladı. Böylece, bir qaç bazar künleri şu ağaçlarını taşımaqnen keçti. Ağaçlarınıñ doquzını divar içün işletti, üç danesini ise çatı yasamaq içün qaldırdı. Çatı ağaçlarını biri-birine teñ mesafede qoyıp, üstlerini pitaqlarnen örtti. Onıñ da üzerine qarağaç qabuğı töşedi, soñra balçıq ketirip, bütün damnı yahşıca sıladı, taptadı, kenarlarını tegizledi. Qulübeniñ damı terek pitaqları arasından közge çarpmaması içün onıñ üstüne yeşil yapraqlar tökti.

Niayet, nice aftalıq israrlı emekten soñ onıñ orman evi endi azır edi!

*Ervin Bekirovniñ tercimesi*



## Luğat

avlaqta = biraz uzaqta  
adımlamaq = *mında*: zornen ketmek  
azamathlı ~ acayip  
aqqayın – *береза*  
defalarca = bir çox kere  
izbasar – *свідомит*  
israrlı = sebatlı, metanetli (*наполегливий*)  
keşfiyatçı – *першовідкривач*  
keşf etmək – *відкрити, винайти*  
vahşiy = kiyik (*дикун*)  
kündoğuş = şarq (*схід*)  
qanmaq ~ inanmaq  
qarağaç – *в'яз*  
qolaba lesker – *саморобна лопата*  
qocaman = büyükten-büyük, balabandan-balaban  
qulübe – *хатина, шалаш*  
suvsamır – *видра*  
sırttan = şimalden (*з півночі*)  
taldasında = qaraltısında (*нід покровом*)  
tena yer = raat bir yer  
terk etmemek = qaldırmamaq  
tınış = teneffüs  
uva = boş yer  
hindular = qızıl terililer  
çatı = taslaq (*звід, каркас*)  
şeffaf = arınıq, tüssüz  
şuur = añ (*свідомість*)  
egri = qıyış  
erlen – *мхир, мхорик*  
efkârlanmaq = qasevetlenmek



### Sual ve vazifeler:

1. Ne içün baarde Yannıñ ‘qanı qaynay’?
2. Baş qaraman er şeyden ziyade nege suqlana?
3. Yan qazlarnıñ yırlarını diñlep qayda adımladı?
4. Bu yol Yannı qayda alıp çıqtı?
5. Yan alañğa kelgende, o yerde neni kördi?
6. Yan ne içün bu uvağa özünüñ adını berdi?
7. Oğlan çadır qurmaqnı neden başladı? Yan çadır qurğanı aqqında abzatsnı tapıp oquñız. Abzatsqa 2–3 sual tiziñiz.
8. Yan qurucılıqta işletken ağaçlar nasıl edi?
9. Daa bir talay ağaçnı oğlan qaydan alıp keldi?
10. Bala çadırnıñ damını nasıl qurdı? İkâyeden doğru cümlelerni tapıp oquñız.
11. Siziñ fikriñizce, Yan ormandaki evinde bundan soñ ne yapacaq?
12. İkâyenıñ devamını oqumağa istegiñiz peyda oldımı?
13. Yannı nasıl tariflemek mümkün?
  - a) Yan – yañğızlıqnı sevgen bala;
  - b) Yan – çalışmağa sevgen oğlan;
  - v) Yan – tabiatnı sevgen ve hindular kibi ormanda yaşamağa azır olğan bala.
14. İkâyenıñ mevzusını angi cümle doğru tarifley bile?
  - a) Bu ikâye orman şaraitinde çadır quruv aqqındadır.
  - b) Bu ikâye azatlıq (serbestlik) ve mustaqillik, mesüliyetlik ve cesürlik aqqındadır.
  - c) Bu ikâye etraftaki tabiatnıñ güzelligi aqqındadır.
15. Aşağıda berilgen planğa esaslanıp, metinni ikâye etiñiz.

### Plan:

1. Baarde Yannıñ arzuları.
2. Yan şimalde kimse yürmegen yerlerni tapa.
3. Yan çadır qurmağa başlay.

## İzaat luğatçıǵı

**Mil** – Qadimiy Romada mesafeni ölçemek içün qullanılğan yol ölçeви birlemi. Qadimiy Romada qullanılğan milniñ uzunlığı 1482 metrni teşkil etken. Türlü memleketlerde türlü mil uzunlığı qullanıla.

**Fut** – bu söz ‘ayaq tübü’ manasını bildirgen *foot* ingliz sözünden kelip çıqa. İnglizlerde qullanılğan uzunlıq ölçüsidir. Türlü memleketlerde futniñ uzunlığı türlü olur.

## Ev işi

1. E. Seton-Tompsonniñ ‘Kıçkene vahşiyler’ eserini ikâye etiñiz. Cevabıñızda mürekkep ayırılması olğan ve mürekkep cümlelerni qullanıñız.
2. Köz sözünüñ manalarını tayin etiñiz.
3. Köz sözünüñ manalarını añlatıñız.

## Qoşma metin

- Köz** – 1. *ten.* körüv müçesi (*зоровий орган*). Köz aqı (*білок ока*). Köz bebegi (*зіниця*). Köz qapaǵı (*новіко*). Köz ekimi. Köz yaşı (*közyaş*). Közleri kör olmaq. Közleri yahşı körmey. Köz yummaq (*1) закрити очі; (2) köçme: померти*). Közleri qızarğan. Köz qırmaq (*моргнути*).
2. körüv (*зір*).
  3. baqış (*погляд*).
  4. oğursızlıq, nazar. Köz tiydi. Köz boyuncaǵı.
  5. delik (teşik). Qapı közü.
  6. oda. Üç közlü ev.
  7. bür (*брунька*). Köz aşısı (*окуліровка*).
  8. çoqraq, ceryan. Özen közü.

## Turğun ibareler

közlerini ağartmaq (*знівно, люто дивитися*); közüñiz aydın; közüni açmaq (*asıl ve köçme*); közü batmaq (*насмільюватися, зважуватися*); köz boyamaq (*замилювати очі*); közünden ğayıp olmaq; iç bir şeyge közüm yoq; közü yolda; közü yol çekmek; közüne ilişmek; közüne inanamamaq; közden keçirmek; köz-közge; közge kelmek (*зіткнутися*); közüne kirmek; közü көrmek (*asıl ve köçme* – er şeynen meraqılanmaq); köz qamaştırıcı (pek yarıq, parlaq); köz qararinen (tahminen); közünden qaçırmaq (*прогавити*); köz öğünde; öz öğüne almaq; köz öğüne ketirmek; köz öğünde tutmaq; köz(ü) oynamaq; közlerinden öpeyim; közüni ohşağan; köz tikmek; köz taşlamaq; közü toymaq; közüne türtmek (*микаму в очі, микаму носом*); közü tüşmek; coyul közümden; yum közüñni, aç közüñni (*не встигнеш і оком моргнути*); dört köznen baqmaq (beklemek); canım közüm; yaramay (yaman) közden saqlamaq; yahşı köznen baqmaq (*köçme*); köz yarığinen.

*S. Useinovniñ luğatından*

Köz körer, göñül ister.

Köz körer, can sever.

Köz qorqar, qol yapar.

Köz – qorqaq, qol – batır.

Köz – көrmek içün, aqıl – bilmek içün.

Közsüz yaşamaq mümkün, Vatansız yaşamaq – qıyın.

Köz toymaz көrmekten, qulaq – eşitmekten.

Köz toymay qursaq toymaz.

Közünü yumğan taş yutar.

Közüñ ağırsa, qoluñnı tıy, qursağıñ ağırsa – tamağıñnı.

Köz ne qadar uzaq körse de, aqıl ondan da uzaq köre. –

*Atalar sözleri*

## Ukrain frazeologizmleri ve onların qırımtar tiline tercimesi

*оком не моргнути* – közüni qımmamaq; *око набите* – közü alışqan; *очи не відведеи* – közüni ayıramazsıñ; *ока не заплющувати* – közüni yummmaq; *очей не зводитьи (від кого)* – (birinden) közüni almamaq; *очи відкриваються* – er şeyni körüp başladı; *очи горять вогнем* – közleri parıl-parıl parılday; *очи грають* – közleri cilveli (manalı-manalı) baqış-lar yara; *очи затуманилися сльозами* – közleri yaşlandı; *очи на лоба лізуть* – közleri (atılıp) çıqacaq (kibi ola); *очи на себе брати* – közge çarpmaq

*очи не висихають* – közyaş tökip oturmaq; *очи розбігаються* – közler qamaşa; *очи розгорілися* – (bir şeyge) köz etmek (pek istemek)

*очи так і прядуть* – közleri fırl-fırl aylana.

*S. Useinovniñ luğatından*

## Luğat

tıy = toqtat (*угамуй*)



## 19-NCI AFTA

### Köpeklerin  adetleri aqqında

*Karel  apek*

O, dođđanda, avu ta sıđđan, a laşıлмаған, bem-beyaz bir şey ik edi. L kin onı n eki qara qula ıđı, artında ise quyru ıđı olđanı i  n biz onı k pe ik kibi tanıdıq. Biz k  le ik qız ı  olđanını istedik ve onı n adını Da enka qoydıq.

Bug n sa a, Da enka, aytqanlarım, bu masal deđil, aqiqattır. Men bellesem, sen oqumı  k pe ik olmađa istey-si  ve meni diqqatnen di lersi .

 o ,  o  yuz, atta bi  yıllar evel k pek adamđa hizmet etmey edi. O zamanda adam     pek kiyik ve onı nen ya amaq qıyın edi. Onı  i  n k pekler s r nen ya ađanlar. Em, sıđınlar kibi, dađda deđil de, b   k-b     alanlarda ya ađanlar. O alanlarını   l yaki preriya, dep adlandırırlar. Mına ne i  n k pekler al  daa alanlarını seve ve  yle bir quvanıp  apqalaylar ki, tap qulaqları sekire.

S z sırası  unı da soramaq isteyim, Da enka. Sen bile-si mi, ne i  n k pekler yuqlamađa yatmazdan evel    kere aylanalar? Mesele  unda ki,   lde ya ađan k pekler    ne qıntavlı yataq yasamaq i  n y ksek otlarını biraz taptamaq kerek ediler. Olar endi  oqtan, sen yapqanı  kibi, yım aq qoltuqlarda yatsalar da, bu alı qanlı  olarda qaldı.

Ya k pekler gece ne i  n afırıp, biri-birinen qonu qa-nını bilesi mi? Ebet, bu kene ke mi nen bađlı. S r sini coymamaq i  n olar gecelernen   lde biri-birini tosata-tosata  ađıra ediler.

Ya k pekler er bir ta , k t k ya da direk yanında art ayađını k terip, ne i  n olarını suvarđanlarını bilesi mi?





Olar bunu ta preriyalarda yapa turğanlar. Çünki sürüniñ er bir köpegi qoqlanıp, añlay edi: ‘Ebe-e-et, mında doğmuşım keçti ve bu taştta öz imzasını qaldırdı’.

Ya köpekler kemikler ve ötmek kenarlarını ne içün topraqqa kömgenlerini bile-siñmi? Olar bunu biñ yıllar evel yapmağa başladılar. Aç qalğan künü çıkarıp aşamaq içün!

Köresiñmi, olar tap o zamanlarda pek aqıllı ediler!

Aysa, ne içün köpekler adamnen yaşamağa razı oldılar, dep soraysiñmi? Men saña aytayım. İşte, adamlar köpekler sürünen yaşağanını körip, olardan ünler aldılar. Em böyle adam sürüsü, ebet, küçlendi ve çoq ayvan avlamağa çareleri oldı, qursaqları toymağa başladı. Adamlar yaşağan yerniñ etrafında ise obalarnen kemikler qala edi. Bunu köpekler körip, öz-özüne ayttılar:

– Adamlar yaşağan yerde o qadar çoq kemik olıp da, özümüzge ayvan avlamağa nege kerek?

Bu vaqıttan başlap köpekler adamlar qayda barsa, peşinden yürmege başladılar. Ahır-soñu öyle oldı ki, köpekler ve adamlar beraber yaşamağa alıştırılar.

Endi köpek öz sürüsinde degil de, adam sürüsünde yaşay. Onen yaşağan adamlar onıñ sürüsü olıp qaldılar. Olarnı köpek öz doğmuşları kibi seve.

Mına böyle, işte. Endi ise bar, alançıqta çapqalap oyna – budır seniñ çölüñ.

*Venera Seydametovanıñ tercimesi*

## Luğat

adam sürüsü – *mında*: insan qabilesi

alan = orman tarlası

afırmaq = köpek dayın avuldamaq

direk – *стовп*

kütük – *пень*

qoltuq – *кресло*

qulaqları sekire – *вуха бовтаються*

qıntavlı = kelişkli, oñaytlı

kenar = çet

## Sual ve vazifeler:

1. Oquğan ikâyeñizniñ serleवासını ve müellifini aytıñız.
2. İkâyeni begendiñizmi? İkâye qolay oquldımı?
3. Müellifniñ subetdeşi kim? Böyle şekilde ikâye etilgen eserge alışqan ediñizmi?
4. Közüñiz ögünde nasıl levhalar canlandı?
5. Köpekler alanlarını sevgenleri aqqında ve mında quvanıp çapqalağanları aqqında parçanı tapıp oquñız.
6. Köpekler ne içün yuqlamağa yatmazdan evel üç kere aylanalar?
7. Köpekler geceleri afırıp, biri-birinen qoşuqanları aqqında abzatsını tapıp oquñız.
8. Köpekler kemik ve ötmek kenarlarını ne içün top-raqqa kömeler?
9. Köpekler ne içün adamnen yaşamağa razı oldılar?
10. Müellif 'laf etken' köpekniñ adı ne edi?
11. Köpeklerni angi sözlernen tariflemek mümkün? (sadıq, açuvlı, tüklü, ....., büyük, kiyik, ....., merametli)
12. K. Çapekniñ ikâyesiniñ hususiyeti nede?
  - a) müellif oquyıcığa muracaatnen buluna;
  - b) oquyıcı dialognı çetten közete;
  - c) ikâye 3-nci şahıs adından beyan etile.

13. İkâyenin esas gâyesini tayin etiniz:  
a) ikâye ayvanlarğa nisbeten sevgi aşlay;  
b) ikâye oquyıcıda ayvanlarğa meraq doğura;  
c) ikâye tek K. Çapekniñ kitaplarını oqumağa çağıra.
14. İkâye elbet de tam manada masal degildir. Oña daa nasıl demek mümkün aceba?  
a) ibretli ikâye; b) can sıqıcı masal;  
c) eglenceli ikâye.
15. Köpekler aqqında yañı bir şeyler öğrendiñizmi?
16. Begengen abzatsnı ikâye etmege azırlanıñız.

### İzaatlı luğatçıq

Preriyalar – Şimaliy Amerikada yuzlerce kilometrge uzanğan ösümlikli qulan çöller.

⇒ **1-iş.** Mürekkep cümlelerni tapıp, olarnıñ çeşitini tayin etiniz. Bağlayıcı olğanını belli etmek için sizge cümleler arasında olğan *dep, ki, da/de, -mı/-mi* kibi vastalar yardım eter. Bundan ğayrı, bağlayıcısız cümleleri de tapıñız.

Karel Çapek – XX asırnıñ eñ belli çeh yazıcısıdır. O, 1890 senesi yanvar 9-da Avstriya-Macaristandaki (şimdi Çeh cumhuriyeti) Male-Svatonovitse köyünde dünyağa keldi. Babası zavodda ekim olıp çalışa edi. Karel balalıqtan esnaflar ve çiftçiler arasında östi. Sağlığından sebep ordu hizmetine alınmağan edi. O, gazeta-da jurnalist ve tenqidçi olıp çalıştı. 1916 senesinden edebiy eserler yazıp başladı. Karel Çapek ikâyeler ve romanlar, masallar ve fantastik eserlerinen belli oldı. Onıñ sayesinde fantast yazıcıları öz eserlerinde ‘robot’ sözünü kullanmağa başladılar. Robot – adam şeklinde yapılğan maqamlıq.



K. Çapek öz vaxtında Avropanı boylap seyyahlar yaptı. Er bir seferdən öz oçerkleri içün yañı malumat ketirdi. O, edip ve jurnalist olmaqtan ğayrı, aveskâr fotograf olaraq da şüret qazanğan edi. K. Çapek taypınmaz antifaşist edi. O, pyesa ve romanlardan ğayrı, detektiv janrında istihzalı (*іронічні*) eserler de yazı edi.

‘Daşenka, ya da küçelekniñ ayatı’ – bir küçelekniñ ösip yetişkeni aqqında tesirli bir ikâye. Bu eserni belli çeh yazıcısı Karel Çapek 1933 senesi yazdı. Bu eser bir çoq ülkelde defalarca basılıp çıqqan edi. Eserde ‘tişlegen’, amma pek dülber olğan bir küçelek aqqında ikâye etile. Karel Çapek onıñ aqqında büyük sevgi ve mizahnen tarif ete. Eser adamlar ve köpekler arasındaki munasebetler aqqındadır.

‘Daşenka, ya da küçelekniñ ayatı’ kitabınıñ yañı neşirinde bir çoq resiml ve Karel Çapekniñ özü çıxarğan fotosuretlər berile. Fotosuretlərdə Daşenkanıñ özünü körmək mümkün.

⇒ **1-iş.** İnternet vastasinen fotosuretlərni tapmağa tırışıñız. Öz teessuratlarıñız ile şu cümleden nevbetteki işte paylaşısıñız.

⇒ **2-iş.** Oquğanıñızni mürekkep cümlelər vastasinen ikâye etiñiz. Buña *ve, ise, lâkin, da/de ve ki* bağlayıcılarını qullanısıñız. Şu vasıtalar tek cümlelərni degil, soydaş azalarını da bağlaybilgenini unutmañız.

### Sarf

#### Addaş sözlər (omonimlər)

Balalar, siz tilde **aytıluvi bir, manaları ise bam-başqa sözlər**ge endi rastkəlgəndirsiz, dep tüşünəməz. Em mında olar, çoqmanalı sözlərdən fərqlı olıp, biri-birinen iç bağda olmağanını birdən qayd eteyik. Meselâ,

**yaqmaq<sup>1</sup>** – 1) alevləndirmək, tutaştıрмаq. *Çöplükni yaqmaq.*

2) atəşnən qızdırmaq. *Sobanı yaqmaq.*

3) (içini) ışıqnən yarıq etmək. *Yarıq yaqmaq.*

4) *köçme* yoq etmək. *Ortalıqnı yaqmaq.*

ve

**yaqmaq<sup>2</sup>** – 1) yağlamaq, silmək. *Yağ yaqmaq.*

Şu sözlerniñ arasında manaca baĝ sezilmey. Olar bam-başqa mana taşıĝanı içün **addaş** sözler sayılır. Luĝatta olarnı ayrı sözler kibi bereler. Em anda o addaş sözlerni (omonimlerni) üstteki raqamlar yardımınen tapmaq ve ayırmaq mümkün olğanını körıp qalĝandırsız?.. Bundan ĝayrı, *yapmaq*<sup>1</sup> sözü özü daa çoqmanalı olğanını da köresiz.

⇒ **3-iş.** Berilgen ibarelerniñ çoqusı turĝun sayıla. (Buniñ ne olĝanını siz yaqında olacaq derslerde öĝrenirsiz.) Siz olarda qayd etilgen sözler çoqmanalı ya da addaş olğanını tayin etmek kereksiñiz.

1. *Baş yazısın(ı) köz körer.* 2. *Eyilikke kemlik yapma.*
3. *İşiñiz oñ kelsin!* 4. *Aqlı kese.* 5. *Yapraqlar içine ketti.*
6. *Bilgenim qadar ayttım.*

### Ev işi

Siz begengen ev vazifesini saylañız.

1. K. Çapekniñ ‘Köpeklerniñ adetleri aqqında’ eserini ikâye etiñiz.
2. Müellifniñ diger eserlerinen tanış olıp, mundericesini ana tilimizde beyan etiñiz.
3. S. Üseinovniñ luĝatlarından faydalanıp, o, s ve t ariflerine bir qaç addaş sözni tapıp, manasını anıqlañız. Olarĝa misaller tapıñız (ya da özüñiz cümleler tertip etiñiz).
4. Addaş sözler luĝatından bir qaç addaş sözni yazıp alıñız. Olar ile cümleler tiziñiz.

### Qoşma metin

#### Çal atımnıñ tuyaĝı... (Çoqça söz bileyik)

Aqşam çay içip turĝanda, kiçkenemiz Marlen dördünci sınıf talebesi ‘Qırımtatar folklorı’ kitabındaki tapmacalarınñ episini bilgeninen maqtandı.

– Bir kiçkene alaşa, toqtamay çalışa,– degenini tap olmasa, dedim men.





- Fi-i, kim bilmey onı? Saat! – dedi Marlen.
- Ya alaşa degeni ne? – dedim men. Bala omuz qıstı.
- Alaşa dep atqa aytalar,– dedi bitası...

Bizim şimdiki yaşayışımızda at iç bir türlü rol oynamay desek, belki yañılmamız. Yüklerni şimdi maşnalar taşıy. Atnı biz çoqusı kinoda ve kimerde bir qomşu alanlarında köremiz. Lâkin daa çoq uzaq olmağan keçmişte at, tuvar, qoy, ečki, azbar quşları halqlarnıñ kündelik yaşayışında müim rol oynayanlar. Şunıñ içün ev ayvanlarına olarnıñ yaşı, çalışuvı, tüşü, tabiatına köre çaşıt adlar qoyulğan. Bu soy sözler til baylıgımıznıñ ayrılmaz qısmı olıp qalğan. Biz o sözlerni er kün eşite ve kullanamız. Lâkin tilimizni yahşı bilgen adamlar da kimerde özleri añlamağan sözlerge rastkeleler. Er bir adam tabiiy olaraq, özü yahşı bilmegen sözni laqırdıda kullanmaqтан qaçına. Bu ise til leksikasınıñ zügürtleşmesine alıp kele. Bunıñ aldını almaq içün er bir adam, öz ana tilinde sözlenir eken, özüniñ til baylıgını turmadan arttıрмаğa ve laqırdı medeniyetini yükseltmege intılmalı.

*Kemal Qoñuratlıdan*

#### 1. Atlarnı yaşı ve cinsına köre ayırdı etken sözler

**Aygır** – erkek at.

**Baytal** – ırğaçı at.

**Tay** – atnıñ balası.

**Qunan tay** – eki-üç yaşlarında tay.

**Dönen tay** – üç-dört yaşlarında tay.

**Düldül** – efsaneviy, tılsımlı və qanatlı at.

**Cüyruk** – qoşu çapmaq üçün at.

**Tülpar** – cenk üçün ögretilgen at.

**Yılqı** – çölde otlap yürgen atlar.

## 2. At yürüşlərini ayırdı etken sözlər

**Yorğa** – atnıñ orta tezlikte, silkinmeden çapuvına aytıla ki, bunda at başta eki sağ ayağını, sonra eki sol ayağını ileri avuştıra. (*Иноходу*)

**Pertav** – atnıñ biraz sekiriklep, orta tezlikte çapuvına aytıla ki, bunda at başta ögdeki sol və arttaki sağ ayağını ileri avuştıra. (*Рисую*)

**Eşkin** – atnıñ başta eki ög ayağını, son eki art ayağını ileri atıp çapuvı (*галопом*).

**Dörtнал** – atnıñ eñ tez çapuvı (*кар'ер*). Böyle atqa **yelgir at** deyler. 'Dörtнал qoşmaq', 'turğan yerinden dörtнал' ibareleri bar.

**Yortuv** – atnıñ aşiqmayıp, öz erkine çapuvı (*нидтлюцем*).

## 3. Atlarnı çeşit hususiyetlerine köre ayırdı etken sözlər

**Minek at** – minip yürmege ögretilgen və hizmet etken at (*верховий кінь*)

**Araba atı** – arabağa yekip yürmege qullanılğan at (*упряжний кінь*)

**Tüp at** – üç atlı arabağa ortadan yekilgen at (*корінний кінь*)

**Yandavur at, meçev at** – üç atlı arabadan eki çetke yekilgen atlar (*притяжні коні*).

**İgdiş ata** – ağır yü taşığan mahus at (*ломовий кінь*).

**Soy at** – belli bir hususiyeti – çapqırlığı, kevde tüzülüşinen farqı olğan at (*породистий кінь*).

**Cınıs at** – soy temizliginden ötrü nesil üçün asralğan at (*племянний кінь*).

**Yuvaş at** – insağa boysunğan, ögretilmesi qolay olğan at (*смиренний кінь*).

**Qayt at** – qamçı urğanda art-artına ketken at (*артачливий кінь*).

**Quypa at, quylu at** – osal tabiatlı, tepen, tişlegen ya da yer-ge yatıp yürmege istemegen at (*норовистый кінь*).

**Tentek at** – beklenilmegen areketler yapqan at.

**Arnav at** – tez yorulğan at. Taqatsız insan içün de ‘arnav’ sözü qullanıla.

**Çaman at** – tenbel at (*шкана*).

**Ayqılğan at** – (*кінь, що задихається*).

**Çalıq at** – ep ileri intilğan, tırışqan at (*моторошний кінь*).

**Ürkek at** – tez ürkken, qorqaq at.

**Qırçanğı at** – qoturlı at (*шелудивий кінь*).

#### 4. At түslerini ayırğan sözler

**Ciyren** – qızıl-sarı tüslü at.

**Semen** – ciyren atnıñ yalın ve quyuqları qara soyu.

**Qır** – çalarğan saç tüsünde at.

**Çal** – qır tüslü atnıñ yalın ve quyuqları çalarğan soyu.

**Boz** – topraq tüsünde at.

**Qoñur** – qaverenki at.

**Qumral** – açıq qaverenki tüslü at (*русий*).

**Ker** – qoyu qaverenki at (*карий*).

**Çeper** – aq atnıñ kirpikleri bile beyaz soyu.

**Çubar** – çeşit tüste ufaq lekeleri olğan at.

**Alaca** – çubar atnıñ iri lekeleri olğan soyu (*пегий*).

**Çil** – sarı lekeleri olğan aq at.

**Toru** – qızılğa yaqın tüslü, yalın ve quyuğı qara at (*гнідий*).

**Bulan** – açıq sarı tüste, yalın ve quyuğı qara at.

**Qula** – ayaqları sarı at.

**Sekil** – ayaqları beyaz at.

**Yağız** – qoyu qara tüslü at (*вороний*).

**Qaşqa** – mañlayında aq lekesi olğan at ve şu lekeniñ özü.

#### 5. Eger taqımı qısımları

**Eger** – atnı minip yürmek içün sırtına qoyulğan mahsus oturğıç.

**Qabdal** – eger tübüne töşelgen yımşaq kiyiz.

**Üzengi** – egerniñ eki yanına qayışnen asılğan ve atlığa ayaqlarını tirep oturmağa hızmet etken toğalar (*стремена, стрем'я*).

**Yügen** – atnıñ başına kiysetilgen qayış taqımı (*вудечка*).

**Kömüldirik** – at taqımınıñ kökreğ qayışı (*нагрудный ремень*).

**Tikiç** – atlınıñ ayaqqap ökçelerine pekitilgen demir tekerçikler. O, atnı turtıp, onıñ yürüşini tezletmege hizmet ete (*шпоры*).

## 6. Mevzuğa ait çeşit sözler

**Atlanmaq** – at üstüne minmek.

**Atlandırmaq** – at minmege yardım etmek.

**At oynatmaq** – at üstünde yigitlik satmaq (*гарцуювати*).

**Atnı tuvarmaq** – arabağa yekilgen atnı boş qaldırmaq (*розпрягати*).

**At oğlanı** – atnı egerlep minmek içün ketirgen hızmetçi.

**Atbaqar** – arandaki atlarını baqqan adam. Atnı çölde baqqan adamğa yılqıcı denile.

**Atçı** – köy hocalığında atnı qaçırmaqnen oğraşqan adam.

**Atçapar** – qoşu çapıcı adam (*жокей*).

**Kişnemek** – atnıñ seslenüv usulı (*іржати*).

**Tebinlemek** – ög ayaqlarınen yerge tepip ve qar eşip otlatmaq.

**Aran** – atlar yatağı (*стайня*).

**Malat** – ufaq doğrılıp, atqa berilgen piçen.

**Yaydaq** – egerlenmegen, egersiz at.

**Ulav** – at ve araba (*відвода*).

**Sağrı** – atnıñ qıç ayaqları üstündeki sırtı (*крыл*). Atnı yaydaq sağrısına oturalar, çünü o yer yımşaq ola.

**Baytar, baydar** – atlarını tedaviy etken otaçı (*коновал*).

**Qımız** – biye sütünden azırlanılğan içimlik (*кумис*).

## Luğat

züğürtleşmesine = faqırlaşmasına

turmadan = toqtamadan

ıntılmalı = tırışmalı



## 20-NCİ AFTA

### Addaşlar (devamı)

Aytilğanda (telâffuz etkende) biri-birine oşay, lâkin yazılıvı başqaca, em de manaları ayrı olğan sözlerge **sesdeş** derler, meselâ: ad /d~t/ – at /t/; kök (renk) – kok (aşçı).

Tek bir şekilde aynı aytilıp ve yazılıp, manası ayrı olğan sözlerge **şekildeş** derler: yaz (yıl mevsimi) – yaz (*yazmaq* sözünüñ emir meyli); ötmek (aşlıq) – ötmek (keçmek) – ötmek (yırlamaq). Türlü söz çeşitlerine ait olğanı içün, olarnı tayin etmek qolay ola.

Bir şekilde yazılıp, aytiluvı farq etken, manası bam-başqa sözlerge **arifdeş** derler: sarmá – sárma; kör (soqur) /k-or/ – kör (körmek) /kor-/; kir (\*kirli) /k-ir/ – kir (kirmek) /kır/.

⇒ **1-iş.** Berilgen çiftlerniñ soñunda yañğıravuş seslerni bildirgen arifler ne vaqıt yazılğanını anıqlañız.

Qayd – qayt, sed (=mania) /d~t/ – set, ald (=ög) /d~t/ – alt (=ast, tüp).

### Manadaş sözler (sinonimler)

Bam-başqa yazılğan, manaları ise bir olğan sözlerge **manadaş** deyler. Ekseriyette olar şu umumiy mananıñ türlü yanlarını tamamlap, öz renkini qoşa. Böyle vastalar yardımınen biz olarnı nutuqta üslúbine köre qullana ya da çeşit duyğularımıznı ifadeley bilemiz. Meselâ, *ürmet* – *sayğ*ı çifti duyğu tarafından farq eter (ekincisi manasını yükselte); *yıl* – *sene* ise üslüp ceetinden farq ete (5 yıl keçti, *lâkin* 2022 senesi). Böyle etip siz, bazı manadaş sözler tam aynı bir mana bildirebilgenini añlağandırız. Meselâ, *bet* – *yüz*, *el* – *qol* çiftleri tek tilge kelüvinen farq ete. (Siz tilimiz eki esas şiveniñ birleşüvinden asıl olğanını eşitkendirsiz.). Bu, manadaş sözlerniñ peyda oluv yollarından biridir. Yani bir de bir şiveden edebiy tilge keçip manadaş sözler peyda ola, meselâ: *tüyme* – *dögme*, *dalğa* – *tolqun*, *öz* – *kendi*, *taqdir* – *taliy*, *baş* – *qafa*, *aytmaq* – *söylemek* ve il. Olarnıñ farqı esasen keñce ya da tarca qullanuvdan tayin etilir. Meselâ, bir söz bitaraf sayılıp, laqırdınıñ çoqusı şartlarğa riayet etip qullanılır. Bu, aytmaq, dalğa, baş, taqdir sözlerine aittir. Diger sözler ise añlam ya da





daa tar (qaysı bir bediyy sımalarda) munasebetlerde rastkelir. Demek, olarnıñullanuv saası sınırlıdır. Bu, *qafa* (istila), *taliy*, *tolqun* (bediyy eserlerde), *kendi* (laqırdıda) sözlerine aittir.

Lâkin diger allarda sözlerniñ manaca farqlılıqlarını daa açıq sezmek mümkün. Meselâ, *tez* (bitaraf) – *acele* (resmiy) – *çabik* (laqırdı) – *vızlı* (kitabiy, yazma) – *süratlı* (ilmiy) sözleri manadaşlarınıñ sırasını teşkil ete. Olar biri-birinden hususiy renk qoşqaninen farq ete (şu renkler yanlarında qavuzlar içinde berilgen). Siz şu renklerni ket-kete qırımtatar tilinde bediyy ve diger edebiyatnı oquğaninen seze bilirsiz. Şimdi ise luğattan faydalanıp, belli bir neticeler çıqara bilesiz.

### Üslübiyet aqqında kirış malümat

Böyleliknen, yuqarıdaki mevzuda siz daa üslüp ne ve qaysı üslüpler bar olğaninen de tanış oldıñız. Bunı terence siz keççe öğrenirsiz. Mında ise biz sizge aslında er angi metinniñ türlü maqsat ve vazifeleri bar, dep aytıp keçmelimiz. Şu talaplarğa köre de metinge sözler saylanılır. Demek, er bir üslüpnıñ özüne has çizgisi olup, şuña köre metinni tayin etmege yardım ete.

Meselâ, laqırdıda biz *laqırdı* üslubinden faydalanamız. Siz buña dialoglar tizgende ya da oquğanda (laqırdı üslubiniñ *yazma* şekli) ya da özara laqırdı etkende ya da qonuşqanda (laqırdı üslubiniñ *ağzaviy* şekli) rastkelesiz.

Nazariy malümatnen tanış olğanda yoqsa diger fen dersliklerini oquğanda, biz *ilmiy* üslüpte yazılğan metinlerni oquymız. Anda sıq *istilalar* rastkelir.

Resmiy vesiqalar (ariza, ilân, yarlıq, şeadetnameler) *resmiy* üslüpke riayet etip yazılır.

Bediyy eser *bediyy* üslüpnıñ çizgilerine has olur. Yazılğan eser ve filmler şu üslüpte yaratılır.

Kütleviy haber vastaları *publitsistik* üslüpte çalışır. Olar cemaat içün haber yetkize. Şu üslüpnıñ çizgilerini siz teleyayınlardan, radio ve medi-aresurslardan seze bilesiz.

Diniy kitaplar ve malümat *diniy* üslüpte yazıla. Mında dinimizge has añlamlar, Quran ve diger muqaddes kitaplardan söz ve ibareler, ekseriyette arap tilinden alınmalar rastkelir.

Laqırdı üslubinden ğayrı, üslüplerniñ episi *kitabiy* sayılır.

Üslübiy hususiyetlerni tilniñ ayrı bir bölügi – *üslübiyet* öğrene.

## Luğat

üslup – *стиль*  
laqırdı – *розмовний*  
resmiy – *офіційно-діловий*  
publitsistik – *публіцистичний*  
diniy – *релігійний*  
kitabiy – *книжний*  
yazma – *письмовий*  
ilmiy – *науковий*  
bitaraf – *нейтральний*  
istila – *термін*  
sıma – *образ*  
kütleliy haber vastaları – *засоби масової інформації*  
teleyayın – *телепередача*  
alınma – *запозичення*  
ilân – *об'ява*  
ariza – *заява*  
şeadetname – *свідомство*  
yarlıq – *грамота*  
muqaddes – *священний*  
vesiqə – *документ*  
alınma – *запозичення*  
nazariy – *теоретичний*

*Balalar, aşağıdaki işler 2000 senesi Aqmescitte belli ocalarımıznıñ müellifliginde çıqqan ‘Eglenceli grammatika’ kitabı esasında tertip etilgen. Onı kütüphaneden alıp, qoşma olaraq daa bir qaçını becere bilesiz. Siz kitapnı begenirsiz!*

⇒ **2-ış.** Qavuzlar içindeki manadaş sözlerden kelişken soyunı sözlerge qoşıp oquñız.

1. Alim, göl (üşüdi, buzladı).
2. (Yürek, qalp) hastalığı.
3. Qoqu burnuma (urdı, kötekledi).



4. Yekün, netice (çekmek, çıxarmaq).

5. Beden, kevde(si) (terbiyesi, terek).

⇒ **3-iş. Sözləri biri-birine kəşitiriniz.**

1) türkü	para	2) işləmək	yorulmaq
aqça	şavle	boldurmaq	qaytarmaq
nur	ses	tekrarlamaq	çalışmaq
davuş	yır		

⇒ **4-iş. Manadaş sözlərinin sırasında nutqumuzda sıq qullanğan sözləri belgileñiz.**

Bet – yüz – çere; güzel – dülber – şırnıqlı; ayat – ömür – yaşayış; büyük – balaban – qocaman; ürmetli – sayğılı – mühterem.

⇒ **5-iş. Sözlər taqımlarında birer artqaç söz bar. Onı tapıñız.**

1. Bitə, qartana, tize.
2. Beyaz, qızıl, aq.
3. Üşümək, aşamaq, buzlamaq.
4. Teren, ufaq, küçük.
5. Ürmet, aqıl, sayğılı.

### Ev işi

1. Addaş sözlər luğatından sesdeş, arifdeş və şəkildeşləri tapıñız. Manalarını anıqlañız.
2. Manadaş sözlər luğatından bir qaç sırasını yazıp alıp, onların farqını anıqlamağa tırışıñız. Buña sizge S. Useinovnıñ luğatları yardım ete bile.
3. 'Eglenceli grammatika'da berilgen, keçken mevzulardan bağı kross-vordları çəzmege tırışıñız.
4. 2008 s. R. Fazıl, Ş. Selim tarafından tertip etilgen 'Ey, ana til! Ey, tuvğan til!..' cıyıntığınan tanış oluñız. Halqara ana tili künü arfesinde bir qaç şiir oqup, eñ begengeniniñni ifadeli oqumağa ya da ezberlemege azırlanıñız. Bunı er yıl adet etiñiz.

**İbretli ve ikmetli ikâyeçikler**  
(iran halq ağız edebiyatından)

*Zedla Aksakov tərəfindən azırlanılğan*

**Til –göñül**

Bir kün bir zengin adam hızmetskârına:

– Bugün maña eñ şırın ve lezetli bir aş pişir ki, lezeti tamağımda qalsın,— degen.

Hızmetskârı oña, tilden güzel bir aş yapqan. Saibi begengen, aferin saña degen. Aradan bir qaç kün keçken soñ, saibi:

– Bugün sen maña öyle bir aş yap ki, accısı ağzımnı yaqsın,— degen.

Hızmetskârı kene tilden soğanlap, sarımsaqlap, biberlep öyle bir aş yapqan ki, lezetini baqqanda közlerinden yaş kelgen. ‘Men bellesem, efendim bunu begenir’ degen öz-özünə.

Saibi yemekni yegen soñ, hızmetskârını çağırıp şöyle degen:





– O bir kere men saña ‘öyle bir aş yap ki, lezeti ağzımda qalsın’, degen edim. Sen maña tilden aş pişirdiñ. Bu kere ise ‘öyle bir aş yap ki, accısı ağzımnı yaqsın’, dedim. Sen eki keresinde de aşnı tilden pişirdiñ. Ne sebepten böyle yaptıñ?

– Ürmetli cenab-ı ağa, birinci kere pişirgenimni begendiñiz, aferin dediñiz. Buña binaen ve emiriñizge köre, ikinci sefer ağız yaqacaq kibi accı etip pişirdim. Neçün er ekisini de tilden yaptım? – Çünki til öyle bir şey ki, tatlı aytsañ dadı em tañlayda, em gönülde qala. Accı, biberli etip aytsañ, yalñız ağzıñıznı degil, içiñni-bağrıñnı da yaqar. Onıñ içün, efendim, men tilden eki türlü aş pişirdim. Yañıldım ise, baş etip afu isterim.

Tiliñnen gönölüñni incelep aqtar,  
Olur er gönülde güzel anahtar.

Til ketirir saña yüksek şan-şeref,  
Sanki mamür mahsul bergen bir terek.

Amma onı bilip bek tutmaq kerek,  
Incınmasın saña sadıq bir yürek.

- ‘Adamnı küldürgen de, küydürgen de tildir’ atalar sözünüñ manasını, oqulğan metin yardımınen açıqlaңыз.



## 21-NCİ AFTA

### Ana tilim

*Refat Çaylaq*

Vatanımda ana tilim doğdı, östi, güllədi.  
Bu topraqdan quvet alıp, gönceleđi, gürlədi.

Bu topraqta tamır attı, pıtaqlandı, dallandı,  
Bu topraqta eybetlendi, şekerlendi, ballandı.

Bu topraqta dalğalandı, bu topraqta beslendi,  
Bu topraqta silâlandı, bu topraqta süsləndi.

Bu topraqdan sürgün oldı, qayıt keldi ğayrıdan.  
Bu topraqta azap çekip, öle azap, qayğıdan.

‘İmdat, imdat, imdat!’ diye gece-kündüz ağlay o,  
Bu topraqta köz ögümde başqa tilge döne o.

Ana tilim, baba tilim, yoq men seni öldürtmem,  
Men tilimni bu topraqdan iç bir vaqıt sildirtmem!



## Luğat

azap = ah, eziyet  
beslenmek – ғыда (aşayt) almaq  
göncelenmek = göncesi olmaq  
güllemek = çeçek açmaq  
gürlemek – sesi çıqmaq, yañğıramaq  
dalğalanmaq = *mında*: yerden ösip çıqmaq  
dallanmaq = pıtağı çıqmaq  
dönmek = aylanmaq, çevirilmek  
öldürtmemek = öldürmege bermemek  
imdat = yardım  
diye = dep  
qayğı = qaar, ғam, qasevet  
quvet = küç  
pıtaqlanmaq = dallanmaq  
sildirtmemek = silmege bermemek  
silâlanmaq = silâ tapmaq  
süslenmek = yaraşmaq  
tamır atmaq = tamırlaşmaq

## Sual ve vazifeler:

1. Şiirni ifadeli oquñız. Şair oquyıcıların nasıl duyğularınen bölüşe?
2. Şiirdeki qaysı sözlerniñ manası añlaşılmađı?
3. Mezkür şiirni eki qısımğa bölmek mümkün. Birinci qısımda tilniñ inkişafı aqqında ikâye etile. Bu qısımnı tapıp oquñız.
4. Ekinzi qısımda ana tilimiz tüşkün alda olğanı, mıtlaqa işke kirişip, onı saqlamaq kerekligi aqqında ayıla. Bu qısımnı tapıp oquñız.
5. Şiirniñ esas mevzusu ne? (Adet üzre, şiirniñ mevzusu onıñ serlevasında akis oluna.)





6. Qırımtatar tilini qorçalamaq kerek, degen müellifniñ fikrinen razısız mı?

7. Şiirni daa bir kere oquñız. Müellif qaysı söz çeşitiniñ sözlerini sıqça işlete? Qaysı söz çeşitlerini müellif iç de qullanmağan?

8. Bir çeşit sözlerden başlanğan satırlarnı oquñız. Edebiyatta böyle adisege ne derler?

9. Ana tili aqqında ikmetli ibarelerni oquñız. Qaysı birini begendiñiz? Onıñ manasını añlatıñız.

‘Ana tili – bu ecdatlarımız bizge qaldırğan hazine’

‘Ana tili – bu balalıqta, mahsus öğretilmeyip, memnimselgen til’.

10. Şiirni ezberleñiz.

### Qarama-qarşı manalı sözler (antonimler)

Qarama-qarşı mana bildirgen sözlerge **qarama-qarşı manalı** (antonimler) deyler. Olar bir mevzuğa ve bir söz çeşitine ait olmalı. Meselâ, *cesür* ve *qorqaq* sözleri sıfat olıp, insan ya da diger bir mahlûqnıñ tabiatını (demek, bir mevzunı) añlata.

Bu çiftler bir qaç yolnen teşkil olunır:

- **tilimizniñ temeli** sayılğan qarama-qarşı manalı sözler vastasinen: yahşı – yaramay, sıcaq – suvuq, uzun – qısqa, qıyın – qolay, ağır – yengil;

- **umumiyy bir mana etrafında** qarşılıq bildirip. Şu mana olarnıñ **merkezi** olur. Meselâ, *yüksək* ve *aлчаq* sözler içün *orta* sözü merkez sayılır;

- **alınmalar** vastasinen: para – aqça, musbet – menfiy, fayda – zarar, yengil – zor, müşkül;

- qarama-qarşı mana bildirgen **yalğamalar** ya da **yardımcı sözler** qullanıp: aqıl/ı – aqılsız, bağlayıcı/ı – bağlayıcısız; tolu – tolu *olmağan*; faydalı – zararlı.

⇒ 1-iş. Aşağıda berilgen şiirde ise tek oña has qarşı manalı sözler rastkele. Serbest nutuqta ise olar qarşılıq bildirmez. Olarnı tapıñız.

## Ana tili

*Naciye Ametova*

Qırım tili – bizim til,  
Ögren onı, teren bil!  
Yolda, evde ep söyle,  
Ğururlanıp, eybetle.  
Asırlar devamında,  
Laf etkenler bu tilde:  
Qartana-qartbabamız,  
Em de ana-babamız.  
Şairler yazğan şiir,  
Bestekârlar – dülber yır.

### Ev işi

1. R. Çaylaqnıñ ‘Ana tilim’ şiirinde ve onıñ luğatında rastkelgen mana-daş sözlerni teñeştiriñiz. Siziñ fikriñizce, müellif nege olarnı qullana?
2. ‘Ana tili – bu ...’ ibaresini öz sözleriñiznen devam etiñiz. Soñ metin yazıñız.
3. N. Ametovaniñ ‘Ana tili’ şiirini ezberleñiz.
4. Qarama-qarşı manalı sözler luğatından 5 türlü çift yazıp alıñız. Şu sözlernen cümle tiziñiz.
5. Qoşma malûmattan (derslik, qullanmalardan) şu mevzuğa ait iş ve vazifelerni beceriñiz.

## Yigirmi birinci fevral – Halqara ana tili künü

Biz qırımtatarmız, bizni Allah qırımtatar etip yarattı ve biz qırımtatar tilinde qonuşamız. Bizim tuvğan tilimiz – qırımtatar tili. Seniñ qomşuñ Mıkola ise ukraindir, Allah onı ukrain etip yarattı ve o, tuvğan ukrain tilinde qonuşa. Allah çeşit-türlü halqlarnı yaratqan ve er bir halqqa öz tuvğan tilini de bergen.

İnsanlar başqa tilini öğrenip, öz ana tilini unutsalar, böyle etip öz halqına zarar ketireler.

Dünyada yedi biñ qadar til bar, amma yazıq ki eki afta içinde bir til ğayıp ola.

Qırımtatar tili – eñ qadimiy tillerden biridir.

Ana tili – Allahnıñ bizge bergen nimetidir. Ana tilimiz pek zengin, çünki o, üç esas şivege esaslana.

İnşalla, evel zamanlarda kibi, qırımtatar tilimiz asırlar devamında yaşar.

- Berilgen metinni diktant şeklinde yazıñız.





## 22-NCİ AFTA

### Öz tilini bilsin er kes

*Seyran Üseinov*


Tuvğan tilni candan seve  
Er bir insan balası.  
Bu sevgini oña aşlay  
Anasinen babası.

Tildir bizni birleştiren,  
Bizlerni adam etken.  
Dertleşmege imkân bergen,  
Yoq bir şey tilge yetken.

Dünya malı fayda bermez  
Bir millet ilsiz olsa.  
Biñ peşman da hayır etmez,  
Balalar tilsiz qalsa.

Yeter endi, keldi vaqtı,  
İhmallıqtan qaçayıq.  
Halqımıznıñ qartı-yaşı  
Kitaplarını açayıq.

Öz tilini bilsin er kes,  
Maqsadına irişsin.  
Öz tilinde yengil, serbest  
Bülbül kibi laf etsin.



## Luğat

birleştirmek = bir etmək

dertleşmek = derdini aytmaq

ilsiz = yurtsız, vatansız

imkân bermek = imkân yaratmaq, mümkün etmək

peşman – *каяття*

serbest = ür, azat olğan

hayır etmez ~ yardım etmez

ehmallıqtan – *нехтуючи*

## Sual ve vazifeler:

1. Şiirni ifadeli oquñız.
2. Şiirniñ esas mevzusını tayin etiñiz.
3. Şiirniñ esas fikri neni ifadeley?
  - a) insan öz ana tilini öğrenmek, ana tilinde kitaplar oqumaq gerek, tuvğan tilini sevmek, ana tilinde serbest laf etmek gerek.
  - b) er bir til acayıptır. Adamlar dünyanen qonuşqanda imkân açqan bu vastağa quvanmaq gerekler.
4. ‘Biñ peşman da hayır etmez’ ibaresini nasıl añlıysız?
5. Nasıl yañı sözler, ibareler aqlıñızda qaldı?
6. Manadaş sözlerniñ sırasını oquñız ve aqlıñızda qaldırıñız: *adam – insan – kişi; laf etmek – laqırdı etmek*.

Qarşı manalılarınñ çiftini oquñız ve aqlıñızda qaldırıñız: *yengil – ağır, qıyın*.  
Manadaş ve qarşı manalı sözler nutqumızda nasıl yer ala?
7. Ana tili aqqında ikmetli ibarelerni oquñız. Olardan qaysını ziyade begendiñiz?

‘Ana tili – bu bir de bir millet vekilleri özara laf etken til’.  
‘Ana tili – bu halqıñ maneviy küçü’.

Bir daa tüşünip, ‘Ana tili – bu ...’ ibaresini öz sözleriñiz-nen devam etiñiz.

8. Şiirni ifadeli oquñız, ezberleñiz.

## PEKİTÜV

Er tilniñ bar özcesine  
Güzelligi, tuvğan ili.  
Qırım yarımadasınday  
Dülber qırımtatar tili.

(R. Fazıl)

⇒ **1-iş.** Manadaş sözlerni oquñız. Olarnıñ farq etici çizgisi aqqında fikir yürsetiñiz. Bunı nutuqta qullanılğanına köre misaller ketire-rek tayin etmege tırışıñız. Tertip etken bazı cümleleriñizni yazıñız.

### Nümüne:

Tüs – renk; yürek – qalp; tayaq – sopa; taqdir – taliy; tatlı – şırın; işlemek – çalışmaq; beñzemek – oşamaq; boldurmaq – yorulmaq; öz – kendi; ne vaqıt – qaçan – ne zaman; birden – apansızdan; daima – er vaqıt; qırmısqa – qarınca; baraq – köpek – it; deva – ilâc – derman; kişi – adam – insan; orman – dağ – tav; çeber – usta; peşkir – yüzbez; türkü – yır; kürsü – oturğıç; qona – masa; qol – el; qoranta – aile; nur – şavle; qardaşım – kadâm; ayat – ömür – yaşayış; balaban – büyük; çeşit – türlü; ötelər – yırlaylar; bahşış – ediye; alev – ateş; qara – siya; al – qırmızı; کنار – çet; üşümek – buzlamaq; sayğı – ürmet; yenge – duduk; bita – qartana; ses – davuş; arzu – istek; ömür – ayat; qaar – qasevet; qadın – apay; çamur – balçıq; sene – yıl; baş – qafa; diger – başqa; tekâran – azaçıq; açtı – qapattı.

⇒ **2-iş.** Qarşı manalı sözlerniñullanuvına söz birikmeleri degil, cümleler yardımınen misal ketiriñiz.

Beyaz – qara; tar – keñ; ağır – yengil; yahşı – yaman; siyrek – sıq; toq – aç; arıq – semiz; bayat – taze; erte – keç;



balaban – kiçkene; qattı – yımşaq; sağlam – hasta; aqıl-  
lı – aqılsız; sıcaq – suvuq; yarıq – qaranlıq; yüksek – alçaq;  
qış – yaz; oğlan – qız; şeer – köy; dert – derman; dost – duş-  
man; qaraman – qorqaq; zarar – fayda; qartana – qartbaba;  
saba – aqşam; kündüz – gece; yaşlıq – qartlıq; cenk – ba-  
rışıq; uzun – qısqı; tenbel – işkir; oğlan – qız; bermek –  
almaq; külmek – ağlamaq; üst – iç; batır – qorqaq; kel-  
mek – ketmek; tuzlu – tuzsuz; dülber – çirkin; davuş – ses;  
faydalı – faydasız; faydalı – zararlı; hatırlamaq – unutmmaq;  
edepi – edepsiz; yuvaş – atik; yañğıravuş – sağır; az – çoq;  
artında – ögünde; bar – yoq; başı – soñu; qadimiy – zeman-  
viy; quru – sılaq; külmek – ağlamaq; maqtamaq – sögmek;  
oturmaq – turmaq; turmaq – yatmaq; temiz – kirli; uzaq –  
yaqın; adiy – mürekkep; anda – mında; az – çoq; aqiqat –  
yalan; yaş – qart; yaşlıq – qartlıq; yañı – eski; ince – qalın;  
içeri – tışarı; kök – yer; qurmaq – bozmaq; toq – aç; eyilik –  
kemlik; yazlıq – qışlıq; kirdi – çıqtı.

⇒ **3-iş.** Addaş sözlerniñ mana ceetinden farqını cümlede qullana-  
raq kösteriñiz.

Bağ, sağ, kâmil, çal, top, Saniye, yaş, ava, bet, çekmek,  
çalmaq, saz.


⇒ **4-iş.** Addaş sözlerniñ çeşitini tayin etiñiz.

Yahşı – yāhşı, qattı (qatmaq) – qattı, iç (içmek) – iç, tuz –  
tüs, bar (barmaq) – bar, al (almaq) – al, qız (qızmaq) – qız,  
baqa – baqa, qoy (qoymaq) – qoy, çıq (çıqmaq) – çıq, tış –  
tiş, түş (tüşmek) – түş.



### İsa Abduraman – 85 yaşında!

İsa Abduraman – qırımtatar edebiyatının ustazlarından biridir. Onın eserləri teren manalı, təmsil və ümütnen tolu. Misal üçün ‘Baar’ [onın cıyıntığı] ayrı bir mananı təmsil ete. Birinciden o, ağır qışnı yeñe. Baar degende, müellif öz halqını da köz ögüne ala edi. İsa Abduraman özü də baarde doğdı. Onın baarnen bağılı çox şeyi yazılğan. ‘Baarni seve men, elbet, – dey o. – Asıldır... bir kitab çıxaracaq olsam, nenendir oquyıcını ayretlendirmeye tırışam’.



İsa Abduraman doğma Kezlevlidir. 7 yaşlı bala olğanda qorantasinen sürgün etilgen. Şiirlərni ta mektep çağında yazmağa başlağan. İlk şiirini gazetada 1961 senesi bastırğan edi. Soñra o, gazetañın daimiy müellifi olğan. Onın qalemi izinden bir çox nesir eserləri çıqqan. Bu, şaqalı ikâyeler, povest ve maqalelerdir. 1979 senesi İsa Abduraman Yazıcılar birliğine kirgen, nam qazanğan jurnalist olğan. 1997 senesi Qırımğa avdet olğan soñ, daa küçlü eserler yaratqan. O, onlarnen cıyıntıqnıñ müellifi, alâ yazmaqtaadır. ‘Ğurbetim ana-Vatan olmadı, çünki meni bekley edi Yeşil ada – Qırımım! ğurur, şanı, sevinç, qayğım, keçmişim ve yarınım! Atta taşnı, qayaların teşip keçken tamırım!’ – dep yekünley o, tedbirini.

### Crimean Tatars

- İsa Abduramanın eserlerinen endi tanıştırsınız. Onın ‘Şeñ elifbe’sini er bir bala oqup sevingendir. (‘*Top, top, top. Men oynayım top. Çoq, çoq, çoq men toplayım dost...*’, ya da ‘*Balabandan-balaban balıq kettirdi babam...*’ ve il.) O, qolay oqula edimi? Sizce, bunıñ sebebi nede ya? Bir qaç satırını aqlıñızğa ketirip, ifadeli oquñız.



## 23-NCİ AFTA

### Sarf

#### Turğun ibareler

Talebeler, siz cümle tizgende, fikriñizni çoxusı allarda ayrı sözlerni birikmelerge serbest qoşıp şekillendiresiz. Em siz saylağan sözlerniñ er biri, cümlede özünüñ ayrı manası olıp qullanıla.

Lâkin bazıda öyle ola ki, özünüñ ayrı manasından farq etip, bir qaç söz, birleşip, umumiy mana bildire. Meselâ, ‘başı kökke yetmek’ birikmesinde er bir sözniñ ayrı, luğattaki manası olsa da, olar birlikte ‘pek quvanmaq’ manasını bildire. Böyle birikmelerge **turğun ibareler** deyler, çünkü olarnıñ terkiбинdeki sözler, tek böyle tertipte qullanğanda deñişmegen bir mananı teşkil etti. Şunuñ içün cümlede qullanğanda olarnıñ terkiбинdeki yerini (bazıda da şekillerini) deñiştirmek olmaz. Şu sözlerniñ episi de bir vazife becerir.

Şu ibarelerniñ kölemi, til inkişaf etkeninen daima yañı soylarınen tola. Çünkü ayrı bir fikirni nutuqta azır bir şekilde qullanmaq mümkün ola. Meselâ, *ğalebe qazanmaq, zarar ketirmek, para yapmaq, asretlik çekmek* ya da *yıl-yıldan, nesil-nesilden, balabandan-balaban* kibi şekiller şu sıradandır. Olar turğun ibareler (ya da ilimde – frazeologizm) olmasa da, **azır nutuq birlemleri** sayıla. Bundan ğayrı, **ibarelerniñ** özü ayrı bir janrını bile teşkil ete. Keñ tarqalıp, olar umumen til zenginliğini ifadeley ve şahsen insannıñ söz ustalığınıñ esasını teşkil ete. Meselâ:

*adıñnen qart ol* – birevge uzun ömür tilep aytıla;

*aytmağ a til barmay* – oñaytsızlanmaq; aytıp olamamaq; fikirni aytmaktan çekinmek;

*azır aşqa duacı* – özü bir şey yapmadan azır şeyge kelip yetişmek;

*aqıl qoymaq* – 1) nizamğa, tertipke çekmek, terbiyelemek;  
2) cezalamaq.

(F. Veliyevniñ ‘İbareler’ kitabından)



⇒ **1-iş.** Berilgen turğun ibarelerniñ manasını anıqlañız. Olarnı ağzaviy nutquñızda qullanıñız. Buña cümleler /küçük metinler tertip etiñiz.

1. Qararsız eglencege (kezintige) berilmek. 2. Közden ğayıp olmaq. 3. Qollarını yibere bermek. 4. Payını bermek. 5. Payını almaq. 6. Belâdan qurtulmaq.

⇒ **2-iş.** Berilgen cümlelerniñ manasını añlatıñız.

1. Men onıñ ne yapacağını pek yahşı bilem de! 2. İşle-riñiz oñ kelsin! 3. Közüñiz aydın! – Aydında olsun! 4. Qaba-atnı oña taşladılar. 5. Qısmeti açıldı. 6. Ötü patladı.

⇒ **3-iş.** Bu ibarelerni nutuqta nasıl qullanacağınızıñız cümlede kösteriñiz.

1. Vaziyetke köre. 2. Satın almaq. 3. Satıp yibermek. 4. Ne bermegen Alla /belki bir şey olur/ ne olsa olsun dep. 5. Ruhtan tüşmek. 6. Ruhunı kötermek.

⇒ **4-iş.** İbarelerni olarnıñ manasinen keliştiriñiz.

- |  |  |
|--|--|
| 1. Bizden bir qalaqay,<br>topraqtan biñ qalaqay. | 1. Tasil körgen, oqumış;<br>oquğan adam  |
| 2. Biñ peşman olmaq                              | 2. Bereket daa çoq olsun   |
| 3. Göñül qırmaq                                  | 3. Kimniñdir sayğı-ürmeti-<br>ni, işançını qazanmaq  |
| 4. Közge kirmek                                  | 4. Birevniñ canını ağırtmaq  |
| 5. Merekep yalağan                               | 5. Başını divarğa urmaq,<br>yapqan işine peşman et-<br>mek; yañlış iş yapqanını<br>añlamaq |

## Qırım baari

*Ablâziz Veliyev*

Acayip ðlkemiz bar,  
Onı candan sevemiz.  
Küz, qış, yaz em baari  
Cıyınıqlı ter-temiz.  
Amma baar mevsimi  
Episinden yahşıdır.  
Diñlep qaval sesini  
Deysiñ ‘Vatan aşqıdır’.



Çoçamiyler, lâleler,  
Patlaqçanaq, kök totay,  
Dır-dır Fatma, naneler –  
Tabiiyler kök otday.

Dere, dağ ve qırları  
Sanki dersiñ bir maqat.  
Göñül ohşar yırları  
İnsağa berip taqat.

Menim içün sen daim  
Anam kibi dülbersiñ.  
Aziz ana-Vatanım  
Biz içün sen gül yersiñ.



### Sual ve vazifeler:

1. Şiirni ifadeli oquñız.
2. Şiirniñ mevsusını tayin etiñiz.
3. Şiirniñ esas fikri (ğayesi) neni ifadeley?
4. Eserde rastkelgen yañı sözlerni elektron luğat vastasinen añlamağa tırışıñız.
5. ‘Göñül ohşar’, ‘taqat berir’ birikmelerinde sözlerniñ köçme manasını tayin etiñiz. *Göñül* ve *taqat* sözlerine manadaşlarnı tapıñız.



6. Şair Vatannı kimnen teñeştire? Buña köre ömrümüzdeki emiyeti aqqında netice çıxarıñız.

7. Vatan aqqında atalar sözlerini hatırlañız.

8. Şiirni ifadeli oquñız. Vatanımıznıñ baar manzarasını (sözlernen ya da resimnen) tasvir etiñiz.

### Ev işi

1. Evel oquğan eserlerniñ bazılarında turğun ibarelerini tapıp, defterñizge yazıp alıñız. Olar bildirgen manasını hatırlañız.
2. Luğattan faydalanıp, şöyle birikmelerge qırımtatar ibarelerini tapıñız:  
*вухо ріже; все одно; гірше не може бути; говорити до діла; легко сказати; ламаного гроша не вартий; порушити слово; не пхай носа до чужого прося; ні слуху ні духу.*
3. Oca teklif etken baar aqqında şiirlerni oquñız. Olarnı talil etiñiz.
4. Böyle ibarelerniñ manasını tayin etiñiz: Alla bile; bar sesinen; köpek suvarıp yürmek; yüregine (canına) tiymek; (öz) boynuna almaq; özüni tutmaq; köklerde uçmaq; iç olmasa; aqlına kelmek; aqlı qoymaq; aqlından çıqmaq.

### Qoşma metin

#### Turğun ibarelerniñ milliy özgünlüğü ve zenginliği (metinler)

Çıtırdap-çıtırdap yana odunlar.  
Yastıqtan yımşaq anamnıñ tizleri!  
Yürekni ohşar onıñ tatlı sözleri,  
Maña külip baqqan közleri...

*S. Emin*

## Ana

*Eskender Fazıl*

Ana, anay,  
Anaçığım,  
Qanı-canım,  
Küç-qudretim,  
Oy-fikirim, Saf vicdanım,  
Bu dünyada Sensiñ benim  
Baht yıldızım. Sensiñ,  
Anam,  
İlki em de Soñki sözüm.

## Anamnıñ yırı

*Gülzar Dermenci*

Hatırama siñip qaldı  
anamnıñ yırı,  
Oña zil tuta edi sabalar  
sırı,  
Acayip sabiyge yır diñle-  
mege,  
Ana quçağında bol yerleş-  
mege.  
Yüzünü aç a yırnıñ nağmesi,  
Ananıñ sesi – Vetannıñ  
sesi.  
Onıñ cümert davuşı göñ-  
lümni aç,  
Yırğa sevda yüregim sanki  
de uça.

## Mustaqil oquv içün

### Anama bahşış (ikâye)

*Nüzet Ümerov*

Tezden anamnıñ doğğan künü olacaq.  
Ağamnen oña ne bağışlaycağımıznı alâ  
daa bilmeymiz. Ağam Rustem:

– Bahşış öyle olmalı ki, onı em anam  
begenmek gerek, em özümüzge de fayda-  
sı olsun, – dedi.

Biz ne alayıq eken, dep çoq tüşündik... Alacaq bahşışı-  
mıznı anam da begenmek gerek, biz de. Çamaşır yuvğan  
maşinası bar. Atta tikiş maşinası bile bar. O bizge bita-





mızdan qaldı. Er şey bar, amma yengil maşinası yoq. Oña bahşış olaraq yengil maşına alır edik, amma Ruslannen ekimizde tek yigirmi üç kümüş bar. Yigirmi üç kümüşke ise 'mersedes' alamazsıñ.

Tükânlarnıñ birisinde 'Tılsımlı soba' dep adlandırılğan furun tavasını kördik. Özü tögerek, yıldıray, dülber. Eñ müimi ise özü pişire. Şnurnı rozetkağa kirsetseñ – ana saña köbete azır! Amma da yahşı bahşış! Fiyatı da kelişe, olğanı-olacağı yigirmi kümüş. Ağamnen bu tavanı almaq qararına keldik. Qalğan parağa ise güldeste alırmız.

Anamnıñ doğğan küñüne biz oña tantanalı sürette dülber kâğıtqa sarılğan ve üstü açıq mavı renkli şeritnen baylanğan qutunen üç qırmızı qaranfil bağışladıq. Anam bizim bahşışımızğa pek quvandı ve onı deral sınaq baqmağa istedi. Un, yımırta, yağ çıxarıp, hamır bastı ve yarım saat keçer-keçmez, bayram sofrasına qabarıq, üstü qizarğan qalaçnı çıxarıp qoydı!

Anam pek quvandı. Biz ise ondan da ziyade. Qalaç pek lezetli edi.





## 24-NCİ AFTA

### Aziz ana

*Alyana Osmanova*

Anam – benim can dostum,  
Sırımı açam oña.  
Ögütlerinen büyüdüm,  
İkmetli benim anam.

Anam çox şeylər bile,  
Közlerinde ışıq bar.  
Şırın sözləri ise –  
Dünyada eñ tatlı bal.

Geceni gündüz etip,  
Tınım bilmey er ana.  
Qarthıq çağına yetip,  
Balanen gururlana.

Ana biz içün aziz,  
Daima tazim etem.  
Anamızı sevemiz,  
Ürmet ile baş egem.

Onıñ qadrin bileyik,  
Ana-bir, başqası yoq.  
Göñülin kötəreyik,  
Anağa borcumız çox.

## Luğat

aziz – *святый*

baş egmek – *вклонитися*

borc – *борг*

büyümək – *дорослішати*

ğururlanmaq – *пишатися*

şirin sözler = tatlı sözler

ışıq = yarıq

sır – *тайна*

ikmetli – *мудрий*

ögüt = nasiat (*настанови*)

tınım ~ tınç, raat vaqtı olmay

tazim etmək = temenna etmək, şereflemek

## Sual ve vazifeler:

1. Şirni ifadeli oquñız.
2. Şiirniñ mevsusını tayin etiñiz.
3. Şiirniñ esas ğayesini tayin etiñiz.
  - a) yaqın adamlarımıznen yahşı munasebette olmaq kerekmiz;
  - b) analar öz balalarını qayğırılar, balalar analarına daima yardım etip, olarnıñ qadrini bilmeliler.
4. Analarınıznıñ adiy yaşayışını ikâye etiñiz.
5. Şiirde qafiyeli sözlerni tapıñız.
6. Manadaş söz sıralarını oquñız ve aqlıñızda qaldırınız: ışıq – nur – ziya – yarıq; aziz – muqaddes – mubarek – ayya; şirin – tatlı.
7. Aşağıdaki atalar sözlerini oquñız. Ananıñ balağa büyük sevgisi aqqında atalar sözünü tapıñız.
  - a) Ana barğan yerge bala da barır.
  - b) Ana içün bala baldan da tatlıdır.
  - c) Ana kibi yar olmaz, Vatan kibi yer olmaz.
8. Şiirni tekrar ifadeli oquñız. Ezberleñiz.

## Sarf

### Söz terkihi ve söz yapıluvi

#### Sözniñ tamırı ve negizi

#### Yalğama. Tamırdaş sözler

Cümlede sözlerni biz deñişmegen alda ya da kerek şeklinde qullana-mız. Cümlege kerek şekli qırımtatar tilinde sözniñ **tamırından** soñ **yalğama** qoşulıp teşkil etilir. Er bir yalğamanıñ sözge qoşqan manası bar. *Tam* mana tamırında saqlanır. Bu, sözniñ özegidir:

*Bir+leş+ken*

*biñ+ni*

*yıq+ar*

Yalğamalar ardı-sıra ile sözni *qoşma* manalarinen tamamlar. Şu yalğamalar türlü vazife becerir. Yañı mana ifadelegen yalğamağa **söz ya-pıcı** deyle. Olar isimden başqa isim, ya da sıfat, fiil ve diger söz çeşitini yapqan yalğamalardır. Em sözge yañı mana bergenleri içün luğatqa ayrı söz olaraq kirsetilir:

yapmaq → yaptırmaq, yapılmaq, yapmamaq ve dig.

tuz → tuzlu, tuzluq, tuzsuz, tuzlamaq, tuzlanmaq ve dig.

cemi (= episi) → cemaat, cemiyet, cedvel, mecmua ve dig. (*Mında diqqat etiñiz*: şu sözlerde yalğamalar endi tamırğa kirgen. Olar yalğama olaraq belgilenmez, ve bazıda tamırını deñiştire bile. Şu cümleden daa misal ketireyik: kitap – kütüphane; etraf – taraf ve il.)

Misal etip kösterilgen sözlerniñ episi biri-birine **tamırdaş** sayılır, çünki olar tek yalğamaları ile farq eteler, tamırları ise bir (=aynı) qala.

⇒ **1-iş.** Berilgen sözlerden 3 tamırdaş gruppanı teşkil etiñiz. Qalğan sözlerden cümle tiziñiz.

Almaq, qapmaq, işçi, qaranlıq, tişlemek, alma, qapu, işlememek, qaraman, basıp almaq, alma, işsever, qaravullamaq, alınma (söz), qap-qara, işbirlik, işaret, beralmamaq, işküzar, (suv ve) qara, qara (haber), işanmaq, al (tüs), işdeş, al (emir meyli), qaraboğday, işkir, iştirakçı, qararlamaq, al (vaziyet), işhane, göñlüni almaq, qaralama (defter), yuqlap almaq, qarılğaç, qar, işçenlik, qarama-qarşı, işletmek.



⇒ **2-iş.** Berilgen sözlerde tamır ve yalğamaları ayırınız.

Yollamaq, yollayıcı, nevbetleşmek, öğretici, oqutılğan, olğan-olacağı, pekitilmek, sabırsızlıqnen, sevindirici, tart-tırmaq, tekrarlamaq, tenbileyici, tutulmaq, tutunmaq, tüzənmək, tüzəlmək, ustahane.

⇒ **3-iş.** *Bir, baş, köz ve kün* sözlərinə tamırdaş sözlərini tapınız.

⇒ **4-iş.** Afta devamında oqulğan metinlərdən tamırdaş sözlərini yazıp alınız.

⇒ **5-iş.** *-lıq, -daş, -maq, -ma, -cı* kibi yalğamalara ve oların digər şekillərinə sözləri misal ketirip teşkil etiniz.

⇒ **6-iş.** *Aqiqat, közlük, talapkâr, aynecilik, maqtav, qonuşuv, qaldırım, keçirilmək, toqtatmaq, sağlıqlaşmaq, evelki, yavaştan, yanında, qaverenki, doğruluq* kibi sözlərin tamır ve yalğamalarını belgileiniz.

⇒ **7-iş.** Berilgen sözlərgə sıfat yapıcı (*-lı* ve *-sız*) yalğamalarını qoşunuz. İmlələrini riayət etiniz.

Suv, köpük, tuz, sayğı, ses, nur, sevgi, para, tantana, quvanç, taş, yün, uc.

## Ev işi

1. Ana ve analıq aqqında nasıl meraqılı eserler bilesiniz? Hatırlaınız.
2. Oca teklif etken ana aqqında şiirləri oquınız. Begengenizni ezberleiniz.
3. Analıq mevzusına bağışlanğan subet keçiriniz.
4. Şiirni oquınız.

Bizim içün yuqusını bölgen anamdır,  
Ağzından loqmasını çıxarıp bergen anamdır,  
Yañılsa, doğru yolğa salğan [*şive*: qoyğan] anamdır,  
Yıqılsa, tursatıp, qoluna alğan,  
Bir dertke oğrasa, oylarğa dalğan,

Adaşsaq, yoldan qurtarıp alğan...

Analar için ömürlük borcumuz.

Bugün bu bayram-bahşış anama, sizlerge!

**Özüñiz de bir şiir yaratıp baqıñız.**

**5. Becerilgen vazifeler esasında tedbir azırlañız.**

**6. Aşağıda berilgen metinde, qayd etilgen sözlerniñ yalğamalarını belgileñiz.**

Küneş Ay-Petri şavleleri **dağlarınıñ** uclarını aydınlata. Mishor **köyünüñ** üstüne **sepile**. Ortalıqta güzel pempe güller açqanda, hoş qoqu saçqanda, qaval sesini **diñlemek** için saarde erte yarıq uçıp **keldik** bu yerge. Qırmızı gül **gönceleriniñ** qoqusı öyle tatlı, dersin saar **yuqusı** sefa bere. Güzelniñ **qarşısındaki** yıldızlar titrey-titrey **sönip** qala. Eñ güzel çeçek – Arzıdır. Dağlarını meftün etken nefis çeçek Arzıdır. ‘Sesin er kes için tatlı-tatlı nağme kibi **yañğıray**. Sen **yırlasañ**, bütün Qırım **diñlene**... yürek taşa, iñlene’. (‘Arzı qız’ efsanesinden)

### Luğat

pempe = al

saar = tañ atmazdan evel

sefa = zevq

nağme = ava, ezgi, maqam (напев)

iñlene ~ ağlay

## Bir top aqbardaq

*Enver Qurtumer*

*Rahmetli qartanam, Taraqtaşlı  
Emine Seydali qızı Tonqanıñ  
hatırasına bağışlana*

Aqbardaqnı pek sevem. ‘Ne içün?’ – dersiñiz. Çünki onda insannı kendisine çekken tekrarlanmaz dülberlik, nazıqlık bar... Bu sebepten onı toy aqşamı ap-aq anterini kiygen kelinge beñzetem. Bundan da ğayrı, aqbardaq – ilk baar çeçegi, baar habercisi. Ve...

1970 senesiniñ kiçik ayı edi. 7-ci sınıfta oquy edim. Anam er vaqıttaki kibi, işten keç qayttı. Boldurğanına baqmadan, yüzünde nasıldır sevinç izleri duyula. Babam rahmetli olğan soñ, anamnı ilk kere böyle vaziyette köre edim.

– Balalar,– dedi anam, bizlerge baqıp.

Üç ağa-qardaşcapıp kelip, anamnıñ yanına oturdıq. ‘Ne söyleycek eken’ dep, sesimizni çıqarmayıp bekledik.

– Köyge putövka kelgen, Yaltağa eken. Köyde: ‘Putövkanı Müslime ablağa bereyik, bir Qırımı körip kelsin’,– dediler. Razı olacaq edim ama, sizni tüşündim. Sizni kimge qaldırıp keterim? – dedi efkârlı bir sesnen.

Üçümüz üç taraftan anamnıñ boynuna sarıldıq.

– Ana, anaçığım! Razı ol. Bizni tüşünme. Biz ep işlerni yaparmız. Tavuqlarnıñ yemini de, Kökmannıñ (köpegimiz) aşını da vaqtında berirmiz... – dep, anamızı razı etmek içün bütün merafetimizni kösterdik.

– Aydı, güzel,– dedi anam külümsirep.– Yarın dedeñizden, katañızdan da bir aqıl tanısayım. Ne derler,– dedi.

Üç ağa-qardaş yatağımızda saba olmasını bekley-bekley, nasıl etip yuqlap qalğanımızni duymay qalğanmız.



Qartanamnen qartbabam qomşu köyde yaşay ediler. Anam işke keç qalmamaq için saba erte yolğa çıqqan. Ana-babasinen körüşken. Beraber saba qavesini içken ve meseleni aňlatqan.

Qartanam:

– Böyle imkânı qaçırma saqın. İlle razı ol. Belki köyümüzge barmağa çareñ olur. Evimizden haber alırsıñ... – degen, közyaşlarını maramasınıñ ucunen silip.

Qartbabam ise:

– Olacaq şey degil qızım. Olarnıñ aytqan laflarına çoq inanma. Köyde o qadar adam çalışıp da, bir qırımtatarnı yollaycaqlarmı,– degen.

Nasıl da olsa, bir qaç künden soñ anamnı Qırımğa özğardıq. İlk afta köz açıp yumğan kibi keçti ketti. Amma yavaş-yavaş üç ağa-qardaş anasız ayatnıñ ne olğanını is etmege başladıq. Üçümüzniñ de közlerimiz yolda. Sabırsızlıqlan anamızı bekleyemiz. Yoldan nasıl naqliye keçmesin, aman azbar qapığa çapamız. Niayet, evimizniñ qarşısına avtobus kelip toqtadı. Üçümüz de oq kibi azbar qapığa atıldıq. Acele qapını açtık. Qarşımızda, eki elinde eki çantasinen anamız tura edi. Çapıp yanına keldik. ‘Hoş keldiñ anaçığım’,– dep, üçümüz iç taraftan sarıldık. Elleriindeki çantalarını alıp, ep beraber evge kirdik. Anam evniñ töründe töşelgen minderge keçip oturdı.

– Ne ise, evge de kelip çıqtım. Rabbime çoq şükür! Soñ, siz ne aldasıñız? Mensiz qıynalğandırısıñız? Aşıñızni-suvuñızni baqmağa çareñiz oldımı..? – dep, bizlerge ardı-sıra sualler bermege başladı.

Kadâm bir çette oturıp, dünyasını unutqan alda, israr-nen çantalarını qarıştırıp ‘teftiş’ yapa. Ağamnen ekimiz sert baqışlarımıznen onı toqtatacaq olamız. O ise bir şey aňlamay, ep ‘teftiş’nen meşğül. Eñ soñunda bir kâğıt torba çıqardı. ‘Bu ne?’ degen kibi, torbanı töpege köterip anama baqtı. Anam telâşlı bir sesnen:





– Canım evlâdım, muqayt ol! Anda aqbardaqlar bar! – dedi ve yaslanmış yerinden acele tiklenip oturdu.

Kâğıt torbanı eline alıp, içinden sılaq bez parçasına sarılmış bir top ap-aq çeçek çıqardı. Olarnı bizge kösterip:

– Bu çeçekniñ adı – aqbardaq. Qırım çeçegi. Yarın qısmet olsa katañızğa alıp barırsıñız. Kim nasıl sevinir... – dedi.

Ertesi künü mektepten kelgen soñ üç ağa-qardaş anam azırlağan boğçalarını alıp yolğa çıqtıq. Avtobusta keter eken, qartanama apansızdan bir ‘bahşış’ yapmağa qarar berdik.

Çoq keçmeden qartanam yaşağan köyge yetip keldik. Yavaştan azbar qapını açıp, içerige baqtıq. Kimse körünmey. Çevikliknen evge kirdik. Dolaptan bir çay bardağı alıp, ev ortasında turğan qona üstüne qoydıq. Aqbardaqlarnı çıkarıp, çeberliknen bardaqa yerleştirdik. Kendimiz ev töründe tertipnen cıyılmış bir top minder artına keçip saqlandıq. Sesimizni çıqarmayıp, qartanamızni bekledik...

Birazdan ayaq sesleri eşitildi. Qapı açılıp, qartanam kirdi. Qona üstündeki aqbardaqlarğa baqtı. Bir qaç saniye ses-solğı çıqmadı. Soñ yavaş-yavaş qona başına kelip oturdu. Aqbardaqlarğa baqtı. Taaciplenip, sağ eliniñ avuçinen ağzını qapattı. Aqbardaqlar qoyulğan bardaqnı eline aldı ve toyıp-toyıp qoqladı. Er qoqlağanda: ‘Ah, canıñızni seveyim. Qırımniñ qoqusı kele’,– dep tekrarladı. Közlerinde peyda olğan bir qaç tamçı közyaş asretlikten solıp-sararğan, zorluqlardan bürüşken yüzünde sılaq izler qaldırıp, peştimalınıñ üzerine tamladı...

Minderler artından bu vaqianı közetir eken, ne sebepten aqbardaqnıñ qartanam için ne qadar qıymetli olğanını o vaqt añlamağan edim.

Yıllar keçti. Çoq şeyler unutuldu. Amma aqbardaqnı ve qartanamniñ közyaşlarını unutmadım. Olar qalbimde Vatan asretligi ateşini yaqtılar. Bu asretlik meni Qırımğa ketirdi...

Ana-Vatan quçağında yaşayım! Balalıq künlerimden hatıra olsun dep, azbarıma aqbarda q saçtım. Aqbarda qnı pek sevem. Olar benim için küreş ve ğalebe timsali.

### Luğat ve şive sözleri

qartana = kata = bita  
abla = tata  
peştimal = öglük  
söylemek = aytmaq  
sert – *суровий*  
tör – *почесне міцце*  
ceberliknen ~ ustalıqnen  
teftiş = *mında*: teşkerüv, aqtaruv  
naqliye = transport  
asretlik – *мыза*

1. Qartananın asretliginiñ sebebi nede olğanını, ikâyenin mündericesinden añlap oldıñız mı? Ya qaramağ a çeçekler ne için küreş ve ğalebe timsali olğanını añladıñız mı?
2. Qorantañızda buña oşağan ikâyeleri eşittiñiz mi?
3. Aşağıda berilgen atalar sözlerinden ikâyenin mündericesini açıqlağanlarını saylap anlatıñız, soñ defteriñizge köçürüñiz.

Ana kibi yar olmaz, Vatan kibi yer olmaz.  
Vatanğa hiyanet etken, öz anasına hiyanet eter.  
Vatan – doğmuş anañ ise, ğurbet il – ögey anadır.  
Vatan sevgisi – sevgilernin eñ büyüğidir.  
Vatansız adam – yırsız bülbul.  
Vucut qartaysa da, göñül qartaymaz.



## 25-NCİ AFTA

### ‘Aqbardaq’ (ikâye)

*Tair Halilov*

Bütün gece toqtamay yağğan ilki baar yağmuru kölgeli alçaqlarda ve oba-töpe sırtlarda şekerlenip, saqlı yatqan qar qalımtılarını būs-bütün iritip, sa-bağace yer yüzünü qap-qara etip taşladı.

Nasibe apte adetinca erte uyandı. Tışqa çıqtı. Yağmur daa sepeley edi. Qamışnen qoralanğan azbar içinde eki qazıq boyu çekilgen telden aqşamdan unutıp qalğan çamaşırlarını yığdı ve kene odağa kirip, sır suv şeylerni birer-birer sıqıp soba töpesindeki yipke yaydı.

Suvuğan, dım oda onıñ keyfini bozdı. Qıyış-qonğur tahtalarnen qurulğan setniñ üstünde çarşafsız, yamavlı yekâne yorğanı түbünde qalaçlanıp yuqlağan doquz yaşında oğluna mazün, sevginen nazar taşladı. Yüregi taşı. Onıñ başı ucuna tiz çökip, saçlarını sıypadı, eppeyi vaqıt eleslenip, qaarlenip oturdı. Soñ dört ayaqlı demir sobağa ğozapaya toldurıp, tutaştırdı. Çay qaynattı. Ne qadar qıymasa da, oğlunu uyantmağa mecbur oldı.

– Aç közleriñni, qozuçığım. Saba oldı,– dedi anası oğlunıñ perçemini nazik-nazik çıbalatıp. – Qalq, oğlum, vaqıt keldi.

Qurtnezir közlerini açtı, külümsiredi ve yanağını anasınıñ eline qoyıp:

– Anam, anaçığım. Menim küneşim,– dedi.

– Tur, tosunım, kiyin, yüzüñni yuv. Çay içeyik de, tarlağa barıp, ğozapaya ketireyik. Odunımız bitti.





– Ana, tüşümde bilesiñmi kimni kördim?  
– Kimni, canım? Eyilikke olsun.  
– Babamı. Saqalı ösken, tap köküsine qadar tüşken...  
– Tüşüñ pek yahşı. Belgisiz ğayıp olğan, saĝ qalğan ask-  
erler alâ daa qayıtp keleler. İnşalla, babañ da saĝdır, – dedi  
anası.

Oda tekaran qızğan edi. Qurtnezir ştanını, kölmegini,  
anası tikken yelekni, örgen çoraplarını kiyip, büyük, bol  
kaloslarını süyreklep, tışarı çıqtı. Qora qazığına mıhlı sa-  
vuttan betini yuvdı.

Şu vaqıtqace anası sofra donattı. Ötmekke sarı yağ si-  
lip, sıcaq, tatlı çaynen sabalıq yemeklerini aşadılar. Baba-  
sını sofra başında da aındılar. Soñra coşqun, sevinç bekler  
bir alda ekisi de tarlağa kettiler.

İnce, can sıqıcı yağmur ep sepelemekte. Ortalıqta daa  
yeşillik körünmese de, endi baar kelgeni belli olup tura.  
Sürü-sürü kiyik papiyler avada qanatlarından sızğırtıp uça,  
özen boyunda aselet yerniñ tuzunu yuvmaq içün suv qoyul-  
ğan pamuq tarlalarında özlerine aş qıdıra ediler. Uzaqta  
qararıp turğan zerdali bağçasınıñ üstü erilğan renkli ince  
ve yengil tumannen qaplı... Taze topraq qoqulu baar ava-  
sı kökü qafesiñni toldura, o, tap qan damarlarıñace siñe,  
göñülni hoş ete, coştura. Olar saban tiymey qalğan çet sıra-  
lardaki qaverenki pamuq saplarını birer-birer oraqnen orıp  
aldılar ve eki top ğozapayanı yipnen sıqtırıp bağlağan soñ,  
biri-biriniñ yardımınen arqalarına urıp, zar-zornen ayaq  
üstüne qalqtılar. Köyge az qalğanda, olar arıq boyundaki  
töpeçikte ösken dut teregi tübünde az-buçuq raatlanmaq  
istep toqtaldılar.

– Qısmet etse, babam qayıtp kelse, biz babamnen ğo-  
zapayağa qatnarmız. Sen ise evde aş pişirip, bizni beklep  
oturırsıñ yahşımı, ana? – dedi oĝlu.

– Ay-ay, balam, babañ tez-tez kelseydi, biz de alem kibi  
yaşar edik, – dep iç çekti anası.



– Ana, ana, baq! Baq, ana! – dedi Qurtnezir ayretli davuşnen.

– Ne o?

– Aqbardaq! Seniñ sevgen çeçeğiñ.

– Vay, balam! – Nasibe apte üç-dört adım çette, bılıtki otlar arasından bem-beyaz, sabiy qalbi kibi temiz-pak, yer túbünden baş köterip, dünya yüzüne baqıp turğan çeçekni kördi. Nazarı tılsımlağan aqbardaqqa tikilip qaldı. Bu ilki baar çeçeginen onıñ eñ sevinçli, eñ bahtlı künleri bağılı dese, kimse inanmaz.

– Balam. Zamet de olsa, o çeçekni maña alıp ber.

Oğlu qoltuqlarını yipten boşatıp, eline süyrü bir tayaq aldı da, aqbardaqnı túbü-tamırinen qazıp çıkarıp, anasına uzattı.

– Sağ ol, evlâdım. Ömürin uzun, bu çeçek kibi temiz, taze olsun,– dedi anası.– Bunı evde bir boş qutuçıqqa oturtırız.

Olar qalqıp, aqırın-aqırın kene yolğa çıqtılar. Bu kün yağmurlı, sılaq olsa da, olar için ğayet hayırlı kuun edi. Ana-bala evge yeter-yetmez, azbarlarında nasıldır bir qalabalıq kördi. ‘Ne oldı, aceba?’– dep turğanda, qarşılarına qomşu bala çapıp çıqtı.

– Nasibe apte, közaydın! Seitnebi ağa sağ-selâmet keldi! Evge kirmey, sizni beklep tura.

– Ne deysiñ şu?!

– Kerçek, Nasibe apte. Közaydın!

Nasibe apte sırtındaki yükünen çalqasına avdarıldı ve bulutlı kökke baqıp, aqbardaq tutıp turğan ellerinen betini örtti.

Şaşıp qalğan balasına:

– Bar, balam, çap, balam, babañ kelgen, – dep zornen dudaqlarını qıbırdattı.

Qurtnezir omuzlarını sıqıp turğan yiplerni çizip, ğozapayanı yerge taşladı da, dünyasını unutıp, ayaq túbündeki balçıqnı çevre-çetke sıçratıp, evlerine taba çaptı.

Uzun boylu, pilotkası túbünden gür, sim-siya saçları körünip turğan bir adam elindeki şinelini çemodan üstüne taşlap, köylüler arasından çıqtı ve balağa qarşı tez-tez yurdi. Bir qaç adım qalğanda, o, ellerini qartal qanatları kibi kerdi, çamur üstüne tiz çökti, yanıp-pişip çapıp kelgen oğlunu quçaqlap bağrına bastı.

– Oğlum! Menim oğlum!

Qurtnezir tavşan kibi qaltırap, babasınıñ boynuna sarıldı, onıñ iri, sıcaq közyaşlarını özünüñ çeresinde is etti.

– Babam! Keldiñmi, babam! Men seni gece-kündüz bekledim, sağındım!..

### Sarf

#### Söz yapıcı, şekil yapıcı ve söz deñiştirici yalğamalar (devamı)

Sözniñ esas manasını deñiştirmey, aqiqatta (yani şu muayyen cümlede) qaysı şekil aktual olğanını **şekil yapıcı** yalğamalar bildire. Olarğa çoqluq, isimniñ ohşav-küçültüv ya da sıfatniñ derece yalğamaları, fiilniñ zaman ve diger yalğamaları kire:

kelmek → keldi, kelgen, keleyata, kelmek, kelip, kelerek, kelir eken ve dig.

kitap → kitaplar, kitapçıq

yañı → yap-yañı, episinden yañı; güzel – güzelce, pek güzel, eñ güzel

Sözlerni birikmede özara bağlamaq ve cümledeki munasebetni köstermek için **söz deñiştirici** yalğamalar qullanıla. Bu, mülkiyet, keliş, sayı-şahıs yalğamalarıdır:

kitap – kitapnıñ, kitapqa, kitapnı, kitapta, kitaptan; kitabım, kitabıñ, kitabı, kitabımız, kitabıñız → kitabımnıñ, kitabıñña, kitabıñdan, kitabımıznı, kitabıñızda;

kelmek – keldim, kelesiñ, kelgen, keldik, keleciksiziñiz, kelirler.

Sözniñ er bir yalğamasına ait negzi ayırılır. Demek, **negiz** söz yapıcı, şekil yapıcı ve söz deñiştirici, em er biriniñ içinde 1-ci, 2-ci ve il. ola bile:

Keç + miş + i + ni unut + qan + nıñ kel + e + ceg + i ol + ma + z (At. sözü)

söz yapıcı negiz

söz yapıcı negiz

söz yapıcı negiz

söz yapıcı negiz

şekil yapıcı negiz

şekil yapıcı negiz

1-ci şekil yapıcı negiz

1-ci şekil yapıcı negiz

1-ci söz dəyişdirici negiz

söz dəyişdirici negiz

2-ci şekil yapıcı negiz

2-ci şekil yapıcı negiz

2-ci söz dəyişdirici negiz

söz dəyişdirici negiz

⇒ **1-ış.** Berilgen fiillerde yalğamaların çeşitini tayin etiñiz. Üç söznen cümle tiziñiz.

Azırladı, qurtarıcı, istey, başlaycaq, küldürdiñ, qayd etildi, kelgen, yatqanda, olaraq, quvalana, yerleşmekniñ, ketirgenler.

⇒ **2-ış.** Metinlerni oquñız. Qayd etilgen sözlerniñ negizlerini tayin etiñiz.

- 1806 –1812 seneleri olıp keçken cenk **neticesinde** Qırımniñ çeşit bölgelerinde açlıq, **hastalıklar** peyda oldı. Halqnıñ yerli ealisi bu hastalıqtan yoq oldı. Kefede karantinler quruldı... (*İsmetiyden*)
- Borodânka Buçadan daa beter. Kerçekten **qorqutıcı**, daa farqına baramadıq. İç olmadım bir sağ qalğan ev tapmağa **tırıştım**. Tapamadım. Yoqtır... (Gazetten)
- Menim adım – Ukraïna,  
**Leylekniñ** yengil qanatı.  
Menim adım – ana-Vatan,  
**Küneşçikniñ sıcağı**.  
Menim adım – Vışıvanka,  
Keten kölmekte nağışlar.  
Menim adım – mavı kök ve  
**Altındaki** künaylanlar.

Babamniñ sözü:  
Ménim Ukraïna!  
Anamniñ yırı:  
Sensiñ Ukraïna!

Menim adım – Qulan çöllər,  
Menim adım – Ötmek qoqusı,



Soñki çañ mektep bayramı,  
Çalbaş Özi tuman üzeri.  
Menim adım – Ümütlerimiz,  
Menim adım – Sevgi,  
Menim adım – pak arzular,  
Tañrımızğa işançlı!

Menim adım – aynennidir...  
Menim adım – İradedir...  
Menim adım – Qorantamdır...  
Menim adım – eyi Sözdür ki,  
Saqlap qaldırır alemni! (*Yırdan*)

⇒ **3-iş.** Berilgen fiillerge yardımcı sözlerni qoşıp, yañı fiillerni teşkil etiñiz. Manaları deñişkeniniñ farqına yetiñiz. Üç fiilni cümlede qullanıñız.

Aşaycaq (edi), ayta (bermek), öle (yazdı), barıp (yetmek), tutıp (oturmaq), tapıp (olamamaq), oqup (çıqmaq), yuqlay (eken).

## Ev işi

1. T. Halilovniñ ‘Aqbardaq’ ikâyesine plan tiziñiz.
2. Planıñızğa esaslanıp, ağzaviy şekilde ikâye etiñiz.
3. Oquñız. Qayd etilgen sözlerniñ tamır ve yalğamalarını belgileñiz, negizlerini tayin etiñiz.

### *Cenk balalarınñ közleri ile*

– **Evimizniñ** yanından bombalar uça. (*Danılo Felde*)

– Buña nasıldır bir ‘operatsiya’ deyler. Lâkin bu ‘operatsiya’degil. Bu cenktir. Onıñ maqsadı – bütün dünyanı alıp, nezaret astında tutmaq.

– Ya bu oña nege kerek? Sen ne **tüşünesiñ?**

– Men bellesem, balalıqta oña diqqat **ayırılmağanından-  
dır**, o, böyle yapa. Biz olarğa bir yaramay şey yapmadıq da!..




Lâkin bizim askerlerimiz pek cesürler. Biz yeñermiz. Ukraina ğalip olup ıqar. Eyilik **kemlikni** ille yeñer. (*Darya Avdeyeva*)

– O, hırsızlaĝanını cenk ile qapatacaq ola. O, rusiyeli-lerniñ episini aldata. O, bñtñn dñnyanı boysundıracaq ola. (*Stanislav Simonov*)

– Uaq uıp kelgende, onıñ artından da pat-pat etip bir şey patlaĝanı **eşitilgende** pek qorqasıñ. Bu bombalar evge tñşmesin dep **qorqasıñ** işte... Olar özlerini mında öz evinde kibi duymaĝa başladılar. Bu soñsuz ava ücñmleri... Biz endi evge kirgenimiznen, on daqıqadan yañı qırıcı uıp kelip, bombalay keteler. Demek, uıp keken soñ yaqarlıq toldurıp, kene uıp keleler bombalamaĝa. Bñyle top snarâdları şeer boyu dñnya qadar. Em olar ordu olĝan yerge degil, mesken **maalelerge** tñşe. (*Yaroslav ıj*)

– Patlatmaĝa başlaĝanları vaqıt men anama apqanda, şı top menden üç-dört metr uzaqlıĝında tñşti. ñnki bñlge-mizge qarşı pek qudretli ateş aqan ediler. Bizge endi boş toplar uıp kelgen edi, olar **patlamadılar**, Allaĝa şükür. Eger patlaĝan olsa ediler, evimiz olmaz edi, men olmaz edim, anam olmaz edi... Men ses ıqarıcı er şeyden qorqam, misal içñn qapu, ekmece **aılĝanda**, topıq patlaĝanda. (*Sofiya Ovseyenko*)

– O qadar büyük ateş aılĝan edi ki, evimizge de tñşmek mümkün edi. Ev **yanmasın** dep, apıp ketmek kerek edi. Eger atmaĝa başlasalar, tñbge tñşip yatmaq kerek, dep ayta ediler. Maşnada oturĝanda baĝlanmaq kerek. Cam paraları tiymesin dep. Kurtkanı baĝlamaq kerek... Pek qorqunlı edi. Er kes aĝlay edi. Bitam da aĝ-



lap, Litvağa ketiñiz, dedi. Biz onı diñlep, epimiz anda kettik. Biz evde, nasıl atqanlarını baqıp oturmamız da... Endi qayda qaytayıq – anda ne şeer, ne mektepler qaldı! Qara tüslü, kin tolu cenk, adamlarğa raatlıq bermey. (*Yeva Prâdko*)

– Bütün memleketler, bütün seyare bizim tarafdarları, Ukraina Rusiyenen **cenkleşkenine** baqalar. Olar yardım ete bileler ama, tek baqalar. Bu, benim fikrimdir. Kim kimni yeñip olacağını bekleyler... Men Ukrainadan ketken soñ, pek **şaşmaladım**. Kerçek. O, benim ana-Vatanım olğanını men añlayım. Men andan iç ketmeycek edim. Men vatanperverim. Men onı pek sevem. Anda cenk olsa da, men onı pek sevem. Patlatsalar bile, yañıdan qurıp çıkarımız. Men öz **memleketimni** pek sevem. Tıñ olğan soñ, men ille qaytırım. – Ne içün men onı sevem? – Çünki men anda doğdım. Bu, benim toprağım, benim evim. Er şeyim. Keleceğim. Bütün **kelecegidir**. (*Denis Korâçenko*)

### Qoşma metin

#### Olarnı dünya unuttı – ‘Azov’ unutmadı, 1-ci qısım (*cenkniñ Mariupoldeki eki ayı*)

– Balalarğa bir parça aş ketirdik,– dey askerlerden biri. Er kesnen selâmlaşalar.

– Selâm aleyküm! Kün şerifiñiz hayırlı olsun! Biz sizge bahşışlar ketirdik.

Sofra başına keçip, qoyacaq olalar.

– Balalar, keliñiz yanımızğa, sizge bir parça lezetli şeyler ketirdik,– dep mura-caat eteler olarnı körip eşitken balalarğa.





Yavaştan, aşiqmay toplana başlaylar.

– Keçiñiz sofrğa...

– Siz, çıkarıp, sofrğa qoysañız. Mümkün olsa. Biz ise soñ er keske birer parça bölip berir edik,– güzel subetke qoşulacaq ola büyüklerden, analardan biri. – Olar başta aşasınlar. Soñ biz olarğa berirmiz tatlı şeylerni.

– Azçıq tatlılıq, azçıq meyva, odur-budur, tapıp olğanımız qadar işte...

Soñ, toplaşıp turğan ve samimiy tebessümlerini azırda tutqan balalarğa aylanaraq, soraylar:

– Selâm, işleriñiz nasıl?..

Biri-birlerine ellerini, yumruçıqlarını uzatıp körüşeler. Episi – büyügi, küçügi de – yanlarına barmaq istey.

– Bu asker, meni kilsede çoqundırğanğa oşay, öylemi? – dey özara, biri-birine, eki oğlan.

– Biraz...

– Selâm aleyküm,– olarğa aylanıp baqqan askerini körer eken, alçaqgöñüllü sesler eşitildi.

– Selâ-a-m qızlar, nasılsıñız? – küleryüz ve nazik sesnen cevaplandı asker.

– Yahşımız. Bir qarar.

– Soñ, yañı sepetler öresizmi? Daa nenen oğraştıñız?

– E, men daa bir yañısını ördim.

Yerine uzanıp yete. Andan alıp, küçük, dülberden-dülber bir sepetçikni numayış ete.

– Pek güzel!.. Bu, ziynetleriñ içündir..? – sorap ruhlandırır asker. Artından qızçıq inciçiklerini çıkarıp köstere.– Pek güzel. Aferin saña canım!

Soñ balalar nasıl oyunlar oynağanlarını aytıp berdiler. Aralarından bir qız:

– Biz mında öyle de oynar edik ama, evge isteymiz. Küneş körmege isteymiz...

Sözge qansıcaq bir oğlançiq qoşulmağa cesaretlendi:



– Selâm aleyküm! Men siz kelgeniñizni kördim de, bir şey aytacaq olam. Biz epimiz mında evge qaytmağa pek isteymiz. Sağ qalıp qaytmaq isteymiz. Soy-sopumızını, yaqınlarımızını pek körmek isteymiz.

– Pek, pek sağındıq,— dep qoşula qalğan balaçıqlar.

Asker er şeyni añlay...

Laqırdını başqaca devam etmege tırışa:

– Siz mında epiñiz dostlaşqandırıñız? Öyle de soñ dost olıp qalacaqtırıñız, öylemi?

– Ebet!

Asker kelecekke ümüt beslegeninden, balalarınñ yüzleri daa açıldı...

Yanlarında turğan sabiyçik, telefon oyunını ep kösterecek, laqırdıda iştirak etecek ola.

Kamera ögünde bir qızçıq peyda ola. O, öz ikâyesinde böyle dey:

– Fevral (kiçik)niñ 27-de biz anam, bitamnen evden çıqtıq. Bundan soñ ne kök, ne küneş kördik. Biz mından pek çıqmaq isteymiz. Amma bu, telükesiz olsun. Yani, ‘yeşil ayat’, ‘tınçlıq ayat’ yolu qurulsın. Kimse yaralanmasın. Ukraina topraqlarına çıqıp, raat yaşamaq isteymiz. Misal içün Lviv taraflarına barıp yetip. Menim ağam bar. O, Harkovde oquy edi. Şeerni bombalamağa başlağanlardan soñ, o, çıqmağa yetiştirdi. Biz de öyle, elbet, telükesiz yoldan çıqıp olsaq, yahşı olur edi.

Daa bir qızçıq laqırdığa qoşulıp, askerlerniñ qoltutqanlarına çoqtan-çoq teşekkür bildirdi.

Daa bir oğlançıq:

– Küneş körmegenimizge eki ay oldı. Tezden çıqqaydıq küneşke!! Em evlerimiz qurulğan soñ, biz raat olurmız. Em Ukraina ğalebe qazanacaq. Ukraina – bizim tuvğan yerimiz, ana-Vatanımızdır,— dedi.

- Serlevası ve mündericesi aynı olğan videonı İnternette tapıp seyir etiñiz. Öz teessuratlarıñıznen paylaşıñız.



## **Tufanda qalğan qoy sürüsü**

*Yusuf Bolat*

Çoban Asannı bilesiñizmi? Bilneseñiz, diñleñiz. Çoban Asan Alim degen yigitniñ dostu. Ayvazovskiyniñ çobanı, Qarabiy yaylanıñ lâçini eken. Ey-yey, oña nafile Lâçin demegenler.

Yaylânıñ ucunda tim-tik bir qaya bar eken. Lâçin Asan boş vaqıtlarında bu qayanıñ üstüne çıqa da, ondan deñizge baqıp, qavalını çala eken. Em öyle bir çala eken ki, deñizdeki balıqlar suv üstüne çıqıp, onıñ çalğısını diñley ekenler.

Şu afatlı künde de öyle yapqan. Em keresinde tek balıqlar degil, qoyları da qayanıñ etrafına toplanıp kelgenler, avadaki quşlar, onı diñlep, başı üstüne asılıp qalğanlar.

Lâçin Asan zevq-sefanen çalğan. Ne içün çalmasın, yarın oraza bayramınıñ birinci künü, çobanlıq etkenine beş yıl olacaq. 'Beş yıl tolğan künü evge kel,— degen Avanes ağa oña,— o vaqıt bütün parañnı beririm — evli-barqlı olursıñ'.

Asan yarınki quvançlı künni oylanmaqta olsun, bu tarafta kök qararğan, deñiz siyarğan, ortalıqqa küpekündüz qaranlıq çökken. Birden öyle bir afat qopqan ki, yernen kök qarışqan, yağmur degil, taş yağğan...

Lâçin Asan, qayadan tüşip, qoylarını captan quvğan arada, serke sırimdan aşağı yuvarlanğan. Serke derkeç, qoy sürüsü de onıñ artından ketken. Köz açtım — köz yumdım degence, beş yüz qoydan bir lanesi de qalmağan.

Lâçin Asan bir özü qalğan. Irğağını omuzına urıp, qavalını quşağına qıstırıp, şorbacısına ketken. Şorbacısı onı





asarmı, kesermi, yoqsa eki yağını bir çizmağa soqıp, Si-  
birge aydarmı – ne yapsa da aqqı bar.

Azmı ketken, çoqmı ketken. Kefege kelip kirgende, or-  
talıqnı qaş qaranlığı bağlağan.

– Hoş keldiñ! – degen Ayvazovskiı oña.

Ya çoban Asan ne desin?

– Avanes ağa, qoylar tufanda qaldılar, beş yüzü de sırim-  
dan ketip, elâk oldılar,– degen,– olarnı tölemege ne malım  
bar, ne aqçam bar, tek bir canım qaldı, onı alıñ.

Ayvazovskiı bu arada başqa bir şey meraqlandırğan:

– Qana, oturıp bir qave iç de, tufan nasıl qopqanını aytçı!  
Bulut qaysı taraftan kelip çıqtı?.. Kök siyardımı?.. Qoylar  
mañraştıllarmı?..

Bu şeylerni sorap bilgen soñ, Ayvazovskiı çoban Asanğa  
şöyle degen:

– Bar, qardaşım, cemaatnen bayram yap. Bir aftadan  
kelirsiñ...

Kel zaman, ket zaman, aradan bir afta keçken. Çoban  
Asan ne aş aşığan, ne suv içken, ne yuqu yuqlağan. Af-  
tanıñ soñki künü, başını töben alıp, kene Ayvazovskiıniñ  
qaraltısına kelgen.

– Avanes ağa, meni çekiştirmeñiz, tez-tez cezamnı  
beriniz, artıq çıdap olamayım,– degen.

– O da nasıl cezadır?.. Yür, saña kösterecek şeyim bar.

Olar ikinci qatqa çıqqanlar. Yap-yarıq, arman kibi mey-  
dan bir odağa kirgenler.

– Endi mına bu şeyge baq! – degen Ayvazovskiı. Degen  
de, divardaki perdeni çekip alğan.

Lâçin Asan şasıp-şasmalap qalğan. Ne içün şasmasın,  
divarda öz qoylarını, qoyların arasında özünü körgen.  
Yaylânı da, tim-tik qayanı da, sırimdan yuvarlanğan serke-  
ni de körgen.

– Oşaymı? – dep sorağan Ayvazovskiı.



– Tıpqı özü! – degen çoban Asan. – Amma qoylar qıbırdamaylar da?

– Buña resim derler,– degen Ayvazovski.

Çoban Asan resim degen şeyni qaydan bilsin! Körgenlerini kerçek bellegen.

– Bu resimni seniñ aytqanlarıña baqıp yasadım,– degen Ayvazovski. – ‘Tufanda qalğan qoy sürüsü’. Sattım. Satqan parama beş yuz qoy aldım. Qoylar Cemaletdin baynıñ çayırındalar. İsteseñ, kene çoban ol.

Ey-ey, laf bunıñnen de bitmegen. Ayvazovski cebinden bir deste cırıışlı para çıqarğan da, şatırdata-şatırdata çobannıñ elline tuttuğan.

– Beş yıllıq elâl işiñ içün sağ ol, qardaşım! – degen.

Soñ nasıl olsun da, Lâçin Asan quvançından aqlını çıldırtmasın! Qapudan yürüp degil de, uçıp çıqtı, deyler. Ey-ey, dünyada yahşı adamlar azmı ya!

O vaqıttan soñ afta keçken, ay keçken, yaz da keçken, küz kelgen. Küzde, deyler, Lâçin Asan, dört para köyden musafır çağırıp, çalgı tutup, balaban bir toy yaptırgan. Toyda, deyler, Alim batır qaytarma oynayan, Ayvazovski oña zil tutqan, dedem de şerbet süzgen. Em süzgen, em içken, qursağı davulday şişken.



## Luğat

aqıl çaldırtmaq – *зводити з розуму*  
afat – *гроза*  
lâçin = şain  
imdat = qurtuluv  
hasar = topraq içinde buz tolu çuqurlar  
quzğun = yırtıcı qara quş  
zevq-sefa – *задоволення і насолода*  
qaraltı – *силует*  
qaranlıq çökken – *все поринуло в темряву*  
qoy sürüsü – *отара овець*  
mañraşmaq – *блекати*  
serke – *козел-ватажок*  
siyarmaq – *посиніти*  
sırım – *стрімчак*  
tıpqı özü – *геть такий*  
cap – *схил (гори)*  
ceza bermek = aqqını almaq (*покарати*)  
şorbacı – *господар*  
evli-barqlı – *той, хто обзавівся сім'єю*


## Sual ve vazifeler

1. İkâyedeki vaqialar ne zaman ve qayda olıp keçə? Bu vaqia Qırımnda olıp keçkenini nasıl sözler isbatlay?
2. Baş qaramannıñ adı ve lağabı nedir? Eserniñ baş qaramanlarınıñ adını aytıñız. Nutuqlarına diqqat etiñiz.
3. Asanğa ne içün 'Lâçin' lağabı berilgen? Bir afatlı kün Asan qavalında ne içün zefq-sefa ile çalğan? Şu arada avanıñ nasıl deñişkenini tapıp oquñız. Lâçin Asan qoylarnı quvalağan arada ne oldı? Asannıñ Ayvazovskiynen körüşip, olarnıñ arasında olğan dialognı tapıp oquñız. Bir aftadan soñ Asan Ayvazovskiynen körüşkenler. Res-

sam Ayvazovski Asaŋa ne köstergen? Asan ne içün şaşıp-şaşmalap qalğan? Ayvazovski Asaŋa köstergen resimniñ adı ne? Soñra neler oldı? Fikriñizce, bu kerçek olğan vaqia ya da masalmı?

4. Cümlelerni devam etiñiz.
5. Boş vaqıtlarında Lâçin Asan bu qayanın ...
6. Çoban bir özü qalğan, ırğağını ...
7. Çoban Asan ne aş aşığan, ne suv ...
8. Küzde Lâçin Asan dört para köyden ...
9. Manadaş söz sıralarını oquñız ve aqlıñızda qaldırıñız: lâçin – sapsan – şain – aqtoğan, afat – qasırğa, evli-barqlı – qorantalı, serke – erkeç – teke, qaraltı – talda – kölge.
10. Qarama-qarşı manalı söz çiftlerini oquñız ve aqlıñızda qaldırıñız: qaranlıq – yarıq.
11. ‘Qaş qaranlığı tüşti’, ‘atanıñ soñki künü’, ‘başını töben aldı’, ‘arman kibi’ ibareleriniñ manasını añlatıñız.
12. İkâye qolay oquldımı? O, sizni ne ile meraqlandırdı? Yu. Bolatnıñ diger eserlerini oqumağa avesiñiz barmı?

**Yusuf Bolat** – qırımtatar edebiyatınıñ körümli erbabı. XX asırnıñ otuzıncı seneleri o, qırımtatar edebiyatınıñ aman-aman episi janrlarında icat etken. Halq arasında esasen dramaturg olaraq tanıla. Cenkten soñ sürgünlikte yazıcı bir qaç pyesa yarata. ‘Dubaralı toy’, ‘Zoraki kelin’ komediyaları ‘Qaytarma’ ansambli tarafından sanalaştırıla. Bu pyesalar sürgünlikte Vatana asretlik çekken halqımıznıñ gönlüne melem bere.



## Sarf

### Qırımtatar luğatları

Sayğılı talebeler, tilni saqlamaq içün, sözlerni doğru qullanmaq qaidelerni bilip, nutqumızni daima ileriletmek kerekimiz. Bunı ana tilini bilmege istegen er bir bala, er bir büyük adam añlaydır. Em til güzelliginiñ, zenginliginiñ tamrına yetmek adiy bir şey olmalıdır.

Şunıñ içün til ve nutuq qaideleri dersliklerge kirsetilip, onı bir tertip-nizamda saqlamaq içün imkân yaratalar.

Lâkin şu qaideler özünden-özü tilni ileriletmez, olar tek til hususiyetlerimizni tayin ete ya da tarif eter.

Bundan ğayrı, malümatnı biz türlü vastalardan elde etemiz: özara qonuşuvlardan, İnternet ağılarından, kütleviy vastalardan, teleköröv ve radiodan, bediyy edebiyattan ve il.

Şu malümatnıñ çoqusını bizge hadimler yüksek keyfiyetli seviyede tekliif eteler. Olar cümleleriniñ, fikirleriniñ üstünde çoq çalışıp, metinler ve çıqışları, malümat ve seslendirüvlerni nümüneviy tarzda, yani nuqsansız, çoqusı allarda bediyy ceetten yüksek seviyede azırlaylar. Er bir sözniñ, er cümleñiñ üstünde nice vaqt çalışıp, tam fikirlerine yetmegence, işlerini tamamlamaylar.

Çoqusı allarda maqsatlarına yetmek içün, derslik ve bilgilerinden ğayrı daa elbet **luğatlardan** faydalanmaq kerek ola.

Luğatlar sözlerniñ manasını, sarf hususiyetlerini, imlâsı, ayıluvu, tarihı, inkişafı, kelip çıqışı aqqında malümatlar bere.

Qırımtatar luğatçılığında daa bir qaç luğat yaratılmağandır, şu cümleden izaat luğatı. Bu ve bir qaç diger luğat üstünde alimler ep çalışmaq-talar.

Sayğılı talebeler, til ve edebiyatımızni ögrengende, ket-kete siz S. Üseinov ve A. Memetov kibi alim ve tertip eticilerimizniñ luğatlarınen daa tanışacaqsıñız. Bundan ğayrı, İnternet vastasinen e-luğatları kullanmaq mümkün olğanını da biledirsiz. A. Gorâinovnıñ 'Alem-i medeniye'si', A. Acıvapov müellifliginde 'Luğatçıq' ve diger ceryanlardan faydalanmaq mümkündür.

## Ev işi

1. Metinni berilgen plan boyunca ikâye etiñiz.

### Plan:

1. Çoban – Lâçin Asan.
  2. Afatlı künü olğan vaqia.
  3. Asan Avanes ağağa yaramay haber ketire.
  4. Lâçin Asan Avanes ağanen bayramdan soñ körüşe.
  5. Bahatlı Asannıñ evlenüvi.
2. Metinni oquñız. Netice çıqarıñız. Esas tarih ve olarğa añlatuvlarını yazıp alıñız.

### Codex Cumanicus

Qırım luğatçılığına doğrudan-doğru alâqası olğan qadimiy luğatlardan biri Codex Cumanicustır. Bu luğatnı latin tuccaraları Qırımın Solhat şeerinde (şimdi – Eski Qırım) 1294–1295 seneleri üç tilde (latince-farsça-qumanca) neşir eteler. Soñ bu luğatqa daa til malzemesi qoşulğan. Birinci safesinde de **1303 senesi orağ ayının 11-i** tarihi, dep berile.

Codex Cumanicusnıñ luğatında 2 biñge yaqın türkiy, 160-tan ziyade fars, 140 arap, 36 moğol, 12 yunan, 6 slav (ukrain olsa kerek) ve bir kaç latin, italyan ve soğd sözü bar.

Bu yazma yadikârlıq, avropalılar Qara deñizniñ şimaline kelip türkiy tilni öğrenilmeleri içün, Qırımın şarqında yaratılğan edi. Codex Cumanicus bizim, qırımtatarların, eñ qadimiy luğatlarından biri sayıla, çünki o devirdeki laqırdı tilimizni, folklor nümünelerimizni tesbit etip saqlağan.

Luğatnıñ bizim devrimizge yetip kelgen yekâne nushası Venedik şeeriniñ (İtaliya) Aziz Mark büyükkilsesinde saqlanmaqta.

Bundan evel ve soñ devirleri qırımtatarların tarihinde bir çoq luğat yazılğan ve yazılıp neşir etilmektedir. Olarnıñ üstünde onyıllarnen çalışıp kelmekte olğan alim ve ter-

tip eticilerimiz, tilimizniñ öğrenilmesine, ilerilemesine ve saqlap qaldırmasına büyük isse qoşa ve qoşacaqtırlar.

2022 senesi qırımtatar alimleri, cemaatçılığı ve siyasetçileri, millet vekilleri ve devlet erbaplarınıñ teşebbüsü ile, soñra daa Ukrainanıñ başlıqları, şu cümleden Prezidentniñ qoltutuvı sayesinde, **Qırımtatar tili ve edebiyatı künü** devlet seviyesinde qayd etilmesi qararı alındı.

Nevbetteki 10 yıl içinde ötkerilecek bir çoq böyle ve diğger tedbirler, qırımtatar tiliniñ dünya yüzünde saqlap qalmasına güzel imkân ve qoşma şaraitler yaratır dep ümüt etile. Onıñ kenişletilmesi, oña Ukraina, Avrupa ve bütün dünya cemiyetlerinde meraq doğurması közde tutula.

### Qoşma metin

\*\*\*

*Maye Safet*

Navrez keldi, qarlar iriy,  
Quşlar qayta uzaqtan.  
Vatan bekley, topraq istey,  
Qırım açsın gayrıdan.

Er ne yerde olsañ bile,  
Kimligiñni aytacañ,  
Bu muqaddes adğa ille,  
Lâyıq olıp yaşaycañ.

Gür bağçalar, bereket,  
Salqım-salqım yuzum bağda.  
Evlâtları – birdem millet,  
Mavı özenday Vatanda.

Quşlar qayta yaban betten,  
Sesnen tola ormanlar.  
Uyandıra ğafletten,  
Bütün etrafını olar...

Mavı deñiz, mavı köküm,  
Altın küneş – altın tamğam!  
Evlâtlarıñ er kününi,  
Feda ete Vatanğa.

Yeşil adam, keniş çölüm,  
Bulutlarğa sarqqan Qırım...  
Qarlar irir, duşman keter...  
Güller bağça – Qırımım...

1. Navrez bayramını ötkerüv tertibini tapıñız.
2. Navrez ile bağlı yırlarını diñleñiz.
3. Şu bayramğa yazılğan şiirlerini tapıp oquñız.



## 27-NCİ AFTA

### Tayçığım

*Amdi Geraybay*

Menim tayım ciyren qaşqa,  
Qamış qulaq, al ayaq.  
Onıñ içün bar bir qamçım  
Sapı qattı, çum tayaq.  
Saba sayın ağam meni  
Tayçığıma minsete.  
Başın cetep, qıra boyun...  
Yavaş-yavaş cürsete.  
Babam Canköy bazarından  
Eger satın alacaq.  
Tepreç künü o egerni  
Tayçığıma salacaq.  
Aqşam üstü corğalanıp  
Köpük qusqan tayımnı,





Suqlandırıp qarap turğan  
Köy büyügi – dayımnı.  
Kirecekmen köçürmeden  
Aydamaqtay tiklenip.  
At üstünde oñğa, solğa  
Qurma cayday büklenip.  
Maña bunı ögretken soñ  
Babam siypay başımnı.  
– Yigit oldı kence oğlum,  
Sürt benim közyaşımını.  
Men de yemin etemen soñ:  
– At üstünde yürermen.  
Batırlarman talaşırman,  
Cigit olıp ölermen.

### Sual ve vazifeler

(A. Veliullanıñ dersliginden alınğan)

1. Şair tayçığını nasıl sözlernen tasvir ete?
2. Şairniñ közü ögünde nasıl zevqlı levhalar canlana? O, nelerni arzulay?
3. Şair özünüñ balalıq çağını nasıl duyğularnen hatırlay?
4. Baba nege incınıp, oğluna ‘...sil benim közyaşımını’ dey?
5. Oğlançıq ne içün tez-tez balaban olmaq istey? O, babasına nasıl sözler aytıp, yemin ete? Bu sözlerni defteriñizge yazıp alıñız.
6. Siz kim olmaqnı arz etesiñiz? Halqımız ögünde borcuñıznnı nede köresiñiz?
7. Şiirde qullanılğan ifadeli sözlerni ve ibarelerni defteriñizge yazıp alıñız.
8. Tabiat aqqında beyan etiñiz.
9. Bu şiirde nasıl şive sözleri rastkele? Olar edebiy tilde nasıl aytıla?

## Luğat

çum tayaq – qızılçıq çubuğı  
tepreç – baar bayramı  
corğalanıp – çaptırılıp  
yemin etemen – söz berem

## Ev işi

1. Mantıq toqtavlarğa riayet etip, şiirni ifadeli oquñız. Soñki parçasını ezberleñiz.
2. İnşa yazıñız. Buña 6-cı vazifeden mevzu etip alıñız.

## Qoşma metin

Sünnet toyundan bir ay keçken soñ Seit, babasinen beraber yapacaq ilk büyük yolculıqqa azırlana edi. Eyecanı soñsuz edi. Özüne sürpriz bildirilgen haberden, künlernen yuqu kirmegen edi közüne. Yaşı endi on eki olğan edi ve askerler akademiyasına yazılmaq vaqtı kelgen edi. Senelernen, babası ve anası onıñ terbiyesinen ne içün bu qadar sıq meraqılanğanlarını añlamağa başlağan edi.

Emekli olıp Kyivden kelgen ve Aluşta da yerleşken bir litsey ocasından, dört yaşından bu vaqıtqace, çetel tili dersini almaqta edi. Atqa, yetişkin ve tecribeli bir erkek kibi, yahşı mine edi. Daa babasınıñ ve Cemal kâyanıñ öğretüvleri sayesinde, minici bilgen numaralarını da bile edi.

– Ögümüzde uzun ve yorucu bir yolculıq bar,– degen edi babası.

İç bir şey qasevelendirmey edi küçük balanı. Şimdigece körmegen yerlerini, büyük şeerlerni, çarlıq sarayını, ille çarnıñ özünü körebilecegine inanamay, er şeyni hayalında canlandırıp, şimdiden endi köz öğüne ketirmege tırışa edi.



Evden ayrılışları oldukça azır oldu. Qocasını yıllarca öz-ğarmağa alışqan Zahide, oğlunu da onen beraber yibergen soñ, ökür-ökür ağladı. Diger balalarınñ ağızlarını pıçaq açamay edi. Seitsiz ne yapacaqlarını bilmey ediler.

Mırza Mehmet uniformasını kiygen edi. Seitniñ üstünde beyaz, boynundan dögmeli, bol qolları bilekte manjetle tarlaştırılğan ince, yazlıq bir kölmek, túbünde minici pantolonı ve çızmaları bar edi. Qardaşları ve anasinen sağıqlaşıp atına atlağanında, Zahide birden-birge oğlunıñ ne qadar büyügenini, boyğa ketkenini kördi. Onı pek sağılam ve güzel olğanını añladı. İftiharnen köksü qabardı. Qayğısına baqmadan, külümsiredi. Atlarınñ üstünde uzaqlaşmağa azırlanğan eki sevimli erkekten biri qocası, digeri oğlu edi. Ğurulanmayıp olamadı.

Baba oğul, Odessağa qadar atnen yapqan yolculıqlarını Odessadan soñ tren ile devam ettiler.

*Nermin Bezmenden*


- Metinde terbiye meselesi nasıl açıklanıla?



## 28-NCİ AFTA

### Hırsızlıq

*Abdulla Dermenci*



Tair, mektep arqadaşlarından bera-  
ber, üç kilometr avlaqdan gölgə yuvun-  
mağa ketti. Yolda Murat da qoşuldu.

Olar, göl çetinde oynayıp, bezgen soñ, evlerine qayıtqanda, köyniñ qavun-qarpız bostan yanına keldiler. Burunlarına qavun qoqusı urdı. Baqsalar, yolniñ çetinde, qora artında, çoqtan-çoq sararıp qalğan qavunlar uzanıp yata. Murat arqadaşlarına bostandan qavun almaqni teklif etti. Tair buña qail olmayıp tırıssa da, Murat onı da qandırdı.

Olar qoraniñ artından pısıp bardı ve ekişer qavun üz-  
diler. Qaravul olarnı körmedi. Qavun aşap bıqqan soñ, ana-babalarına da alıp baracaq oldılar.

Tair yavaştan evge kirip:

– Ana, mına sizge de,– dep balaban sarı qavunni ana-  
sınıñ aldına qoyaraq, anasınıñ soravından saqınıp, ikinci  
evge kirip ketti.

Aqşamlıq aş tedarigini körgen anası, qavunni aqayı yol-  
ladı bellese kerek ki, yanına qayıtıp kelgen oğlundan:

– Babañ qayda qaldı? – dep soradı.

– Babamni körgenim yoq!

Anası işini bitirip, Tairniñ qolundan tuttı da:

– Közüme baq, qavunni qaydan aldıñ? – dep soradı.

– Köy bostanından aldım.

– Kim berdi?

– Özüm aldım!

– Demek, hırsızladıñ, öylemi?

Tairniñ anası bu sözni açuvnen ayttı ve qavunnı yerden köterip, oğlunıñ qoltuğına qıstırdı.

Tair, ağlamsırap, başınen pencere tarafqa işaret etti:

– Men anda bargance qaranlıq olur, ana, tışarı atıp keleyimmi?

– Sen onı östürmediñ, atmağa da aqqıñ yoq!

Tair ağlap yiberdi.

– Qaravul qulağıñnı bursun, bir daa hırsızlıq yapmazsıñ.

Anasından meramet körmegen Tair, yaşlı közlerini sürtip, köy bostanına ketti. O, bostanğa kelgende küneş qavuşayata edi. Qaravulnı körgeninen, ökünip ağlap yiberdi.

– Ne oldı, oğlum, nege ağlaysıñ?

Tair qoltuğındaki qavunnı qaravulnıñ aldına qoydı.

– Anam evden quvdı, bar, qavunnı alğan yeriñe taşlap kel,– dedi.

Qaravul, balanıñ ruhiy azabını añlap, başını sıypadı:

– Anañ doğru aytqan, oğlum, hırsızlıq çirkin şey. Bar, endi, qayt. Anaña ayt qabaatıñnı tanığanıñ içün bu qarpıznı saña bahşış berem.

Tair quvanıp, bar küçünen evlerine çaptı. Şeerge kirgen soñ yavaştan, bol nefes aldı. Lâkin onı ikinci bir qorqu sardı. ‘Anam babama aytsa, o meni mıtlaq cezalar’,– dep





tüşündi. Qorqa-qorqa evge kirdi. Tairniñ bahtına, babası evde yoq edi. O, anasına sarıldı:

– Ana, babama aytmazsıñ, yahşımı?

– Baba evlâdınıñ yañlış atqan adımını bilmek kerek,– dedi.– Babañnıñ ögünde de qızarırsıñ, bir daa böyle iş yapmazsıñ.

– Bir daa iç yapmam, anaçığım!

### Sual ve vazifeler:

1. Balalar qayda barmağa niyetlendiler?
2. Olarğa kim qoşuldı?
3. Qaytacaqta Murat ne teklif etti?
4. Olar ne yaptılar?
5. Olarnı qaravul tuttımı? Tair daa ne yapmağa istedi?
6. Anası Tairge ‘közüme baq’ degende neni bekley edi? Ya Tair nasıl cevap berdi? O, öz qabaatını tanıdımı? Qabaatını duyudurmaq içün, anası Tairni hırzlağan qavunınen qayda qaytara?
7. Tairnen qaravul arasında olğan dialognı tapıp oquñız. Tair ne içün quvanıp evlerine qayttı?
8. Nasıl adamğa hırsız derler? Birevniñ şeyini soramayıp almaq mümkünmi?
9. Tair bir daa böyle şey yaparmı? Oña neler ibret oldı?
10. Siziñ fikriñizce doğru olğan cevapnı saylañız. Bir şeyge baqmadan Tair yüregiñizge yaqındır, çünki:
  - a) qavunlarnı bahçadan hırsızlamağa o, teklif etmedi de;
  - b) o, yapqanına samimiy peşman etti, ayıp oldı.
11. İkâye nege öğretet?
  - a) iç düşünmey, dostlarıñız yapqan kibi yapmaqtır;
  - b) yaramaylıqqa qarşılıq bildirmege bilmektir;
  - c) yañlışlıq yapsañ da, ahır-soñu doğru bir neticege kelip, vaziyetni deñiştirmek mümkün.
12. İkâyeni röllerge bölip oquñız.

13. Manadaş söz sıralarını oquñız ve aqlıñızda qaldırıñız:  
qora – isar – ör – çalman.
14. Aşağıdaki atalar sözleriniñ manasını ikâye yardımını açıklamağa tırışıñız.  
Hırsızlıq bir yımirtadan başlar.  
Hırsızlıq da bir zenaat, onı da öğren, lâkin yapma!  
Hırsıznıñ ağzı aytmasa, közü aytır.  
Hırsızlıqtan oñsa, başta sıçan oñar edi.
15. İkâyeni, aşağıda berilgen planğa esaslanıp beyan etiñiz.

### Plan

1. Balalar bostanda qavun hırsızlaylar.
2. Tair evge qavun ketire.
3. Tair qavunı bostanğa qaytara.
4. Oğlan quvanıp evine qayta.

### Sarf

#### İsim: türlenüv

Cümledeki sözler özara sual vastasinen bağlanıp kelir. İsimlerge ait bu sual bizge olarnıñ kelişini, yani qaysı yalğama kerek olğanını tayin etmege yardım ete. Böyleliknen, isimniñ türlü kelişlernen deñişüvine **türlenüv** derler.

Baş kelişinden ğayrı episi kelişler isimniñ ya da oña munasebetini, tabiligini köstere. Şunıñ içün olar *baş keliş* kibi **doğru** degil, **vastalı** sayıla. Bu, *saiplik, doğrultuv, tüşüm, yer ve çıqış* kelişleridir.

**Baş keliş**, isim – müpteda, siyrekçe (cümleñiñ soñunda) – haber olğanını köstere: Kimsesiz *ömür* – qara *kömür*.

**Saiplik kelişi**, isim tabi ve kimge ait olğanını köstere. O, **belgili** (muayyen aitligini köstere) ve **belgisiz** ola bile (umumiyy aitligini köstere): *Ananıñ* yüregi – balada, *balanıñ* yüregi azbarda (*belgili*).  
*Mektep(niñ↓)* azbarı keñ ve yaraşıqlıdır (*belgisiz*).



**Doğrultuv kelişi**, iş-areket qayda doğrultılğanını köstere: *Eyilik-ke kemlik yapma! Eyilikke eyilik bekleme!*

**Tüşüm kelişi**, isim iş-areketini özüne alğanını bildire. O, **vastalı** (isim ve fiil arasında daa muayyenleştirici söz(ler) bar olğanını) ya da **vastasız** (fiilnen sıq bağlı olğanını) köstere, teñ.: Bağ-bağçalarda yazda *kiraz*, *vişne* ve *şeftali*, küzde – *alma*, *armut* ve *yuzum* cıyalar (**vastasız**). *Kiraz*, *vişne* ve *şeftalini* yazda, *armut*, *alma* ve *yuzumni* – küzde cıyalar (**vastalı**). (Şu cümleleriñ soydaş azalar ter-tibinde tek soñki isim şekillenmek mümkün olğanına diqqat etiñiz.)

**Yer kelişi**, isimde iş-areketniñ yer ya da vaqtını bildirmek için qullanılır: Qız *beşikte*, ciyezi *sandıqta*.

**Çıqış kelişi**, isimde iş-areket qaydan kelip çıqqanını (ya da başlanğanını) bildirmek için qullanılır: *Yamandan* yahşılıq bekleme! *Qırmısqadan* örnek al, *yazdan* qışqa azırlan!

### İhtarlar:

1. Cümle tizgende, başta çıqış kelişindeki sözni, soñra doğrultuv kelişindeki sözni kullanacaqsınız, yani başta *kimden?/neden?/qaydan?* sualine cevap bergen sözler, soñra *kimge?/nege?/qayda?* sualine bergenler keter, *meselâ*: Bir ağız**dan** çıqqan biñ ağız**ğa** yayılır.
2. Qırımtatar tilinde isimler, bir de bir areketni yapma-ğa yardım etken aletni bildire bile. Buña mahsus **-nen** munasebetçisi qullanılır. Oña daa **beraberlik kelişi** deyler, *meselâ*: Kitap qazmaq – *inenen* quyu qazmaq. *Malnen* insan insan sayılmaz.
3. İsimler mülkiyet yalğamalarinen beraber de türleñge-nini unutmañız, *meselâ*: Olacaq bala beşig**inde** belli. Oquvniñ soñ**una** çıqmağan cailden beter. Til**ini** coyğan, Vatan**ını** coyar.

⇒ **1-ış. Cümlelerni yazıñız. İsimlerge kerek yerde keliş yalğamalarını qoşuñız. Kelişlerni ve olarñıñ çeşitini belgileñiz.**

**I.** 1. Oca talebelerniñ cevapları.. diñley. 2. Tatil vaqtında sınıfımız.. seyaat yaptıq. Ziyaret etken Bağçasaray şeerii.. pek begendik. 3. Raatlağanda, adamlar muzıka.. diñlemege seveler. 4. Alime tükândan yañı anterler... almaq istey. 5. Cafer yañı cinsler.. begendi.

**II.** 1. Tünevin biz Yalta.. istiraat bağçası.. kezdik. 2. İstanbul.. benim dostlarım yaşay. 3. Mektep.. kütüphanesi.. talebeler kitap, gazet ve mecmualar.. oquylar. 4. Kyivde çoqusı ‘Musafir’ qavehanesi.. aşamağa seve. 5. Osman er kün saba saat yedi.. uyana.

⇒ **2-ış. Suallerdeki esas sözlerniñ kelişini tayin etiñiz. Olarğa ağzaviy şekilde tolu cevap beriñiz.**

**I.**

1. Siz şimdi qayda yaşaysız?
2. Siz evel qayda yaşay ediñiz?
3. Siziñ ana-babañız qayda yaşay?
4. Qartbaba-bitalarñız qayda yaşay ediler?
5. Ya olar doğma qaysı yerdenler?

**II.**

1. Siz ne aşamağa sevesiz?
2. Siz qayda raatlanmağa sevesiz?
3. Siz kimnen qonuşmağa sevesiz?
4. Siz qayda laf etmege sevesiz?
5. Siz ana tilimizni kimden ögrenesiz?
6. Siz ana tilimizni qaydan ögrenesiz?

**III.**

1. Eviñiz qaç odadan ibaret? Siziñ odañızda neler bar?
2. Kitap ve defterleriñizni siz qayda tutasız?
3. Urbañızni qayda tutasız?
4. Siz qayda aşaysız?



#### IV.

1. Siz kimlənən sıq körüşesiz?
2. Siz haberlərlən kimnən paylaşasız?
3. Siz angi müelliflərlən meraqlanasız?
4. Oquvdañ ğayrı siz daa nenen meraqlanasız?

#### V.

- |                                      |  |
|--------------------------------------|--|
| 1. Siz qayda seyaat etmege sevesiz?  | 1. Siz qayda baracaq olasız?                                 |
| 2. Siz qayda bulundıñız?             | 2. Siz angi meraqlı yerlerde bulunacaq olasız?               |
| 3. Siz keçken yılı qaydan qayttıñız? | 3. Siz dost ve tanışlarıñızñı qaydan kelgenlerini bekleysiz? |

#### Ev işi

1. Şu aftaññ devamında yapılmağan işlerden bir qaçını daa yapıp (ya da qullanmalardan faydalanıp), öz misalleriñiznen tamamlañız.
2. Nazariy malümatnı aqlıñızda tutuñız.
3. A. Dermenciniñ 'Hırsızlıq' ikâyesine sade plan mustaqil tiziñiz. Mündericesini şu plan boyunca beyan etiñiz.
4. İkâyeden er bir kelişke misal tapıñız. İsimlerge sual berip, añlatqan manalarını tayin etiñiz.
5. Cümlelerni yazıñız.

I. 1. Studentler (ana-babası) mektüp yazalar, fotosu-retlerini yollaylar. 2. Sergey Korabelnikov (dostları) resim yaptı. 3. Ana üyken (oğlu) nasiatlar berdi. 4. (Sportçular) er kün stadionda idman etmek kerek. 5. Reşat (dostlar) sürpriz azırladı. 6. Aqıqiy qaranlar (ğurur) lâyıqlar.

II. 1. Aliye (dostu) kontsert aqqında ikâye ete. 2. Fikret ukrain (qızlar) özünüñ milliy ananelerini tarif ete. 3. Balalarınñ episi (babası) öz (arzuları) sıq paylaşa. 4. Askerler (ösmürler) nasıl (hızmet etkenleri) pay-

laştılar. 5. Talebeler (oca) (sualləri) cevap bermege tırışalar.

- III. 1. Sakinler (qurucılar) yañı evleri içün teşekkür bildirdiler. 2. Ukraina qomşu memleketlerine (icretçiler) yardım etkenleri içün teşekkür bildirdi. 3. İntervyu bergende yırcı öz (arzuları) bildirdi. 4. İş adamları (akimiyet) öz isteklerini bildirmege tırıştılar. 5. Hasta (ekim) teşekkür bildirdi.

### Qoşma metin

#### Uraşima Taro *japon halq masalı*

Bir zamanda bar eken, bir zamanda yoq eken, Uraşima Taro adlı yaş bir balıqçı öz anasinen yaşay eken. Bir kün plâjda o, balalar qaplıbaqanı urğanlarını köre.

– Toqtañız! – dep qıçıra olarğa Uraşima.

Balalar:

– Ne içün toqtayıq? Biz onen oynaymız daa,– dep cevap bereler.

Uraşima:

– Ya qaplıbaqa istemey de! Men sizge para bereyim, barıp başqa bir yerde oynañ,– dey de, olarğa bir torba para bere.

Balalar ketken soñ, qaplıbaqa Uraşımağa öz teşekkürini bildirip, evine davet ete. O:

– Men seni öz evime alıp keteyim, üstüme otur,– dey.

Uraşima qaplıbaqanın üstüne mingen soñ, beraber deñiz içine dalalar.

Deñiz içinde Uraşima ne içündür serbest nefes almağa başlay. O, deñiz altında güzel bir kermenni köre.

Qaplıbaqa:

– Uraşima bey, bu, Rügu kermenidir. Bizim kermenimizdir,– dey.

Rügu dölber, mühteşem bir kermendir. Anda daa çoq balıq, sekizayaq, kalmarlar hızmetçi olıp çalışa. Baş zalda Uraşima şahzade Otohime ile tanıştı. Otohime şimdi bayram başlaycağını ayttı.

Uraşimanıñ öğüne pek çoq tatlı aşlar ketire, etrafında ise balıqlar oynap yırlamağa başladılar. Ortalıq şeñlik toldı. Uraşima iştianen aşlarınñ dadını baqa, oyunlarını seyir ete, yırlarını diñley.

Biraz vaqıttan soñ Uraşima aqlına anasını ketire ve Otohimege, evge qaytmaq kerek olğanını ayta.

Otohime:





– Yahşı. Lâkin bundan evel bahşışlar merasimini ötkereyik. Baq, bu qutunıñ adı Tamatebakodır. Onı bir vaqıt açma saqın,— dey.

Qaplıbaqa Uraşımağa oğurlı yollar tilep, deñizden qarağa ozğardı.

Plâjda Uraşıma hucur bir şeylerge rastkele. Şeer manzarası oña bam-başqa olıp körüne. ‘Ne içün öyle oldı ya?’ dep, tüşünerek evine qayta.

Lâkin evi olacaq yerde de bir şey körmey.

– Evim qayda ya? O, ne içün yoq? Anam?! Siz qaydasız?’— dep şaşmalay.

Soñ bir adamnı rastketirip, ondan ‘Siz mında bir vaqıtları bir ev turğanını bilesizmi?’ dep soray.

Şu adam:

– Evmi? Aysa. Lâkin o, pek eski zamanları tura edi. Men şu evde yaş bir adam ve onıñ anası yaşığanlarını eşitken edim. Lâkin künlerniñ birinde o yaş evge qaytmay. Anası beklep-beklep otursa da, oğlu qaytmay. Ana ölgen soñ, evleri de yoq olıp kete,— dey.

Bunı eşitken soñ Uraşıma, Rügu kermeninde ‘az bir vaqıt’ yaşığanı aslında bayağı vaqıt keçkenini añlay...

O, ne yapacağını bilmey. Şu daqiqada aqlına Tamatebako kele. Otohime onı açmağa yasaq etse de, Uraşıma ümütini coyğanından, şu dülber bir qutunı açmağa qarar ala.

Tamatebakonı açqan soñ, içinde qoyu beyaz tuman çıqmağa başlay...

– Vay, ya bu ne?..’— şasıp qala Uraşıma.

Tumandan çıqqan soñ, saçları bem-beyaz, beti de bürüşik ola, beli de qamburlaşa. O, qartaya.

– Maña ne oldı ya? Men bir şey añlamadım’,— tek aytmağa qaldı oña.

*Hirano Takaşiniñ tercimesi*

- 1. Masal ne aqqında?



### Qırım armutları

*Ablâziz Veliyev*

Komendant rejimi lâğu etilgen soñ, çaresi olğanlar, istegen yerlerine barıp başladılar. Tacikistanda yaşağan Seitümer dayı da geceleri toqtamay tüşlerine kirgen tuvğan köyünü ziyaret etmekni çoqtan arzulay edi. Niayet maqsadına irigen.

Tuvğan köyüne barıp kelgen soñ, İzzet torunu Taşkentke ketkende:

– Mınavı selâmımnı Afife alaña alıp barıp berse. Seitümer emcem Qırımğa Otuzğa barıp kelgen, bunu andan kettirgen, Afife alaña ber, angi bağçadan ekenini özü bilir, dep ayttı, deseñ olğan, özü bilir,– degen.

İzzet ağa Taşkentke kelgen soñ, emanetni, Seitümer dayı aytqanı kibi tariflep, Afife alasınıñ qoluna tutturdı.

Afife apte yavluçıqnı qolları qaltıray-qaltıray, yavaştan çekdi. Onıñ içinde dört dane armut tura edi.

– Vay, bu bizim Qurban qaya etegindeki bağçamıznıñ eñ yuqarısındaki bera armutından da! – dedi Afife apte.

Olardan birisini eki avuçı arasına alıp sıypadı, qoqlap baqtı, soñ közlerine sildi. Şu ande közlerinden boyuncaq kibi yaşlar tıgırıp başladılar. Aqırından minder üstüne oturıp:

– Rahmetli babam oturtqan, er vaqıt Memedlâ ve Cemal ağamlar quyudan qopqanen suv taşıp suvarğan terekniñ meyvası,– dedi yılmayıp, teren köküs keçirerek. – Sağ olsun Seitümer ağam, sağ ol, İzzet! Aydı, o tereklerini oturtqan rahmetli babamnıñ, suvarıp östürgen ağamlarnıñ ruhuna bir dua eteyik, Amin...



## Luğat

aqırın – *тихо, повільно*

arzulamaq – *мріяти*

köküs keçirmek – *перевести подих*

lâğu etmək – *скасувати*

maqsatqa irişmek – *досягти мети*

emanet – *те що залишено на зберіганні*

## Sual ve vazifeler

1. İkâye 'komendant rejimi lâğu etilgen'inen başlana. Bu, halqımızınñ angi facialı vaqialarınen bağı olğanını ocañızdan biliñiz. Bundan ğayrı, ikâye qaramanı Seitümer dayı, tamam şu rejim lâğu etilgen soñ tuvğan köyünü ziyaret etip olğanını añlamağa tırışıñız. Ve niayet, köyni baqıp, ne içün qalmaq, qaytmağa mecbur olğanını da añlarsıñız.
2. Seitümer dayı qaysı köyge barıp kelgen?
3. O, Afife ala armutlarınñ angi bağçadan olğanını ne içün 'özü' bileceginde emin edi?
4. Afife apte armutlarını ellerine alğanınen ne yaptı?
5. Ketirilgen armutlar Afife ala içün ne qadar qıymetli olğanını duyğu ve areketlerinen tasdiqlañız.
6. Terekniñ tarihını ikâye etiñiz.
7. Afife ala öz minnetdarlığını nede bildirdi?
8. Atalar sözleriniñ angisi (ya da angileri) bu ikâyege eñ yaqındır?
  - a) Vatan – küneşten güzel, altından qıymetlidir.
  - b) Tuvğan ilniñ yeri – cennet, suvu – şerbet.
  - c) Vatan sevgisi – sevgilerniñ eñ büyügidir.
  - ç) Vucut qartaysa da, gönül qartaymaz.
9. Oqulğan ikâye ne aqqında?
  - a) adamlar biri-birini armutlarnen sıylağanları aqqında;
  - b) aqıl da daima qalğan Vatanğa asret çeküvden yanuv aqqında.

10. Metinni oquyıcınıñ mevamından ikâye etiñiz.  
11. İkâyenin devamı içün öz rivayetiñizni yaratıñız.

- ⇒ Siz baba-dedeleriñizniñ tuvğan yerleri aqqında ne bilesiz? Oturğan yerlerinde halq nenen oğraşqanı aqqında malûmat azırtañız. Buña sizge ana-babalariñizniñ ikâyeleri, qorantañızda qalğan fotoresimleri yardım eter. Sınıfta çıqış yapmağa azırtañız.
- ⇒ İnternette ‘Aile degerlikleri’ yarışınen bağı malûmat tapıñız. Çıqışlarğa qıymet kesiniz. İleride iştirak etmeñizni tüşüñiz.

### Sarf

#### İsimlerde sayı, mülkiyet ve haberlik.

#### Mana ceetinden çeşitleri (has ve cınıs, canlı ve cansız isimler)

İsimler bir ya da bir qaç predmet ve şeylerni bildire bilir. Buña köre olar teklikte ya da çoqluqta kullanılır. Çoqluqta isimlerge **-lar/-ler** yalğamaları qoşulır:

kitap+**lar**; oda+**lar**; iş+**ler**; köz+**ler**

Aqılda tutuñız: saat –saatler, yuzum – yuzumler, yuz – yuzlarnen

Lâkin sayılarnen ve çoqluqni bildirgen sözlernen beraber kelgen isimler teklikte kullanılır, *meselâ*: beş defter, çoq adam, büyükten-büyük teşekkür, biñlarnen asker, dünya qadar iş.

- ⇒ **1-iş. Berilgen sözlerni çoqluqta yazıñız.**

Pencere, deñiz, yurt, tarla, qalp, soyad, köz, til, tiş, tüş, baar, sual, subet, ağa, ağam, kürsün, evimiz, ana-babañız, oquv yurtu, köpçek, göl, divar, türk, amerikalı, qırımtatar, ukrain, çin.

- ⇒ **2-iş. Yuqarıda berilgen isimlerni *bayağı, bir çoq* kibi sözler ve sayılarnen kullanıñız. Teşkil etilgen birikmelerini yazıñız.**

Bilgeniñiz kibi, isimlerniñ kimge, nege ait olğanını bildirmek mümkün. Buña biz **mülkiyetni** kullanamız. Onıñ mahsus, teklik ve çoqluqta 1-ci, 2-ci ve 3-ci şahısta, yalğamaları olğanı da sizge bellidir. Yani yalğamalar sözniñ soñki sozuğı ve tutuğına, em de dudaqlı/dudaqsız olğanına baqı-

löp qoşulır, *meselâ*: at – atım, söz – sözün, ev – evi, dost – dostuñız, oca – ocamız, tata – tataları. (*Soñki misalge diqqat etiñiz*: sözge başta çoqluqnı bildirgen yalğama, soñra mülkiyet yalğaması qoşulır. Tek bazıda, sayğı bildirmek için, başta mülkiyet yalğaması keter: ağamlar, dayımlar.)

Bundan ğayrı, sizge şunu da hatırlatmaq ister edik ki, söz mülkiyet yalğamasınıñ artından keliş yalğamasını da qoşa bile. Lâkin bu alda soñkisi biraz deñişmelerge oğray bile, *meselâ*: anam+ğa – anama, köydeşiñ+ge – köydeşiñe, dayısı +ğa – dayısına. (*Soñki misalge diqqat etiñiz*: qoşma n, eki yalğamanı bir-birinen bağlamaq için peyda ola. Daa misaller: evinden, yüzünde, qapularına, soylarında, sözlerinden. Demek, bu deñişme qaysı şahısta ve kelişlerde bar olğanını añlağandırısıñız?)

⇒ **3-iş. Böyle suallerge cevap berıñiz. Cevaplarıñızda mülkiyet yalğamalarını (ve, kerek olsa, öz zamirini) qullanıñız.**

1. Siz iştimaıy ağlarda sıq kimge haberler yazasız?
2. Raatlıq künlerini qayda keçiresiz?
3. Bayramlarnen kimlerni hayırlamaq borclusız?
4. Boş vaqtıñıznı kimniñ mütinde keçirmege sevesiz?
5. Oca dersni anlatuvda kimge muracaat ete?
6. Ekim kimni tedaviyley?
7. Bala östürüvde kimlerniñ diqqatı büyüktir?
8. Devlet akimiyeti kimniñ yaşayışını qayğırmaq kerek?
9. Oquvda siziñ angi qabiliyetiñizge diqqat ayırıla?

⇒ **4-iş. Cümlelerni oquñız.**

1. Şeer (sakinler) ev (qurucıları) teşekkür bildirdiler. 2. Ressam öz (talebeler) resim yapmaqnı öğretti. 3. İdmancı yaş (futbolcular) yañı meşğüliyetler öğretti. 4. Bizim (qaramanlar) cenk (meydan) bir şeyden qorqmazlar. 5. Aliye (dost) telefon açtı. 6. Talebeler ocanıñ (sualler) cevap tap-tılar. 7. Men uzaqta olğan (soylar) laf ettim. 8. Balalar öz (arzular) (ana-babalar) sıq aytırlar.

Cümlede haber vazifesini becergen isimler ekseriyette **haberlik** yalğamasinen qullanılır. Olar müptedanen sayıca ve şahısça uyğunlaşp kelir, *meselâ*: **Men** beşinci sınıf talebesim. **Sen** bu halqnıñ em

anası, em babası, başı**sıñ**, Keleceknıñ yıqılmaıcaq qavıy temel taşı-  
**sıñ!**..’ (A. Giraybay). Ocanıñ masasında topnen yatqan – bizim def-  
terlerimiz**dir**. **Biz** başlanğıç mektebiniñ mezunlarımız. **Siz** qırımtatar-  
larsız. **Siz** bizim kelegegimiz**sıñız**. (Em şu yalğamalar urğusız olğanı  
da aqlıñızda bardır.)

*Diqqat etıñız:* hususan 3-ci şahısta ille qullanılğan haberlik yalğa-  
maları cümlege umumen daimiylikni, resmiylikni qoşa; qalğan şahıs-  
larda haberlikni qullanılması şarttır.

⇒ **5-ış. Atalar sözlerini yazıp alıñız, haberlik yalğamalarını belgi-  
leñiz. Toqtav işaretleri qoyuluvınıñ farqına yetiñiz.**

1. At balası – attır, it balası – ittir. 2. Ateşnen suv – til-  
siz duşmandır. 3. Ahmaqqa bergen eñ yahşı cevap – süküt-  
tir. 4. Güzellik közde degil, sözdedir. 5. Dertlerge derman  
Allağa imandır. 6. Dünyada eñ qıyın şey – añlamağanğa  
añlatmaqtır. 7. Dünyada eñ yaramay şey – hırsızlıqtır, onı  
da bil de – yapma!

Metinlerde bazı isimler ne içün büyük arıftan yazılğanını siz endi bile-  
siñiz. Olar **has** isim olup, insannıñ adını, soyadını, yer, işhane ve diger  
adlarını bildire. Qalğan isimler **cınıs** sayılır. *Meselâ*, ‘Alma-Tarhan köy  
mektebi’ birikmesinde Alma-Tarhan – bu has isim, çünki köyniñ adı ola;  
köy mektebi de cınıs isimdir. ‘Süren stantsiyası’ birikmesinde Süren –  
has isim, stantsiyası – cınıs isimdir.

⇒ **6-ış. Aşağıdaki vazifelerini beceriñiz.**

1. Mektebiñizniñ tolu adını yazıñız.
2. Öz soyadıñız, adıñız ve babañızniñ adını qırımtatarca  
yazıñız.
3. Ecdatlarıñızniñ sürgünlikten evel yaşağan yerini ya-  
zıñız.
4. Qırımniñ büyük şeerleriniñ qırımtatar adını yazıñız.
5. Qırım bölgelerine ad bergen qasabalarınıñ adını ya-  
zıñız.

**Canlı/cansız** isimler ise sual vastasınca tayin etile. Qırımtatar tilinde *kim?* sualı tek adamğa aittir. Em tek olar **canlı** sayıla. Qalğan, yani ayvan, ösümlük, predmet, adise ve şeylerni bildirgen, em de abstrakt (körölmegen, is etilgen) isimler *ne?* sualine cevap berip, cansız sayıla.

⇒ **7-iş. Sözlerni oquñız. Canlı ve cansız isimlerni tayin etiñiz.**

At, boğday, söz, ana-Vatan, can, qomşu, dostlar, aqıl, özen, tarihçi, Ayder, berber, sınıf, qoyan, çayan, meydan, reis, silâ, asker, tıñlıq, ilâc, qalabalıq, Qaç, ukrainalı, meyva, quvanç, yolcu, ğalıp, ğalebe.

**Ev işi**

1. **Mülkiyet ve haberlik yağamalarını hatırlañız. Eki sözni türlendirip misal etip ketiriñiz.**
2. **Metinni oquñız. İsimlerniñ sayı, (kerek yerde şahsı) ve kelişini, em de mana ceetinden çeşitini tayin etiñiz.**

... Yeşil ada – Qırımniñ  
Acayıp bir töründe  
Basıq evçik yerleşken  
Arğın köyniñ çetinde.  
Taqır oda içinde  
Asma beşik sallana,  
Qara saçlı sabiyniñ  
Yanaqları allana.  
Ümüt bağlay yaş ana  
Bekirine, oğluna,  
Seadetlik, aq tiley  
Onıñ ömür yoluna.  
Başçığını sıypay onıñ,  
Öpe al yanağından,  
Tatlı söznen nazlandıra,  
Göñüli hoş olğanda.



Quçaqlap tınçlandıra  
Tosunçıǵı, Bekirni,  
Yıqılıp ya incınıp,  
Ökünip ağlaǵanda...

*Veliullanıñ B. Çoban-zadege baǵışlanǵan  
'Şanlı ayat' destanından*

1. İsimlerde haberlik yaǵamalarını qullanıp, 5 cümle tiziñiz.
2. 'Qırım armutları' ikâyesine plan tizip, beyan etiñiz.

### Qoşma metin

*Ğurbetlikte eñ acınıqlı olsa da,  
aǵrınen beraber qaar-qasevetke degil,  
aydın, yarıq qayǵı doğurǵan ezgilerge  
muhtac ekensiñ...*

Tünevin maña Üriye Kermençiklinen acayıp bir subet keçirmege qısmet oldı. Biz kontsertke kete edik. Üriye hanım öz qorantasinen baǵlı fotosuretlerini kösterdi. Özünüñ yırcılıq tecribesinen paylaştı. Er vaqıt olǵanı kibi, Qırım aqqında söz ketkende, yüregi eyecandan tola ve ağlay. Soñra biri-birimizge qoltutıp, yürek almaǵa tırışamız, biri-birimizge memnün olamız. Niayet külüşip-şaqalaşıp, özümüzge kelemiz. Buña daa yırlarımız yardım ete. Yanımızda oturǵan Dinara ve Rustem balaları muzıka aletlerinde çalıp, bizge qoşulalar.

*AQŞtan Ayla Baqqallı*

1. Bu metinni yuqarıda oqulǵan A. Veliyevniñ 'Qırım armutları' ikâyesinen teñeştiriñiz. Olarnıñ umumiy ve ayırdı etici çizgilerini tapıñız.
2. Bu ve nevbetteki aftanıñ qoşma metinini oqup talil etken soñ, Vatan mevzusında mulâaza inşa yazıñız.

**Vatan**  
(parça)

*Gülnara Üseinova*

Alime Qırımni körmek arzusinen yaşay edi. Qırım oña tılsımlı masal kibi körüne, dülber kiramet damlarnen örtülü evler, mavı dalğalı deñiz, saillerinde yeşil bağ-bağçalar. Qız Qırımni başqa türlü iç tasavur etip olamay. Çünki Qırımni tek renkli otkrıtkalarda kördi, em altı yaşında olğanda onı anası bir kere yazda Qırımğa alıp barğan edi. Qırım – qocaman Qara deñiz, altın qumlu plâjlar sıfatında, deñizde yuvunğan çoqtan-çoq adamlar em beyaz qutular içinde yeşil ve sarı marmeladdan yapılğan sansar ve tavşanlar şeklinde aqlında qaldı. Balalığında şu Qırımniñ plâjlarında Alime deñizge sevda oldı. Onıñ salqın suvlarına batıp-çomıp, özünü soñsuz bahtlı is etti. Qara deñizni bütün ömür tüşünde kördi. Deñiz – mücize, balalığınıñ temsili olıp qaldı.

Şu Qırımniñ tasviri Alimeniñ ömründe müim yerni ala edi, çünki bitası, anası, babası da, Qırım aqqında Alimege çoqtan-çoq ikâye ettiler ve onda Qırımğa bitmez-tükenmez sevgi aşladılar.





## 30-NCI AFTA

### Sarf

#### Sıfat: umumiy manası, deñişmemezligi, yapılıvı

Qırımtatar tilinde **sıfat** deñişmegen bir söz çeşiti sayılır. Demek, o:

- **türlenmez**: Bağçada terekler *beyaz, pempe, al, sarı* ve *al* tüste çek açtı;
- **çoqluqta qullanılğan alda, isimni bildirir**: *Şeerliler* Mustaqillik meydanına çıqtılar. (*Böyle kibi sıfatlar teklikte de isim vazifesini becerir.*)
- **özüne haberlik yalğamalarını almaq mümkün**: Er kesten *güzelsiñ!*

Sıfatlar ekseriyette **-lı(q)/-sız, -iy, -(da)ki** ve diger yalğama ve tamır qoşuluvi ile yapılır, *meselâ*: tatlı, bereketli, açuvlı, tuzsuz, nuqsansız, qışlıq, küzlük, üylelik, evdeki, yazdaki, tünevinki, içki, sınıfı, siyasiy; halqara, milletsever, himiyeviy, qırıq, yanıq, campiçim ve il.

Demek, **nasıl? angi?** suallerine cevap olıp, sıfatlarınñ umumiy manası **alâmet** bildirüvdir. Keniş manada alâmetke *renk, al, şekil ve kölem, tabiat hususiyetleri, yer ve vaqıtqa munasebeti* kire.

Bundan ğayrı, tamam sıfatlar nutqumızñ zengin ve hoş yapar, olar vastasinen şeyler aqqında berilgen malümat tam ve daa doğru kelir, şunıñ içün söz baylığımız ille olar ile tolmaq kerekir.

#### ⇒ 1-iş. Berilgen sıfatlarınñ umumiy manasını añlatıñız.

Merametli, yaş, açuvçan, ziyankâr, boylu, taşlı, yapıq, sütlü, aq, qaverenki, temiz, amerikalı, sap-sarı, güzel-den-güzel, arıqça, ince, suvuq, tar, belli.

- Sözlerni çoqluqta qullanıñız. Manası deñiştimi? Eki çiftnen cümle tiziñiz.

#### ⇒ 2-iş. Berilgen sıfatlardan tek sizge manası belli olğanlarını seclendiriñiz. Olarnıñ alâmeti sıfatnıñ angi çeşitini bildire? Tayin etiñiz. Sıfat yapıcı yalğamasını belgileñiz.

Avropalı, ağzaviy, ağuv (meyva), ağır, adiy, aziz, aydın, aytuvlı, aqiqiy, aqşamki, allı-taqatlı, ananeviy, arbiy,



areketsiz, asiyalı, atsız-arabasız, accı, aenkli, bağlı, bağısız, balalı, bediyy, belli, belgisiz, borcsuz, bürüşik, bütün-cian, vazifesiz, vastalı, vesiqalı, virgüllü, gizli, göñüllü, al-lı-güllü, gürdeli, günâhkâr, ğaprlı, ğıdalı, davuşlı, daimiy, dayanıqsız, degerli, dereköyli, diqqatlı, dinperver, doğmuş, doğmuşsız, yekâne, yelsiz, yeñli, yolsuz, zeersiz, izinsiz, ikmetli, ilmiy, ilâ(h)iy, ineli, insaniyetli, iri, iradeli, ismiy, yipsiz, yıldızlı, yımşaq, yıldıravuq, kederli, kiyik, kirli, köl-geli, taldalı, körümlü, köterinki, köçme, küleryüzli, küskün, küçlü, kütleliy, qaviy, qaveli, qadimiy, qaideli, qayğılı, qalaylı, qamışlı, qaplı, qapalı, qapaqlı, qatlı, qaşlı, qoqulı, qumlu, quru, qurtlu, qısqa, lafazan, lekeli, mavı, manialı, merametli, mürekkep, milliy, mıhlı, nazariy, nallı, oğurlı, otlu, pervasız, paalı, raqamalı, renkli, sabıq, sağ, samimiy, saf, sevgili, sevimli, semereli, serlevalı, silâlı, sökük, soñ-suz, suvlu, tabiyy, süniy, suvuq, sızıqlı, sütlü, dağlı, taqiye-li, tahminiy, taşlı, temelli, temiz, terbiyeviy, teşik, töşekli, tiri, tınç, tüz, uzun, uzaq, ulu, utançaq, ufaq, üçköşe, fahriy, hayırlı, hayırsız, hoş, hususiy, hucur, çabik, çatlaq, çinativ, camlı, cepli, ciyezli, cilveli, cezveli, cenkli, cüyrük, şaylı, şaqalı, şallı, şansız, şimaliy, şiveli, şıfalı, ırğaqsız, ealisiz, evlâtsiz, eglenceli, eziyetli, eyecanlı, emiyetli, eybetli, eksik, ekşi, elverişi, erinçek, esaplı, eski, ecnebiy, etli, yuvasız, yüklü, yuqunçlı, yağmurlı, yağlı, yaqın, yapışqaq, yaralı, yaş, yaşlı, yahşı.

- İsimleşken sıfatlarını tapıñız. Olar ile cümle tiziñiz.

### **Siziñ qabaatıñız yoq!**

*Gülzar Dermenci*

Nafe yaş olsa da, Marğılannıñ toqumacılıq işhanesinde tikiş maşnalarını tamir etüvde usta sayıla. Qayerde qaysı bir tikiş maşinası bozulsa, o yerge deral Nafeni yollaylar. Em de o, tikiş maşinasını cıymağa ve oña kerek aletlerini



özü işləp çıxarmağa da bile. Bu işhaneni endi Nafesiz tasavvur etmək pek qıyın.

Böyle ustalıqnı o qayerden, kimden ögrenen, aceba? Sürgün etilgen qırım halqı ecnebiy illerde de ğayıp olmadı. Çünki halqımızınñ ömürge em de özüne işançı taşqınnı aındıra. Halqımız işkir ve nasıl vaziyetlerde olmasın, arını-namusını coymadı. Onıñ içün de halqımızın kimseler yoq etip olamaz.

Bu qıyın yıllarda, sürgünlikte, Nafe şu işhaneye adiy işçi olaraq qabul olundu. Halqımızınñ ise ğurbetteki yaşayışı endi-endi durulıp başlağan edi.

Bir künü Nafeni işhaneniñ başı çağırıp, bilgisini mükemmelleştirmek içün merkezge yolladı. Nafe yoq demedi.

Trenge biletni işhane alıp berdi. Bileti mücibi yeri küpede edi. Naye demiryol stantsiyasına keldi. Elinde bir kiçkene cemidandan ğayrı bir şey yoq. O, çaltlıqnen vagonğa kirip, öz yerine yerleşti. Soñ tışarığa çıqtı. Trenniñ köçüvine daa yarım saat vaqtı bar edi. O bufetke aylandı. Soñ vagonğa minip, küpege kirdi ve birden şaşmaladı: küpede endi daa üç kişi peyda olğan. Özleri de arbiyler. Urbalarından körüne. Nafe kirgeninen, olar da oña baqtılar.

Arbiyler güzel yatıp yerleşkenler. Pencere öğündeki masaçıq üstünde türlü yemekler, açılğan konserva qutuları. Olar Nafeni de sofraya teklif ettiler.

Nafe arbiylerni körip, özünü raatsız duydu. Qomşularını çoq beğenmedi. Onıñ içün tekliflerine minnetdarlıq bildirip, kupeden çıqıp ketti. Bayağı vaqt vagonnıñ koridorındaki pencerelerniñ birisinden ep deñişip turğan manzaranı seyir etti. Birazdan kene kupege kirdi. Oturdu. Aralarında tanışuv başlandı. Arbiyler öz adlarını aytqan soñ, Nafeniñ adını da soradılar. Qayda ketkeninen meraqlandılar.

– Men oquvğa ketem. İşhaneden bilgimni arttırmağa yolladılar, – dedi. Utansırıp, özünü ep çetke çekti.



– Adıñ meraqlı. Bizim adlarğa beñzemey. Qaysı millet-tensiñ? – dep soradı arbiylerden biri, polkovnik. Olarnıñ üçü de polkovnikler.

Nafe halqımıznıñ alını bularğa çoq bildirmege isteme-yip, milletini gizleycek oldı. lâkin soñ ğururnen:

– Men Qırımданım! – dep cevap berdi.

Arbiyler biri-birine baqıştılar. Lâkin özlerini bir şey ol-mağan kibi tuttılar. Soñ olarnıñ birisi kene de:

– Kel, qardaşım, biznen beraber otur,– dedi.

Nafe, o şay degen soñ, barıp masaçıq yanına outrdı. Laf qızğınlaşıp ketti. Nafe çoqusı indemey otura. Laflarına ki-rişmey. Birazdan polkovnik:

– Bilesiñmi, qardaşım, bu deportatsiya oluvıñızda siziñ, qırım halqıñıznıñ iç de qabaatı yoq. Siziñ Vetanıñız güzel Qırım olğanı, siziñ yeriñiz olğanı qabaatıñızdır,– dedi.

Nafeniñ közlerine yıldırım çabıkliginen közyaşları aqıp keldiler. Nefesi tutulğan kibi oldı. Lâkin o, alını iç de kös-termedi. Özünü elge aldı.

Arbiyler ise bir şey olmağanı kibi kene aşadılar, laf et-tiler.

‘Ebet, olarğa az sayılı qırım halqınıñ sürgünlik netice-sinde azaplanğanı, bu ğurbet yerlerde çekişip ölgeni, Veta-nına asret olğanı ne kerek? Olar – büyükler, olar laf etken-de, er bir diger milletlerni aşağı seviyede sayıp laf etmege alışqan ağalar. Olarğa er şey mümkün yapmağa’,– dep tüşündi Nafe ve: ‘Mına şimdi aralarında tesadüfen bulunğan men kibi qırım yigitiniñ közyaşı, yürek ağrısı da kerekmey. Çünki, eger de kerek olsa edi, olar, ağalar, halqımıznıñ aqqını çoqtan tikler ediler, onıñ devletini, ükümetini qay-tarıp berir ediler’.

Nafe böyle alğa rastkelgenine pek asabiylendi...

‘Ah, qana bizim halqqa da böyle yardım etken tapılsa edi! Öz evimizni yañıdan qursa edik!’ Nafe qıçırmağa istedi.

Tren ise ep ögge ketti – yarıq ufuqlarğa doğru.

## Luğat


azaplanmaq – страждати  
arbiy – військовий (прикм.)  
asabiylenmek = açuvlanmaq  
gizlemek = *mında*: saqlamaq  
ğurbet yerler – *чужина*  
ğururnen – *з гордістю*  
deral – *негайно*  
mükemmelleştirmek – *удосконалювати*  
bileti mücibi yer – *місце згідно квітку*  
tamir etüv – *ремонт*  
tasavur etmek – *уявити*  
tesadüfen – *випадково*  
toqumacılıq – *ткацтво*  
ükümet – *уряд, влада*  
çalıh – *швидкість*

Tuvğan köyümüzge qayıp kelgenime üç ay toldı. Qırmızı kirametnen qaplı eski evimiz daa tura. Saqlanğan. Bozmağanlar. Omramağan. Lâkin onıñ içinde kelmeşekler yaşaylar. Başta olarğa bu bizim evimiz olğanını añlattım. Soñ rica eterek, onı maña satıñız, dep yalvardım. Kesen-kes red ettiler. Hususan qoranta saibi itiraz etti. İç de qail olmay. Olar yaşağan evde men doğdım, azmı-çoqmı, bala olsam da, baht kördim. Ana-babamnen beraber yaşadım. Menim için kerçekten de o pek qıymetli ev.

*Tair Halilovdan*

## Ev işi

1. 2-ci işteki sıfatlardan manası belli olmağanlarını luğat yardımınen öğreniñiz. 5-inen cümle tiziñiz. (Özüñizni sözler sıfat olğanını tercimedede degil de, yalğama bildirgeninde qandırırıñız.)

- 
2. Şu işteki 10 sözge manadaş, qarama-qarşı manalı ve, bundan ğayrı, 2–3 addaş söz tapıñız.
  3. Yaqınlarıñıznıñ (ana-babañıznıñ, qartbaba-bitalar, tanışlarıñız ve dig.-niñ) tabiat çizgilerini ifadelegen sıfatlarını yazıñız.
  4. Şöyle suallerge ağzaviy cevap beriñiz (bir kaç sıfatnen):
    - Paytahtımıznıñ merkeziy meydanı nasıl?
    - Ukrainanıñ topraqları nasıl?
    - Qırımnnıñ bağ-bağçaları nasıl?
    - Yaşağan yeriñiz nasıl?
    - Begengen kitabıñız nasıl?
    - Siz oquğan yurtuñız nasıl?
  5. Dostuñıznıñ tısqı qıyafetini (boyunı, közlerini, burnunı ve il.) ve tabiatını (aqlını, areketlerini, munasebetini ve il.) tarif etmege tırışıñız.

### Qoşma metin

#### Şaziye Aliyeva öz tuvğan köyüne qayıtıp olamadı

Albat yanındaki güzelden-güzel bir Kermençik köyü – Sa-ziye Aliyevanıñ ana-Vatanıdır. O, mında 1935 senesi doğğan. Sürgünlükten evel Kermençik būs-bütün bağçalar içinde, pek zengin edi. Lâkin cenk Şaziye hanımnnıñ qorantasını tuvğan topraqlarından ayırdı. ‘Üç ağam cenkte ğayıp oldı... Bizni köy-den çıqardılar. ‘Uruş olacaq, köyni boşatıñ’ dediler. Soñ qoran-tamıznen (men o vaqıtta bala edim) Ayırgül köyüne alıp ket-tiler. Anda bir adamnnıñ evinde oturdıq. Aşamağa da şeyimiz yoq edi. Biz menden büyük eki ağamnen beş adam edik. Olar bir yerlerge barıp, bir şeyler ketire ediler. Ana böyle yaşadıq.’

Qırım azat etilgen soñ, qoranta, öz evine qayıtıp yaşama-ğa çaremiz olur dep, quvana edi. Lâkin 18 mayısnnıñ sabası gapu uruldı.

‘...Köyde yaşağan milletimiz o vaqıt rusçanı da bilmey, tek babamız bile edi. O, cenkler körge adam. O dedi: ‘Ba-lalar, tez turuñ, kiyiniñ, çıqacaqmız.’



Süren stantsiyasından qorantanı Mari Cumhuriyetine sürgün ettiler. Olar İdil boyundaki bir qasabağa barıp tüştilər. Anda sürgün etilgenlerni bir baraqqa ekişer-üçer qoranta yerleştirdiler. ‘Şu baraqta tek ortada bir soba bar edi. Biz çıplaq-mız... Balalarğa ne mektep bar edi, ne daa bir şey. O yılı qış pek suvuq edi... Soñ ağaçtan bir bina qurıp, mektep açtılar. Bizge 4 sınıfı bitirmege qısmet oldı, çünki başqa mektep yoq edi.

Anda er kes terek yıqtıruvda, ağaç azırlavda çalışa edi. Yürüp olğan, bala-çağa – episi işke çıqa edi dağğa. O vaqıt er şey elnen yapıla edi...’

Bir qaç yıldan soñ qoranta Özbekistanğa köçip oldı. Anda Şaziye hanım aqayğa çıqıp, eki qız östürdi. 1993 senesi qorantasinen Qırımğa avdet oldı. Şimdi o, balalarinen Aqmescit bölgesinde yaşay. Onıñ 4 torunu ve torunnıñ balaları bar. Keçken musibetlerni hatırlaraq, o, öz halqınıñ küç-iradesi ve emekseverliginden ayrette qalğanını ayta, çünki ‘o, yoq olmay, sağ qalıp, ana-Vataninen qavuşqan.’

*Crimean Tatars*

- Siziñ qorantalarıñızniñ bu facialar aqqında öz ikâyeleri bardır. Tarifiñizni ikâyeniñ ardı-sırası kibi azırlañız. Demek, başta oquğan ikâyeniñizni planını tizip, soñra şu plan boyunca şahsiy ikâyeniñizni keliştirip tertip etecektirsiz. Bundan ğayrı, icadiy eserniñ başında ola bile. Bu işke âyırı körgen epigraf (başsöz) böyle olmalı:

Çekil,  
quyumdan bir yutum suv içeyim.  
Yandım!  
Araredden patladı dudaqlar.  
Çekil,  
tuvğan bosağamdan keçeyim –  
seniñ degil,  
Menim, benim bu duraqlar!

*S. Emin, 1991 s.*





### Gidroportqa seyaat (qısqartılğan)

*R. Fazıl, L. Sofudan*

1934–1935 seneleri. Memleketniñ er yerinde, şu cümleden Qırımda da, mektep talebeleri, yaşlar Vatannı qorçalav işine azır olmaq içün beden terbiyesine, kütleliy sport körünüşlerine faal sürette celp etilgen devir.

O vaqıtta Alupkada türlü sport inşaatlarinen donatılğan büyük stadion ya da sport seksiyaları yoq edi. Lâkin çeşit sport meydanları çoq. Sanatoriy yanında ise yengil atletika seksiyası da bar edi. Amethan dostlarinen mına bu yerde çoq oğraşa. Mektepte ve sport tögereklerinde faal sürette iştirak ete. 100 metr ve 200 metr mesafege çapuvda, uzunlıqqa ve yükseklikke sekirüvde Ametke ve Abduramanğa yeter yoq edi. Yahşı çapqanları içün olarğa Yaltadan mahsus ‘şipovkalar’ alıp kelgen ediler. Böyle ‘şipovkalar’ tek olarda olğanına ğururlana ve yahşı netice köstermek içün çapuvnen çoq oğraşalar.

O vaqıtta Alupka üzerinden sık-sık gidroplan degen uçaqqlar uçıp keçe edi. Olarda köpçek yerine mahsus çanalar bar. Bu çanalar vastasinen olar suv üstüne qona ve suv üstünde de köterileler. Bu uçaqqlarnıñ uçuvı balalar içün büyük vaqia ola. Uçaq ketken soñ olar onıñ aqqında daa çoq laqırdı ete, onıñ nasıl uçqanı, ne içün yerge yıqılmağanı, nasıl köterilgeni, nasıl qonğanı hususunda qızğınlıqlan dava eteler. Bu qızğın davalarnıñ teşebbüsçisi de, eñ faal iştirakçisi de Amethan ola.

Bir kere o öyle qızıştı ki, öz fikirlerini isbat etmek maqsadinen balalarğa muracaat etip:

– İsteseñiz, yürüñiz Yaltağa Gidroportqa barayıq. Epsini öz közümüznen körermiz,– dedi.



– Cayavmı? – dep soradı balalardan birisi.

– Ya ne? Eki saatte barırmız.

Amethan teklif yaptımı – o şey mıtlaqa olacaq. Şay olıp kelgen. Şimdi de bir qaç bala ‘uzaq’ dep teklifni red etse de, Abduraman, Eskender ve daa üç oğlan Amethanğa qoşulıp Yaltağa yönediler.

Gidroport Yalta körfezinde edi. Balalar onıñ kenarına yaqınlaşıp, közlerini uçaqlarğa tiktiler. Anda olğan areketler öyle meraqlı ki, olar dünyasını unuttılar: uçaqlar çağalla kibi yavaş avelep kelip çanaları ile suv üstüne qona ve mahsus iskelege kelip toқтаğan soñ içinden adamlar çıqalar. Olarnıñ yerine başqaları mine. Soñ birazdan uçaq kene yerinden köçip, qayıq kibi yaldap ögge yüre ve birden suratını arttırıp vıznen yuqarığa avağa köterilip kete.

Amethannı er şey: adamlarnıñ nasıl tüşkeni, nasıl mingeni; kabina içinde nasıl yerleşip oturğanları, anda elerinen nasıl areketler yapqanları, uçaqlarnıñ nasıl etip qonğanı ve nasıl köterilgeni meraqlandıra. Bu onıñ bütün fikirlerini celp etip alğan ayrıca dülber manzara edi.

Bu güzel manzaranı, bu seyaatnı balalar öyle begendiler ki, atta endi aqşam üstü olğanı ve qursaqları çoqtan aç olğanını da duymadılar.

Evge katernen qayttılar. Bu da Ametniñ teklifi edi. Yol da olar öz körgenlerini biri-birine tarif etip evelki davalarınıñ bir talayı çezilse de, fikir alışıp berişüv neticesinde yañı davalar peyda oldı.

### Sual ve vazifeler

1. Amethan kim olğan? O bütün halqqa nasıl insan olıp tanıldı?
2. O nasıl qaramanlıq kösterdi?
3. Amethannıñ balalığı qayda keçti?
4. Eserde uçaqnıñ angi çeşiti aqqında ikâye etile? Onıñ uçuv hususiyetlerini tarif etiñiz.

5. Yaltağa balalar nasıl barıp çıqtılar? Bu, neni bildire?
6. Amethannı uçaqta nesi meraqlandıra edi?
7. Dostlar evge nasıl qayttılar? Fikirleri ve arzuları nenen bağılı edi?

⇒ **1-iş. Oquñız. Metinde rastkelgen sıfatlarınñ derecesini tayin etmege tırıñız. O, nasıl teşkil olunğanını añlatıñız.**

### Mriya uçağı

Dünyada eñ büyük ve eñ ağır, yük taşığan uçaq – Mriya uçağıdır. O, 640 tonna qadar yük taşıy bile. Onı Ginnes dünya rekordlar kitabına kirsettiler. Episi olup uçaq 240 rekordnıñ saibidir.

Mriya, kâinatnı keşf etüvde faydalanmaq içün qurulğan. O, pek qısqa müddet (3,5 yıl) içinde işlep çıkarılğan edi.

Şimdigece tek bir Mriya uçağı çalışmaqta edi. O, 250 biñ kg qadar yük taşıy edi. Ekincisiniñ qurucılığı soñuna keleyatsa da, toqtatılğan edi.

Uçaq uzundan-uzun (misal içün 42 metr qadar), ağır-dan-ağır (253,8 tonna qadar), çoqtan-çoq şey (12 million tibbiy vasta), Çinden (Qıtaydan) Danimarkağa ya da Çehiyadan Avstraliyağa kibi uzaqtan-uzaq mesafege alıp bara edi. 2020 senesi tamir işlerinden keçip, dünyanıñ qızgın devrinde (tacmarazdan sebep) o, toqtamadan, adamlarğa kerek ilâc ve tibbiy vasta taşıdı.

2022 senesi kiçikniñ 27-de Gostomel ava limanına rus askerleri ücüm etkenleri vaqtında uçaq yoq etildi.



## Sarf

### Sıfat dereceleri

Körgeniñiz kibi, sıfatlar yardımınen alâmetniñ artqaçlığını ya da eksikligini köstermek mümkün. Buña **sıfat dereceleri** derler. Olarnıñ eki derecesi, er biriniñ de türlü şekilleri olur.

Sıfat	Sıfatnıñ teñeştirüv derecesi			
	morfologik şekli		sintaktik şekli	
merametli müim zengin eski uzaq yüksek	<b>-ca/-ce/ -ça/-çe</b>	merametlice müimce zengince eskice uzaqça yüksekçe	Çoqraq suvu özen suvundan <i>temiz.</i> (Bağçasaray- dan) Lviv Kyivge <i>baqqanda uzaq/ uzaqça.</i>	isim + isim+ <b>Ç.k.</b> + <i>sıfat</i>  isim + isim+ <b>D.k.</b> + <i>köre/baqqan- da/nisbeten + sıfat</i>

### İhtarlar

1. Teñeştirüv derecesine, miqdarı az olğanını ifadelegen **-raq, -lım, -şın** ve diger yalğamaları da kirsetmek mümkün, *meselâ*: eslicerek (adam), sarışın, yeşilim.

2. Teñeştirüv derecesi başqa tamırlardan asıl ola bile, *meselâ*: yara-may – beter, çoq – ziyade ve dig.

3. Teñeştirüv derecesindeki sıfat (ya da soñra sizge belli olur – zarfnıñ da) yanında alâmetni artıq, ziyade köstermek içün, **daa, daa da** sözleriullanılmaq mümkün: daa yahşı, daa da büyük.

Üstünlik derecesi	
<b>eñ</b> + sıfat: eñ ucuz, eñ aqıllı	<b>episinden</b> + sıfat: episinden ucuz, episinden aqıllı

⇒ **2-ış. Suallerge tolu cevap beriñiz.**

1. Alime 54 kg çeke. Selim – 61. Kim yengilce, kim ise ağırca?
2. Enver 28 yaşında. Ayşe – 25. Kim kimden qaç yaşqa büyük? yaş?



3. Qave 15 kümüş tura. Süt – 5. Süt qaveden qaç kere ucuz?
4. Ay Yerniñ yoldaşdır. Bu kök cisimlerinden angisi bala-ban, angisi ise küçüktür?
5. Orman Qoş(u) ya da Çatırdağmı yüksek?
6. Klıçko Taysonnı yeñdi. Kim zayıfça ve kim quvetlice olp çıqtı?
7. Canköyniñ ealisi 100 000. Bağçasaraynıñ – 60 000. Qaysı şeerniñ ealisi çoq?
8. Eski Qırım, Aluşta, Kezlev – qadimiy şeerlerdir. Angisi eñ eski sayıla?

⇒ **3-ış. Sıfatların derecelerini tertip etiñiz. Yazıñız. Qaysıların derecelep olamadıñız? Buña köre netice çıqarıñız.**

Sıcaq, şeñ, istidatlı, efsaneviy, şiiriy, ayneci, açuvlı, tatlı, teren, yengil, lezetli, medeniy, siyrek, tez, qaviy, yazılı, nazik.

⇒ **4-ış. Qırımniñ, Ukraïnaniñ kibi, er bir bölgesi, köşesi bir şeynen bellidir. Cevaplarıñızda sıfat derecelerini qullanaraq, bularnıñ er birini köstermege tırışıñız.**

**Nümüne:** 1. Bağçasaray eñ nomay bağ-bağçalarınen bellidir.

1. Herson pek şırnıqlı qarpuz, pişken pomidornen bellidir.
2. Yaltanıñ pek güzel ..., sıcaqtan-sıcaq ... bar.
3. Lvovniñ çoq ... .

## Ev işi

**1. Böyle suallerge cevap tapıñız.**

1. Kyivden Odessa yoqsa Aqyar uzaqçamı?
2. Qara deñiz yoqsa Azaq deñizi terencemi?
3. Qarasuvbazarnıñ yoqsa Kefeniñ ealisi büyükmi?
4. Qırımniñ qaysı şeeri eñ qadimiy sayıla? Ya bütün Ukraïnaniñ?
5. Adam içün eñ degerli şey nedir?

6. Millet için eñ sevimli şey nedir?
7. Halq için eñ qıymetli şey nedir?
8. Cemaat için eñ faydalı şey nedir?
9. Cemiyet için eñ müim şey nedir?
10. İnsaniyet için eñ gerekli şey nedir?

**2. Metinni oquñız. Talil etiñiz.**

**Cuma**



Cuma – aftanın beşinci küünü olup, musulmanlarda cuma namazı qılınğan eñ şerefli muqaddes bir küündür. İslâm memleketlerinde raatlq küündür. Aslında cuma musulmanlar için bir bayram küündür. Şunın için musulmanlarda

bu küнге ürmət ayrıcadır. Adamlar cumaaqşamı küünü ev-barqını temizlep, özleri yuvunır, temizlenirler, sabasına temiz urbalar kiyer bayram qıyafetini alırlar. Er kes biri-birinen güzel muamelede (munasebetlerde, qonuşuvda) bulunır, qadınlar erkekleri cuma namazına ozğarırlar. Qartlar, bütün erkekler başlarına qalpaqlarını kiyip, camiğe cuma namazına aşırırlar. Ealisi çoq olğan yerlerde cuma namazları qılınmaq için mahsus Cuma camileri qurılır.

*Abdülvait Sahtaradan*

**3. Aşağıdaki vazifelerge kündelik ve din ceetlerinden cevap tapıñız.**

*Ayatta Dinde*

eñ güzel teşekkür sözler  
eñ güzel maqtav sözleri



eñ güzel quvanç sözleri  
eñ güzel razı aluv sözleri

*Malûmat içün sözler:* elhamdüllilâ(h), bismillâ(h), subhanalla(h), Allağa şükür, maşalla(h), Allah yücedir (büyüktir), aferin, inşalla(h), Alla(h) qısmet etse, Alla(h)nıñ adinen, Alla(h) razı olsun, Allağu ekber.

**Yaşayıŝta diqqatlıca oluñız, su sözlerniñ aqqını beriniñiz, onıñ teren manasını ayırıñız, degerini tüşürmeñiz.**

## Qoşma metin

### Qırım hanlıgınıñ yadikârlıqları

Bağçasarayda da Orta cami eski şeerniñ eñ ortasında qurulğan edi. O, memleketniñ eñ büyük camilerden biri edi. İlkide onı XVII asırnıñ vesiqalarında qayd etseler de, o, daa evel qurulsa kerektir. Cami şeerniñ eñ qızgın yerinde – baş soqağında, şeer bazarı ve musafirhanesiniñ yanında tura edi. Em kelirlerinden bir payına baqıla edi. XIX asırnıñ soñunda cami yañıdan qurulğan da pencerelernen bezetilip, yazılarnen nağışlanğan edi. Soñ Orta cami qapatılıp, bir çoq yıl devamında kinoteatr olaraq qullanıla edi.



Cami Umerovlar qorantasınıñ sermiyalı yardımını ile tair etilgen. 2013 senesi dindarlar içün açılğan edi. Ğayrıdan tiklenilgen Orta cami Bağçasaraynı pek yaraştırı. Şeer bir çoq tarihiy yadikârlıqlarını ğayıp etse de, Orta cami buña hoş istisnadır.

*Crimean Tatars*

- 1. Yaşagan yerinizde cami ve diger yadikârlıqlar barmı? Olarnıñ tarihini öğrenip keliñiz.**



## Altın beşigim

Söz. Zarema Ablayeva

Muz. Enver Emirov

### I

Adımını saqlaycaq altın be-  
şigim.  
Bir dane evim bar  
Dedeler toprağı Qırımım!

Yırsız bülbül degilim,  
Qırım benim Vatanım!  
Vatançün otqa kerekse,  
Aman dalarım!  
Sevgi öyle sıcaq ki,  
Meni otlar da almaz!  
Vatançün canını bergen  
Ateşte yanmaz!

*Bağlama:*

Altın beşigim, nesillerge  
seni saqlarım!  
Altın beşigim Qırım!  
Altın beşigim, nesillerge  
seni saqlarım!  
Altın beşigim Qırım!

### II

Yurtunu pek sevgen, yat-  
larğa çevirmez.  
Altından qıymetli topraq-  
tan bir vaqıt vazgeçmez!

Yırsız bülbül degilim,  
Qırım benim Vatanım!  
Vatançün otqa kerekse,  
Aman dalarım!  
Sevgim öyle sıcaq ki,  
Meni otlar da almaz!  
Vatançün canını bergen  
Ateşte yanmaz!

*Bağlama:*

Altın beşigim, nesillerge  
seni saqlarım!  
Altın beşigim Qırım!  
Altın beşigim, nesillerge  
seni saqlarım!  
Altın beşigim Qırım!

**1. Öz teessuratlarıñıznen paylaşıñız. Sözlerniñ teren manasına yetiñiz.**



## 32-NCİ AFTA

### Sarf

#### Munasebetçiler ve olarnı idare etici kelişler

Sözniñ manasını muayyenleştirmek maqsadınen, keliş yalğamasından ğayrı daa yardımcı isimler ya da munasebetçiler qullanılır. *Meselâ*, masada ve masa *üstünde* ya da *tübünde*, sofağa ve sofa *başına* ya da sofa *yanına* kibi şekillerde qayd etilgen yardımcı isim ve munasebetçiler, özünüñ qoşma çizgileri ile esas sözniñ manasını tamamlay. Söz birikmesi ve cümleñiñ terkinde olar ya deñişir (yardımcı isimler), ya da evel turğan sözden belli bir şeklini talap eter. Birincileri isimler kibi türlenir, ekincileri şu keliş şeklindeki isimnen beraber kelir.

Aşağıdaki cedvelde, kelişke köre olarnıñ esas şekilleri berilgen.

Kelişler					Misaller
Baş	Saıplık	Doğrultuv	Beraberlik	Çıqış	
ile (-le)					vaqıt ile, bala ile
			-nen		(öz) ellerinen, anamnenn, ötmek-nenn
			beraber		emcemnenn beraber, babamnenn beraber
	başı/ -n(d)a(n)				işniñ başın(d)a(n), ocaqnıñ başın(d)a(n)
	yanı/ -n(d)a(n)				pencere(niñ) yanın(d)a(n), ev(niñ) yanın(d)a(n)
	ortası/ -n(d)a(n)				şeerñiñ ortasın(d)a(n)
	arası/ -n(d)a(n)				insanlar(nıñ) arasın(d)a(n)



	boyu/ -n(d)a(n)				yol boyu, Alma boyundan
	ögü/ -n(d)e(n)				ocanıñ ögünde
	arqası/-n(d) a(n)				olarnıñ arqasın- dan
	tübü/-n(d)e(n)				çapçaqnıñ түbü
	üstü/-n(d)e(n)				damnıñ üstün- den, aqşam üstü
	içi/-n(d)e(n)				odanıñ içinde
	soñu/-n(d)a(n)				leyhaniñ/filmniñ soñunda
	qarşısı/-n(d) a(n)				onıñ qarşısından
içün, oğrunda					Vatan oğrunda, yapmaq içün
kibi					küneş kibi, bala kibi, süt kibi
sayın					ketken sayın
aqqında	aqqında				bayram aqqında, siziñ aqqıñızda
		köre, baqqan- da, baqıp, nisbeten			buña köre
		qarşı			yelge qarşı
		doğru			ufuqqa doğru, evge doğru
		qadar			yarıñğa qadar, bir kilo qadar
				ğayrı	menden ğayrı
				soñ	dersten soñ
				evel	eki kün evel

⇒ **1-iş.** Cedveldeki sözlernen 10 adiy cümle tiziñiz. Kelişlerni qayd etiñiz.

⇒ **2-İş. Munasebetçilerni ve yardımcı isimlerni tapıñız. Manalarını ve şekillerini tayin etiñiz.**

1. Arıq üstünden tar köpürçik keçirilgen. Onıñ astında üç demir qazıq... Ot-ölen arasından borunıñ ağzı körüne. (E.Ü.)

2. – Anay, babam bizge ne vaqıt kelecek? – dey Nevruz-çıq tepsideki şekerniñ soñunu sıypap qapqan soñ,– babam kelse, bizge em şeker, em de ötmek ketirir, istegenimiz qadar aşarmız.

Ananıñ içine kene de ateş tüşe, yaqıcı közyaşları közlerini torlandıra...

Niayet, yılbaşqa yaqın, ümüt etilmezden olarnıñ qapularından da büyük quvanç kirdi. (C.A.)

⇒ **3-İş. Atalar sözlerini oquñız. Teren manasına yetiñiz. Yazıp alıñız. Munasebetçilerni ve yardımcı isimlerni qayd etiñiz.**

1. Adam iş başında belli olur. 2. Aqşamdan soñ kün doğmaz. 3. Alimniñ yanında tiliñni tıy, ustanıñ yanında eliñni tıy. 4. Alla(h) er kesniñ göñlüne köre berir. 5. Ana kibi yar olmaz, Vatan kibi yer olmaz. 6. Ana sütünen kirmegen, tana sütünen kirmez. 7. Anasına baqıp qızını al, kenarına baqıp bezini al! 8. Accı alma tübüne tatlı alma түşmez. 9. Aş lezetini ketirgen – soğannen biber. 10. Aşına köre tabağı, işine köre tamağı. 11. Birisi dağ aqqında aytır, digeri – dağ aqqında! 12. Bir işni başlama, başlağan soñ taşlama! 13. Bir sürüngeni içün atnıñ başını kesmezler. 14. İtniñ artından keç, atnıñ – ögünden! 15. İş etmeseñ de, iş başından ketme! 16. Kök içün direk, deñiz içün qapaq yoq. 17. Körmeknen toymaq olmaz. 18. Qaçqannıñ artından quvmazlar. 19. Mektep körmek – insan içün devlettir. 20. Musafirniñ üstüne baqıp qarşıla, özüne baqıp ozğar!

**Diqqat etiñiz!** Yuqarıdaki işte rastkelgen *iş başında*, *alma tübüne*, *iş başından*, *ana sütünen*, *aş lezetini* kibi şekillerde baş sözleri keliş ylağamasız qullanıla. Bu til adisesi sözniñ umumiy manasında qullanılğanını köstere. Şunuñ içün cedvelde şöyle kibi kelişlerniñ yalğamaları qavuzlar içinde berildi.

Yardımcı sözlerniñ qavuzları ise, olardan soñ kelgen sözlerge bağılıdır.

## Qırım yarımadası

*M. Mamutova*

Sen Qırım aqqında ne bilesiñ? Dünyanın eñ dülber yerlerinden biri Vatanımız Qırımdır. Yarımadamızın cenüp ve ğarp yalılarını Qara deñiz, şarq yalılarını ise Azaq deñizi sarıp alğan. Qırım boylap yalı sınırlarının uzunlığı – 2500 kilometr.

Yarımadanı qıtanen Yañı Qapu boyunu bağlay. Yurtumuzın meydanlığı aman-aman 27 biñ kvadrat kilometrini teşkil ete. Onıñ 72% – tüz yerler, 20% – dağlar ve 8% – göl, tıynaq ve özenlerdir. Qırımın ğarp ve şarq tarafları arasında 326 kilometr, şimal ve cenüp tarafları arasında 205 kilometr mesafesi bar.

Ya yarımadamızın tam ortası ne yerde? Ortası Qurman bölgesinin Azov köyü yanındadır. Qırımın şarqında Kerç yarımadası, ğarpta ise Tarhanqut yarımadası yerleşken.

Yurtumuz pek büyük olmasa da, iqlimi çeşit-çeşittir. De-yik, Qırımın çöl tarafında, dağlıq yerlerinde ve cenübiy yalı boyunda biri-birinden farklı iqlim bar.

Yarımadamızğa ayrıca yaraşq bergen – dağlardır. Ay-Petri, Çatırdağ, Qaradağ, Orman qoş kibi dağlarını er kes bile. Orman qoş Qırımın eñ yüksek dağı sayıla.

Yarımadanın 257 özeni bar. Eñ büyük özenler – Salğır, Alma, Belbek, Büyük Qarasuv. Olardan eñ uzunı – Salğır. Eñ bol suvlu özen ise Belbektir. Qırımda 50-den ziyade göl bar. Göller arasında eñ büyügi – Sasıq Sıvaş.

Qırım özüne has dülberliginen ayırılıp turğan uçansuvların de bellidir. Eñ hoş şırılдаğan gür suvlu uçansuv – Cur-Cur. Onı yılın er angi mevsiminde ziyaret etmek mümkün.

Yarımadamızın uzaq keçmişine dalmaq isteseñ, Çufut qale, Manğup qale, Eski Kermen kibi qadimiy qoba şeerlerini ziyaret ete bilesiñ.



Qırımniñ tekrarlanmaz, dülberden-dülber tabiatı, acayip qayaları, ayrette qaldırıcı acayip şekilli dağları, tuzsuz ve tuzlu gölleri, qoruqları, eski zamanlardan qalğan müh-teşem sarayları, ibadethaneleri, çoqtan-çoq tarihiy ve arheologik obyektləri bar.

Qısqası, Qırım aqqında aytqanda, güzel manzaralarını, temiz avasını, mücizeviy tabiatını añmamaq mümkün degil.

Sen – qırımtatarsıñ. Bu aziz yurtniñ tamır halqına mensüp bir evlâtsıñ. Öz yurtuñni sev, ana tiliñni bil, şanlı tarihıñni öğren. Büyük tarihımıznen ğururlanıp, öz halqıñniñ çoq asırlıq ananelerini ürmet et.

### Ev işi

**1. Aşağıda berilgen söz birikmelerini munasebetçilernen tamamlañız. Bir qaç cümle tertip etiñiz.**

Yol ... ketmek, barğan ... quvana, aqiqat ... küreş, evge ... ketmek, dağğa ... qaçmaq, adam ... yaşamaq, işten ... kelmek, aytqanı ... olıp çıqtı, eki yıldan ... körüşmedik, qalem ... yazılğan.

*Malümat içün sözler:* soñ, boyu, berli, taba, kibi, ile, oğrunda, sayın, taraf, dayın, doğru.


**2. M. Mamutovaniñ ‘Qırım yarımadası’ ikâyesinde rastkelgen has isimler ve sayıları yazıp alıñız.**

**3. ‘Qırım yarımadası’ ikâyesiniñ saymevzularını yazıp alıñız. (Yani, er bir satırbaşında ne aqqında ayılğanını qısqadan, bir-eki cümlede yazıñız.)**

**4. Aşağıda berilgen şiirni ifadeli oquñız.**

## Menim Vatanım – Qırım

*İsa Abduraman*



Dülber deñizi, dağı,  
Em de bağçası, bağı,  
Çölü, bayırı, qırı...  
Menim Vatanım – Qırım.

Beyaz qalpaq başında.  
Baar yüre qışında.  
Gülü çoq: qızıl, sarı...  
Menim Vatanım – Qırım.

Bal kibi meyvaları.  
Qavun-qarpızı aruv.  
Boğday tolu anbarı...  
Menim Vatanım – Qırım.

Şifalıdır nefesi.  
Menim onıñ erkesi.  
Çıñım, ebediy yırım –  
Menim Vatanım – Qırım.







## 33-NCİ AFTA

### Doğğan yerim Qırımdır

*Çerkez-Ali*



Doğğan yerim Qırımdır,  
Dülber onıñ er yeri.  
Qırım menim Yırımdır,  
Bereketli çölleri.

Ayvanlarğa sefadır  
Keniş-qulan yaylası.  
İnsanlarğa şifadır  
Çeşit türlü meyvası.

Çevre-çeti deñizdir,  
Balıqları yaldağan.  
Yahıları yüzümdür,  
Baqqan közni aldağan.

Qırım yarımadaadır,  
Yalan dünya cenneti,  
Avası tek faydadır,  
Yaşa Qırım ümmeti.

Senden nesil doğacaq,  
Millet ösip oñacaq.  
Duşmanların başına  
Quzğun olıp qonacaq!



Bunı bilmegen ahmaq,  
At oynatır daa çoq.  
Halq yansın dep ot yaqmaq,  
Pis adeti bizde yoq.

Doğğan yerim Qırımdır,  
Güzel onıñ er yeri.  
Qırım – ayat yırır,  
Dülberlerniñ dülberi.



### Miqdar ve sıra, pay ve tahmini sayılar. Sayıların digər fənlərdə qullanuv

**Sayıların** mənə ehtiyatından bir-birindən fərqlənir. Buña görə də onların məhsus yalğaması olur. Məsələn, **sırasını** bildirmək üçün **miqdar** sayığa **-nci/-nci** yalğaması qoşulur: birinci, on beşinci, otuzuncu. Bölüşüvde biz **-ar/-er** yalğamalı **pay** sayıların qullanamız, *meselâ*: birer dondurma, üçer alma, beşer talebe. **Tahmini** sayılar sızıqnen yazılır, *meselâ*: bir-eki, on – on beş, otuz-qırıq.

Sayıların eyni sıq daa biz yer kəşili isimlərdən qullanmız. Hususan *saat qaçta? ne vaxt?* suallarına cavab bərvədə. Bundan ğayrı, **kesir** sayıların tertip etüvde də mənec yer kəşində olur, *meselâ*: 13/5 – bir bütün beş- te üç; 12.30-da – saat on ekini otuz daqıqa keçkəndə (on eki buçuqta); 18.45 – on sekizni qırıq beş daqıqa keçkəndə (on doquzğa on beş daqıqa qalğanda; aqşam saat yedige on beş daqıqa qalğanda) və il.

⇒ **1-ış. Saat qaç? sualıne ardı-sıranən aşağıdakı rəqəmlərni səs- ləndiriniiz.**

- 1) 5.10, 2.21, 11.15, 7.35, 10.40, 7.19, 11.45.
- 2) 12.00, 18.00, 16.00, 4.00, 24.00, 7.00, 9.00; 8.30, 12.30, 21.30.

⇒ **2-ış. Böylə suallərge cavab bəriiniz:**

1. Sen ne vaxt uyanasın?
2. Sen saba saat qaçta aşaysın?
3. Mektepte dərslər saat qaçta başlana?
4. Teneffüsler qaç daqıqalıqtır?
5. Dərsləriniz saat qaçta bite? Ya umumən?
6. Ev vəzifəni sen saat qaçtan qaçqace yapasın?
7. Sen saat qaçta rəatlanasın?
8. Sen saat qaçta kəzmege sevesin?
9. Eyni sevimli işinən qaç saat meşğülsin?
10. Sen dostuñni saat qaçta qarşılaysın? Soñra ne qadar eglənesiz?



11. Aqşam qorantañıznen beraber saat qaçta aşaysıñ?

12. Raatlıq künleri sen saat qaçta uyanasıñ?

⇒ **3-iş.** Esap feninden musaviylemeler, vazife, mesele ve misallerde rastkelgen sayıları seslendiriniz. 3–4 misalni yazıp alınız. *Qoşmaq, arttırmaq, almaq, bölmek, musaviy* ve diger sözlerni qullanınız.

⇒ **4-iş.** Ağımdaki kün, ay, seneni, em de siziñ ve yaqınlarıñızñ tolu doğuv tarihını yazınız.

⇒ **5-iş.** Qaçıncı? sualine aşağıdaki sayılarnen cevap beriñiz.

20, 21, 39, 45, 57, 63, 77, 82, 90, 119, 205, 346, 1975.

⇒ **6-iş.** Üçer raqamñı tezaytım kibi seslendiriniz.

1-11-49 67-55-34 409-784-428 75-90-41 86-18-7935

### Ev işi

1. Kün tertibiñizni ikâye etiñiz. Yapqan işleriñizniñ vaqtını de qayd etiñiz.
2. **Üyle, ekindi, quşluq, tañ, yarı gece, gece-kündüz** kibi sözlerni öğrenip keliñiz. Olarnı cümleleriñizde qullanınız.
3. Yaqınlarıñız kaç yaşıda olğanlarını yazıp alınız.
4. Qırım ve umumen Ukraina aqqında qısqa malümat beriñ. Oña eali-siniñ sayısı, ölçüsi, eñ yüksek ve teren noqtaları, şeerlerniñ sayısı, yaşı kirsin. Buña sizge evelki metinler yardım etecektir.

Ana-Vatanım  
(destan)

*Fikret Saledinov*

Es bilgen soñ, sezdim seni,  
Menim ana-Vatanım.  
Balalıqtan sevdim seni,  
Menim aziz Vatanım.  
Baar kelse, qoqu saçar  
Bağçalarıñ, bağlarıñ,  
Çoqraqlardan şırlap aqar  
Seniñ salqın suvlarıñ.  
Uzaqlardan körünmekte  
Çatırdağñıñ kevdesi.  
Çeçeklernen örtülgenler  
Yaylalarıñ töpesi.  
Ay-Petriden körüneler  
Dülber yeşil yalılar.  
Ayuvdağñıñ eteginde  
Köp(ü)re mavı dalğalar.  
Seniñ cenüp yalılarıñ  
Yeşil, bağnen örtülgen,  
Özenlerniñ keñ boyları da  
Bağçalarnen kömülgen.  
Manğup, Orını ve Tarhannı  
Yaraştırı keñ çöllər.  
Asray altın, oñ boğdaynı  
Emeksever köylüler.  
Seniñ avañ ve tabyatıñ  
İlâc türlü dertlerge.  
Seniñ eski tamır halqıñ

Muhtac bundan çet yerde.  
Ey, Vatanım! Bizler içün  
Senden başqa ne pa(a)lı?  
Yıllar degil, asır keçse,  
Bizde yürek dalğalı.  
Saña ana-Vatanımız dep,  
Bizler seni sağındıq.  
Eger nedir deseñ sebep,  
Bizler sende yaşadıq.  
Sennen halqnen birdemlikte  
Adetler(i)miz yaşadı.  
Elâl, doğru, nur emekte  
Halq özüne kün taptı.  
Halqımızın nağmesinde  
Dülber ana tili bar.  
Tilden başqa haz(i)nesinde  
Oyun, yır ve çıñı bar.  
Qaramanlar er bir halqta  
Vatanında doğula.  
Yeñişleri paytahtında  
Eykeltaşta yazıla.  
Yüz-betimiz oşağanı,  
Bu bugünkü yüz degil.  
Asırlarnen yaşağanmız,  
Sende, aziz, oylap bil!  
Subetleşken ür tilimiz –  
Vatanmızñıñ bahşışı.





Ana tilde er sözümüz –  
Halqımıznıñ sırdaşı.  
Milletlerniñ yüzlerinde  
Lâyıqatlı şırnıq bar.  
O şırnıqnıñ devrinde  
Çoq asırlı yıllar bar.  
Milletlerniñ tarihları  
Vatanınen bağlıdır.  
Yüzlerinde şırnıqları,  
Tabiattan bir bahşıştır.  
Asırlarda halq Vatanda  
Serbestliknen yaşadı.  
Baht-seadet muradında  
Ümütlernen paylaştı.  
Ümütsizden taqdir birden  
Halqnı ğamğa daldırdı.  
Qıynap onı sürgünlikte  
Ğurbetlikte qaldırdı.  
Bu ağır şaraitke  
Er kes çıdap olamadı,  
Hastalıq, yoqsuzlıqta  
Aç ölümge oğradı.

Ömür ötmey gürdeliknen,  
Halq ep çeke azaplıq.  
Ümüt ete eşq, eyliknen  
Lâyıq sanıp azatlıq.  
Halq yaşay asretlikte,  
Öz yurtundan uzaqta.  
Ümüt üzmeý sürgünlikte  
Vatanına qaytmağa.  
Kelir künü bu alemde  
Sezer Vatan duyğusı.  
Tura daim yüreginde  
Asret halqnıñ adası.  
Er halqlarğa külgenday  
Küler küneş Vatanda.  
Dallardaki bülbüllerday  
Yırlar keday Salğırda.  
Bizim tatlı tilimiz –  
Halqımıznıñ alğışı.  
Subetleşken ür tilimiz –  
Vatanmıznıñ bahşışı.

1. Müellifniñ aziz toprağı – ana-Vatanına sınırsız sevgisini isbatlağan sözlerni tapıñız. Bundan ğayrı, oquğanda, destannıñ tışqı (qaysı sözler qafiyeleşe) ve içki maqamına diqqat etiñiz. Böyle kibi eserler qırımtatararnıñ bir bütün olaraq yaşayışını tasvirlegeninde qanıñız.
2. Destannıñ mevzularını tayin etiñiz. Parçasını ezberleñiz.



## 34-NCİ AFTA

### Vatanım

*Refat Çaylaq*

Qapımız ögüne lâleler saçtım.  
Sudaq yalısı allandı-küldi.  
Pencere-qapımnı quvançnen açtım,  
Güya qaytadan dünyağa keldim.

Melevşe, lâleler ne güzel qoquy!  
Köklerde gür olıp turnalar uça.  
Yalıda dalğalar efsane toquy,  
Qaradağ deñizge quçağın aç.

Ögümde bağ-bağça, artımda – dağlar,  
Töpemde – mavı kök, yanımda – deñiz.  
Olarğa qavuşqan quvançtan ağlar,  
Çağıram:  
– Yurtdaşlar, Qırımğa keliñiz!

Ey, güzel Vatan – canımsıñ, qanımsıñ!  
Sen içün çıqtım men aziz küreşke.  
Sen benim muqaddes aqqımsıñ,  
Seniñle yeterim ayğa, küneşke.



## Sarf

**Bağlayıcı: çeşitleri, cümledeki vazifesi**

**Modal söz, nida ve derecelikler:**

**manaları, cümledeki yeri ve vazifesi**

Sözlerniñ cümle içinde ve mürekkep cümlelerniñ çeşitlerini özara bağlamaq içün nutuqta biz bağlayıcıları qullanamız. Sözler ve cümlelerniñ özara munasebetine köre olar teñ ya da tabili bağlap kelir. Eger bağlayıcılar *qoşma* (ve, de), *ayırıcı* (ya da, yoqsa, ise, de ... de) ya da *qarşılıq* (lâkin, amma) mananı bildirse, olarğa **tizme** bağlayıcılar derler. **Tabili** bağlayıcılar ise sözler ya da cümlelerni özara belli bir tabi, yani birine bağlı olğanını köstere. Demek birisi *baş*, ekincisi (ya da başqalarınıñ episi) *tabi* sayılır. Bu bağlayıcılar çeşitine türlü manada *ki*, *şunıñ içün*, *eger*, *çünki* kibileri kire. Bundan ğayrı, olarnıñ vazifesini bazı yalğamlar ve derecelikler de becere bile.

Cümlede söyleyciniñ munasebetini bildirmek içün, mahsus sözler qullanıla. Olar quvanç, yazıqsınuv, eyecan, taacıp, eminlik ve diger manalarını bildire. Böyle manağa sarfta modal mana derler. Şu manağa ait olğan söz çeşitleri de modal sayılır.

Bu söz çeşitleri özara da farq eter. Meselâ, **modal sözler** şu mananı özünden-özleri, em de bütün cümlege ait eter (*belki*, *elbet*, *teessüf*, *yazıq ki*, *lâçare* ve il.). **Derecelikler** ise tek ait olğan söz manasınıñ derecesini yükseltir (*atta*, *da*, *daa*, *ta*, *degil*, *-mı*, *-çı* ve il.). **Nidalar** da öz terkinde, is-duyğularımızni bildirmek içün sözlerni qaplap ala (*ay*, *vay*, *maşalla*, *aferin* ve il.).

⇒ **1-iş.** *Ve, da/de, ise, amma, lâkin, şunıñ içün ve çünki* bağlayıcılarınen adiy ya da mürekkep cümleler tiziñiz.

⇒ **2-iş.** Metinn oquñız. Qayd etilgen sözlerniñ çeşitini tayin etiñiz.

*İnşalla* qırımtatar halqınıñ arzu-ümütleri ömürge keçer. *Eminim*, bütün qırımtatar halqı *içün de* küneş doğar. Bizler *de* yarıqqa çıqarmız. Qırımtatarlarınıñ episi qaytırlar, yerleşirler. Vatanımızda toplanırlar. Devletçiligimizni de tiklermiz. *Amma* bu niyetler bugün-yarın olacaq şey *degil*. Bu ulu maqsat *oğrunda* aqıl-idrak *ile*, büyük sabır *ile*,

birlik olup küreşmek kerekmiz. Bu muqaddes işimizde Alla bizge yardımcı olsun! *Amin!* (O. Osmanov)

- **Metin ta 1999 senesi yazılğan. Müellif beyan etken fikirler daa aktualmi? Bir netice çıxarıñız.**

⇒ **3-iş. Oquñız. Tekrar bağlayıcını tapıñız. Onıñ manasını añlatıñız.**

## **Tatar qızı**

*Lesâ Ukraïnka*

Şeer civarında, soqaq-yolaqtan,  
Yaqıcı çaql taş üstüne basıp,  
Dülber tatar qızı adım atmaqta,  
Oña serbest ömür olğandır nasip.

Siya saçlı cesür başına  
Kiygen dülber tatar fesini.  
Esmeri çeresin qapatqan biraz  
Beyaz fırlantanen, topla esini.

De qapata, de aç yüzün,  
Qara qaşlar astında közler.  
Yıdırımday, körgende yaqa,  
Bu ne baqış, olar ne söyler?!

*Tercime etken A. Veliyev*

1. **\*Şiir üstünde araştırma iş alıp barıñız. Şaheser tercimededen ne farq etkenini tüşüniñiz. Tercime ustalıǵına qıymet kesıñiz.**
2. **\*\* Diqqatıñızñı ‘yıdırımday’ ve ‘olğandır nasip’ sözlerine çekıñiz. Birinci sözde munasebetçini tapqandırıñız? Ekinci söz fiil olğanına baqmadan, oña daa -dır haberlik yalğaması qoşuldı. Bu alda o, modal mana qoşqanını biliñiz.**

## Ev işi

1. Oquñız. Sürgünlikten evel yazılğan metinde angi ğayeler üstün olğanına diqqat etiñiz. Bugünkü künlernen qıyaslañız. Öz oquv yurtuñızñıñ marşını yaratmağa tırışıñız.

### Mektep marşı

Fen ve sanat ocağınñ  
gülümüz  
Em sevgili yurtumızñıñ  
bülbülimiz  
Ancaq bizmuz bu  
ülkeni baqacaq,  
Bilgimiznen çırağın  
yaqacaq.  
Sen tek bar ol, şanlı  
büyük milletim!  
Qurban olsun saña  
bilgim, quvetim!

### Noğay ordunıñ asker marşı

Qarañğı gece doğmaz kün  
Qorqulı yolda.  
Bilgisiz, oysuz qalğanmız –  
Yol soraymız.  
Tañ açılsa, kün doğsa,  
Oñğanlıq olsa.



*Üskütli Abdülvait Sahtaradan*

Qaruv olsa yaşlarğa,  
Bir hanlıq olsa.  
Cıylşayıq, dostlar,  
Cıylşayıq.  
Turmayıq, qarap.

İdil boyun sel alğan,  
Qaranlıq basqan.  
Qaruv olsa yaşlarğa,  
Bir hanlıq olsa.

*Taraqtaşlı Alime Aliyevadan (1926 s. doğdı)*

2. Bir kaç ders devamında, şu cümleden aşağıdaki metinlerden, siz Qırımın keçmişi ve bugünkü vaziyetinen tanış oldıñız. Aşağıda da berilgen metinlerni oqup, Qırımın deñişmelerini sezmege tırıñız. (Ağzavıy)

### Balta (olğan şey, parça)

*Yusuf Bolat*

Balalar şeñ-şeramet olıp, başta köpürden, soñ mezarlıqtan, daa soñ vaquf toprağından keçip, bağçalargä doğru çamborlazğa kettiler.

Olar şeerde yaşaylar. Ne içündür bilmem, yedi-sekiz yüz qorantalı bu köyge şeer degenler. Alı da danğalaqça. Belki eki camisi, bir kilsesi, bir sinagogası, üç de qavesi olğanı içündür? Yalı boyu yelemliğinde, bağçalar içinde, eki-üç qatlı saraylar da bar. Yaz ayları olargä tap Orasiyeden graflar, knâzlar köçip keleler. Bütün sulâlelerini artlarına çıbırtıp keleler. Cepleri sumelengen dvorânlarğä ise Suleyman aci yardım ete: pansionatınen üç qatlı evini olargä kirağa bere. Özü dam evde yaşay.

Şeer tek yaz ayları canlana. Deñiz yalısı badyege oşağan şlâpalarğä, al-santıraç şemsiyelerge tolıp qala. Köylüler olargä erte sebzelerini, meyvalarını, yüzümlerini, avanda doğralğan tütünlerini satmağa, üst-başlarına urba almağa aşıqalar. Qışta deseñ, şeer tınıp qalganda, deñiz qutura.

### Qırım

Qırım bizim Vatanımız. Qırımğa yarımada derler. Qırım tillerde destan oldı. Ayta-ayta maqtavımız iç bitmez. Qırımda balaban ve kiçkene: Aqmescit, Aqyar, Kerç, Kezlev, Kefe, Bağçasaray kibi şeerler bar. Eski Qırım, Qarasuvbazar, Bağçasaray eski, qadimiy şeerlerdir. Aqmescit merkeziy şeer. Mında büyük binalar çoq. Bu binalarda devlet muayesseleri, tükân ve kinoteatrler yerleşken. Binalar soqaqlar boyu qurulğan. Merkeziy soqaqlarda çoq adam körmek mümkün.

*A.İlyasovdan*



## 35-NCİ AFTA

### Qırımım (yır)

*A.Veliyev*

Yer yüzüniñ köküsinde  
Gül kibi Qırım.  
Menim ana-Vatanım  
Em benim yırım.

Aqmescitim, Yalta, Kefe  
Em Eski Qırım.  
Aqyar, Kezlev, Sudaq, Canköy –  
Menim Qırımım.

Aluşta, Alupka, Kerç,  
Qarasuvbazar.  
Zuya, İçki, İslâm-Terek  
Ve Büyük Onlar.

Aq-Şey[i]h, Alma-Tarhan,  
Saq, Bağçasaray.  
Baydarava, Or Qapı  
Sizni selâmlay.

Yaşa, gülle, Qırımım.  
Menim Vatanım.  
Seniñ içün feda olsun  
Qanım ve canım.

Yaşa, gülle, Qırımım,  
Menim Vatanım.  
Bir danesiñ dünyada  
Canım Qırımım.

Alla, Alla ne güzel,  
Er şey Alladan.  
İç bir şey ayırmasın  
Bizni Vatandan.

### İzaat luğatı

Or Qapı – Yañı Qapunıñ eski adı.

1. Yırnı ezberleñiz. Sınıfta birlikte icra etmege tırışıñız.
2. Şiirni oquñız. Teessuratlarıñıznen paylaşıñız. Şaire şiirde is-duyğularını bildirmek içün nasıl vastaları qullana?

### Deñiz

*Aliye Kence-Ali*

Ts... eşitesiniñiz? Deñiz şuvulday.  
Taşçıqların birer-birer alıp taşlay.  
Dalğalarinen Qırımın siypay.  
Ş-ş-ş-ş-ş-ş-ş, ş-ş-ş-ş-ş-ş-ş.  
Laf ete.  
Tuzlu suvları maña şekerden tatlı,  
Suvuq suvları maña ateşten sıcaq.  
Qara deñizim, ne qadar küneşler battı,  
Ne qadar küneşler seniñ suvuñdan çıqtı.  
Ş-ş-ş-ş-ş-ş-ş: ş-ş-ş-ş-ş-ş-ş.  
Nasıl dülber, baq.  
Deñizniñ içinde bam-başqa acayip dünya.  
Bahıqlar, ayvanlar tuzlu bağçalarda



Çeşit renkli anterler kiyıp, yaldaylar.  
Bir-birinen laf eteler qırımtatarca.  
Çünkü bu bizim deñizimiz.  
Ş-şşşş, ş-şşşşşşşşş.  
Bu deñiz - biz.  
Er bir tamçısı – men ve sen,  
Beraber olsaq – suvumuz temiz ve teren.  
Oyunımız yengil, dalğalar qaytarma oynaylar.  
Tamçılar (bir millet dayın) bir-birini quçaqlaylar.  
Ş-şşşşşş, ş-şşşşşş.  
'Sevemiz seni, Qırım', –  
Aytalar.

- İnternette, şiir teatrde nasıl icra etilgenini tapıp diñleñiz. Sefa sürüñiz.

## PEKİTÜV

### 1. Aşağıdaki vazifelerini ağzaviy şekilde beceriñiz.

- Eñ yaqın hastahane qayda olğanını aytıñız.
- Eñ yaqın tükânda ne satılğanını tarif etiñiz.
- Mektepke eñ yaqın ve eñ uzaq yaşağan talebe kün tertibini aytıp bersin.
- Sınıfta eñ yahşı ve zayıf oquğan talebe, oña ne qadar vaqıt ayırğanını bildirip, tafsılâtlıca añlatsın.
- Oquvdan ğayrı daa nege eñ çoq vaqıt ayırğanıñız aqqında ikâye etiñiz. Nege irişmek istegeniñiznen paylaşıñız.

### 2. Metinni içten oquñız. Soñ ağzaviy beyan etiñiz.

Qadimiy zamanlardan berli, asırlar boyu, yaşayış qurumı, ömür tarzından asıl olıp qalğan ve devam etken er angi milletke has öz hususiy milliy qoqusı bar. Misal olaraq, tuvğan evimizni ketire bilem. Cenkten evel bizim evimiz daima qave ve alma qoquy edi, çünkü er Allanıñ sabası anam yaltıravuq altın tüste cez el degirmeninde qave çeke,



soñ ocaqta köpürtip pişire ve babamnen ekisi biri-birine: ‘Saba şerif hayırlı olsun’, – dep sabalıq qavelerini içe ediler.

Hoş qave qoqusı odalar içine cayray edi. Küzden baargece tavanda acayip dülber, uzun şekilli qandıl-sinap almaları, bera armutları veyü vez ile ibaret top-top evenkler asılı turğan. Kavkazda şarap içüv adet olıp qalğanı kibi, bizde qave içile edi. (T. Halilov. ‘Tutıp alınğan Vatan’)

### 3. Metinni diñleñiz. Soñ parça-parça ikâye etiñiz.

Dünyada çoq ülkeler bar. Er bir adamnıñ öz Vatanı bar. Menim içün dünyanıñ eñ dülber yeri, benim sevimli Vatanım – Qırımdır. Onıñ er yeri dülberdir: deñizi-yalı, dağı-qayası, ormanı, çölü-yaylası...

Vatanımnıñ dülberliğini körmek içün, onıñ acayip energetikasını is etmek içün dünyanıñ dört tarafından turistler keleler. Olardan çoqusı qırımtatar halqınıñ folklorinen ve adetlerinen tanış ola. Biz olarğa bu adetlerimizni añlattırmaq içün, öz tarihımızni bilmek kerekimiz. Qırım yarımadasında olğan er bir yerniñ öz tarihi bar. demirci, Ayuvdağ, Çatırdağ, Uçansuv ...

Bu zenginliklerni araştırmak ve öğrenmek kerekimiz, çünki öz keçmişimizni bilmesek, kelegeğimiz olmaz. Vatanımıznıñ kelegegi bizim qolumızda ve inşalla Qırım – Vatanı gül-bağça yaparmız.



## Ev işi

1. ‘*Qırımñ kelegeği*’ serlevalı inşa yazıñız. İşte şahsen sizge de fayda ketirir istek, arzu-niyetleriñizni ve şahsiy isseñizni tüşüniñiz.

## Qoşma metin

Qırım – bizim evimiz,  
Küneşimiz, kökümüz.  
Qırım – bizim ilimiz,  
Nefesimiz, tüşümüz.  
Qırım – bizim analar,  
Qırım – bizim babalar.  
Qırım içün oqurmız,  
Oña tayanç olurmız.

*Y. Qandım*

## Men isterim

*A.Veliyev*

Men isterim benim yurtum benimki olsun.  
Men isterim ana yurtum dostlarğa külsin.  
Men isterim arzularım açsınlar qanat.  
Men isterim bu ülgede olsun şeñ ayat.  
Men isterim musafirler kelsinler mında.  
Men isterim olar kelsin uzaq, yaqından.  
Men isterim Qırım olsun şiir bağçası.  
Men isterim yañğırasın türkler lehcesi.  
Men isterim musafirler olsun dostlarım  
Men isterim Qırımda olsun iftiharım.



## MÜNDERİCE

<b>18-Cİ AFTA.....</b>	<b>3</b>
<b>19-NCİ AFTA.....</b>	<b>13</b>
<b>20-NCİ AFTA .....</b>	<b>23</b>
<b>21-NCİ AFTA .....</b>	<b>29</b>
<b>22-NCİ AFTA .....</b>	<b>34</b>
<b>23-NCİ AFTA .....</b>	<b>39</b>
<b>24-NCİ AFTA .....</b>	<b>45</b>
<b>25-NCİ AFTA .....</b>	<b>54</b>
<b>26-NCİ AFTA .....</b>	<b>64</b>
<b>27-NCİ AFTA .....</b>	<b>72</b>
<b>28-NCİ AFTA .....</b>	<b>76</b>
<b>29-NCİ AFTA .....</b>	<b>86</b>
<b>30-NCİ AFTA .....</b>	<b>94</b>
<b>31-NCİ AFTA.....</b>	<b>101</b>
<b>32-NCİ AFTA .....</b>	<b>109</b>
<b>33-NCİ AFTA .....</b>	<b>115</b>
<b>34-NCİ AFTA .....</b>	<b>121</b>
<b>35-NCİ AFTA .....</b>	<b>126</b>

*Навчальне видання*

**СЕЇТ-ДЖЕЛІЛЬ Абібулла, МАМУТОВА Майре**

**КРИМСЬКОТАТАРСЬКА МОВА ТА ЛІТЕРАТУРА**

Підручник інтегрованого курсу для 5 класу  
закладів загальної середньої освіти  
(у 2-х частинах)

Частина 2

*Рекомендовано  
Міністерством освіти і науки України*

Підручник відповідає Державним санітарним нормам і правилам  
„Гігієнічні вимоги до друкованої продукції для дітей”

У підручнику використано матеріали з вільних інтернет-джерел

Формат 70х100/16.  
Ум. друк. арк. 10,73.  
Зам. № 1681.

Видавець і виготовлювач видавничий дім «Букрек»  
вул. Радищева, 10, м. Чернівці. 58000

Свідоцтво про внесення до Державного реєстру  
суб'єкта видавничої справи ЧЦ № 1 від 10.07.2000 р.